

بداية النهاية

الفصل الأخير

رواية

محمد حبيب



كل الحقوق محفوظة

دار لوغاريتم للنشر والتوزيع
رقم الإيداع: 2018 /23102
I.S.B.N: 978-977-6642-48-5

تصميم الغلاف: إسلام مجاهد.
المراجعة اللغوية: أميرة أسامة.
الإخراج الفني: ضياء فريد.
المدير العام: إيناس ناصر.
المدير التنفيذي: شادي أبو شهبة

✉ Logarithmpublish@gmail.com

☎ 01281052824

إهداء

إلى من تركني فى منتصف الطريق أحبو وحيداً

إلى عكازي الذى تأكل فجأة دون إنذار
قبل نجاحى بسويغات

إلى صديقي الأول و ملاذي الأخير
والذي «فتحي أحمد حبيب»

رسالة شكر وتقدير

إلى كل من وقف بجانبني منذ البداية وساعدني في إخراج روايتي الأولى إلى ساحة المعرفة، أود أن أشكركم على كل الدعم والتشجيع الذي نلته منكم، حيث أنه كان السبب الأساسي وراء إنجاز هذا العمل.. وهذا الإهداء لن يعبر بشكل كامل عن مدى تقديري لكم ولشخصكم ومدى حبي لكم.

- أ. رشا إسماعيل «المعيدة بقسم الصحافة بإعلام أكاديمية الشروق».
- أ. كريمان حبيب.
- سلمى فايز.
- آية عطوه.
- منة الله محمود.
- محمد مرزوق «مصمم الغلاف الأول».
- وخالص شكري وامتناني إلى أمي بصفة خاصة وأسرتي عامة..

عززي القارئ

قبل أن تبدأ في قراءة هذه الرواية، أود أن أخبرك أن هذا العمل حقيقي وتم نقله من الكشكول الخاص بالبطل كما كان مكتوبًا فيه، وإن وجدت بعض الأخطاء الإملائية أو في طريقة السرد، فهي ليست خطأ كتابة بل هي كما دونها البطل في الفصل الأخير من روايته، ولم يتم التعديل والإضافة عليها..

تمهيد

إذا كان الحُب الذي يكْمُن داخلنا تجاه شخص ما حقيقيًا ونابعًا من أعماقِ قلوبنا، وتبادلنا هذا الحُب مع نفس الشخص لسنواتٍ عديدةٍ كان يغلب عليها طابع السعادة، وبمرور الوقت وبدون مقدمات يهجرنا هذا الشخص بعد أن تعودنا على وجوده.. لسببٍ يراه هو أنه لم يكن له يدًا فيه بل الاختيار كان رغبًا عنه، وإنه حاول العودة من جديد ولكن...

نبدأ في حالة من الضعف وتجميع الذكريات، ومن ثم يتطور الأمر ليتحول إلى صراعات نفسية والتي تُمهّد لبداية مرحلة جديدة تُدير وتوجه شئون حياتنا.. مرحلة إطلاق الخيال وإعمال العقل الباطن، مما قد يؤدي إلى حدوث أشياء قد تضع مُجريات حياتنا في مهبِ الريح ومهما حاولنا جاهدين لتحريك المياه الراكدة مجددًا، نعود إلى نقطة البداية في كل مرة وكأن شيئًا لم يحدث..

مقدمة

أنا أشعر بيد الحزن تطوق عنقي وتضغط عليها لتقتلني، أبكي حزناً وليس ضعفاً وأنتِ تشاهدين من بعيد! بإمكانك فك يد الحزن عن عنقي ولكنك لا تبالي لأوجاعي وروحي التي أوشكت على الخروج من جسدي الذي أصبح متهالكا من الحزن عليكِ قبل أن يتم عامه الثلاثين..

روحي عالقة بين السماء والأرض، فأنا مكتئبٌ حزينٌ لا يدخل قلبي الفرح منذ أن رحلتي وكأن قلبي أغلق شرفته التي يتسلسل منها الفرح، وكأنك سلبت كل مفاتيح الحياة معك وتركيتني محطم أعيش على بقايا الذكريات، يشفق عليّ القاصي والداني وكأنني طفل مشرد أشتاق إلى الإحساس بمعني الحياة، أشعر وكأنني مت منذ أن تركتيني لا أشعر بملذات الحياة مثل كثيراً من الناس.

تمر الأيام مسرعة وأنا ما زلت بمكاني لا تحركني سرعة
الأيام، لطالما ظننت أن في هذه الأيام سنكون معًا نتحاور ونشكو
همنا لبعضنا حتى يزول، ولكن تركتيني أنا والهم وجهًا لوجه أندب
حظي وتعاستي.. أتذكري عندما كنا معًا نتقاسم الأوجاع؟، اختار
القدر أن تهجريني وأصبحت أنا من بعدك يتيم لا قلب يسعني ولا
عقل يدرك ما بي ولا يد أشعر عند لمسها بالأمان والراحة.

بداية جديدة؟ هل قلبي وعقلي قادران على بداية جديدة؟
أم البدايات الجديدة كذبة نصدقها لنخلق شعاعًا من النور يشق
العتمة؟

الفصل الأول

وحدة وذكريات

«اعتقادك بأنك وحيدًا واستسلامك لهذا سيجعلك لا
تستطيع التخلص من الشعور بالوحدة».



تدري يا عزيزتي كم تألمت! أعاني يوميًا وبداخلي ممزق أنا
أشعر وكأنني أحتاج إلى ترميم، أحتاج إلى أن أعود للسنين الماضية
من جديد إلى أيام الفرح والسعادة ليذوب حزني الملازم لي،
تختلط على مشاعري عندما أتذكر الماضي أبكي تارة وأضحك
تارة أخرى ولا أعلم ماذا أفعل في شبح الذكريات الأليم، حاولت
مرارًا وتكرارًا أن أبدأ من جديد لكنني في كل مرة أفشل عن المرة
السابقة حتى تيقنت أنني فاشل ليس بمقدوري أن أبدأ مجرد
البداية من جديد وأنسى الماضي الذي أحمله في قلبي وما أثقل
هذا الماضي على صدري!

ماذا أفعل وكل شعوري يتلخص في أنني لا أستطيع التحرر
من قيود الذكريات؟

أصبحت غرفتي المظلمة كل ليلة تضيق عليّ كما يضيق القبر وظلماته على الميت لا جديد يذكر في حياتي، فكرت كثيرًا في الانتحار والتخلص من هذه الحياة المرهقة، ولكن أتخلص من حياة مرهقة وأذهب إلى الموت بطريقة تجعلني في جحيم أبدي؟ فماذا لو كان الانتحار حلالاً!

الحياة أصبحت كثيبة والمستقبل في بلادنا أصبح مشوه الملامح، فماذا أفعل في ماضي يضيق صدري ومستقبل يرهق عقلي؟ أسئلة كثيرة تدور في ذهني وأشعر أن عقلي على حافة الجنون.

تذكرني حين كنا معًا في بداية الطريق وتحدينا الأزمات وتخطينا العقبات كنا نتحدث في كل الأوقات ونقلنا الهم والحزن، فأنا لا أدرك إلى الآن كيف تركتيني وتركت خلفك قلبًا أحبك من كل أعماقه! كيف أتخيل أن هذا الوجه البريء الذي تعلقتُ روعي به كما يتعلق الرضيع بأمه أن يذهب بعيدًا عني؟ كيف ماتت تلك الأحلام التي كنت دائمًا أود أن أراك فيها امرأة ناجحة؟ أتدري أنني إلى الآن يا حبيبتي ما زلت أشعر أنني يتيم محروم من حنان أمه وسند أبيه.

فأنا ما زلت أذكر عندما كنا نذهب معًا إلى المدرسة ونتحدث حتى الوصول، وكنا نترك المذاكرة والواجبات ونتحدث من بداية اليوم حتى آخره، ونتحدث في كل شيء وكان الملل شعورًا عابرًا في علاقتنا من كثرة الحديث واللقاء الذي كنت أحسب الساعات

قبله لإراكِ فيا لها من لهفةٍ تقتلني شوقًا، كانت الأيام تمر بيننا ولا نلمحها كأن اليوم دقيقة وليس ٢٤ ساعة، فأنا أتذكر تفاصيل لن تتوقعي أن أتذكرها.. ألم تشعر روحك بهذه الذكريات مثلي؟ أم حقًا روحك لا تحنُّ إلي؟

أصبحت أشعر وكأن هناك شبح يراقبني في الظلام وفي كل مكان أسمع صوته يناديني وكأنه متعاطفٌ معي، في أول الأمر كان قلبي ينتفض حين أسمع أصواتًا لا أعلم مصدرها وأرى أشياءً لجزء من الثانية ومن ثم تختفي فأنتفض من مكاني، ومع تكرار الأمر بدأت أشكك في عقلي! هل بالفعل هذه أولى درجات الجنون؟ أم بالفعل هناك شبحٌ يراقبني؟ أم هذه مجرد هلاوس؟

أتدري يا حبيبتي أنا الآن تعودت على وجود هذه الأصوات والأشياء التي أراها أصبح قلبي لا ينتفض، صار شيئًا مألوفًا بالنسبة لي بعدما كان مرعبًا جدًّا، تعودت عليه كما تعودت على غيابك. فأنا منهنك أشعر أنني أريد أن أدخل في غيبوبة طويلة أستيقظ منها بذاكره جديدة لا يوجد بها شيء من الماضي، ذاكره أملاًها أنا بالذكريات السعيدة واللحظات المبهجة تكوني معي لا تفارقيني فيها حتى الموت.

أنا في ظل غياب دور الأصدقاء في حياتي وغياب لغة الحوار معي، وعدم إحساس الأشخاص المحيطة بي بما يدور في داخلي، وجدت أن القط الذي أكمل عامه الثالث في غرفتي يشعر بي ويداعبني؛ ليخرجني من همومي، وفي كثير من الأحيان أشعر أنه

يتكلم معي بنظراته وحركاته، فهو ينتظرنى على باب شقتى حين
يسمع أصوات قدمى وأنا أصعد درجات المنزل بلهفة عاشق لم يرَ
محبوبته منذ فترة، رغم أننى لم أغب عنه سوى بضعة ساعات،
فبرغم أنه حيوان إلا أنه يشعر بى وبأوجاعى أكثر من أصدقائى
الذين طالت عشرتهم!

كم تمنيت أن يحببنى بنى آدم حبًا مثل هذا الحب الذى
يجعل قلبى يرفرف من السعادة، حبًا صادقًا ليس لمصلحة ما
أو لأغراض غير معروفة فهو يحببنى ولا ينتظر شيئًا منى سوى أن
أداعبه وأبادله هذا الحب..

غاب عني الجميع وبقيت وحيدًا اسأل نفسي: أي ذنب فعلته
لأبقى مدفونًا وحيدًا بدون رفيق؟ يتردد هذا السؤال فى بالى كثيرًا،
وأجد أن الإجابة واضحة أمامى ولكنى أتعمد عدم رؤيتها: إننى لا
أجيد اصطناع المشاعر مثلهم، لا أعرف طريقًا للنفاق، لا أطيق
المشاعر الزائفة..

فأنا أعرف نفسي تمام المعرفة وأعرف أنهم لن يستطيعوا
تحمل عفويتى فى الحديث ولن يستطيعوا تحمل أسلوبى الذى
أراه أنا مناسبًا لشخصيتى، فأنا من الذين يدفنون أوجاعهم
وأحزانهم بداخلهم لا يفصحون عن أسباب الخصام والخلاف إلا
فى حالات نادرة تكاد تكون منعدمة، نعم هذا أنا وأتقبل نفسي
بهذا الوضع ومتصالح مع نفسي لدرجة كبيرة؛ لذلك أجد نفسي
وحيدًا دائمًا ما من أحد يشبهنى ليجيد التعامل معى.

فكلما زاد عدد السنوات التي تمر عليّ فإن الأشياء التي
تؤرقني تبدو لي أصغر أهمية وأكثر تفاهة، حتى سنوات الطفولة
التي كانت تبدو جميلة وبها الذكريات السعيدة؛ أصبحت الآن لا
شيء سوى لحظات تمر أمامي سريعًا في عدة ثواني، كل ثانية منها
مجرد وهم وانتهى، أرى العالم الآن كما أنه مجرد سراب.

ليالي قاسية لعينة مرت وأنا منشغل بالتفكير في أمور كان من
المفترض أن أمحوها من ذاكرتي تمامًا، لكن طول وقت الوحدة
ذاكرتي تداعبني مداعبة أكرهها، فأنا عليّ أن أتخلص من هذه
الوحدة؛ لأستطيع التعامل مع الناس من جديد.

إن الاستسلام للوحدة والحزن كالاستسلام في الحرب الذي
يعني أن تعيش تعيشًا معتقلًا أو تموت عقابًا لك، وها أنا الآن
أوشكت على الاستسلام أحارب بكل ما أوتيت من قوة لأقتل
الوحدة ولكن أحتاج إلى مساعدة في هذه الحرب الصعبة؛ لأنني
لا أقوى على هذه المواجهة وحدي! سأهزم حتمًا فالمواجهه
غير متكافئة تمامًا، كيف أواجه الوحدة والذكريات والحزن وأنا
وحدي؟ لا يعاونني سوى صديقي القط!

أجلس في شرفتي بالساعات أستمع فيها إلى أم كلثوم
وفيروز أملًا فيهم أن يمروا معي فوق الحزن، لكنني دائمًا ما أجد
أنهم يذكروني بالماضي من جديد فأم كلثوم تقول في أغنية إنت
عمري: «علموني أندم على الماضي وجراحه» فيدق قلبي شوقًا
إليك يا حبيبتي وكأن أم كلثوم تريد أن تبقي الذكريات بيننا حية

خصوصًا في أغنية بعيد عنك حين قالت: «نسيت النوم وأحلامه
نسيت لياليه وأيامه، بعيد عنك حياتي عذاب ما تبعدنيش بعيد
عنك» أشعر بالدمع ينهال من عيني عند سماع هذه الأغنية وأتذكر
ذكرياتنا معًا، حين قلت لك: ليلي.. هو ممكن يجي يوم وتسبيني
لو حدي؟

وقلت: لا، أنا عمري ما هعمل كدا ومتقولش كدا أنا هفضل
معاك لحد ما نموت سوا.

لماذا ذهبتي وتركتيني ولم تكلمي عهدك معي؟
كنت أستمع إلى كوكب الشرق في كثير من الأوقات وأنا
أتحدث معك وقلبي مليء بالفرحة وكلّي آذان صاغية إلى صوتها
العذب وهي تردد كلمات الحب كنت أشعر أنها تتحدث عنا
وتقصدنا بهذه الأغاني.

أنا إلى الآن يا حبيبتي أجلس في شرفتي وأناجي طيفك وفيروز
تشعر بما أشعر به وتقول: «زوروني كل سنة مرة حرام تنسوني
بالمرة» وكأن وحدتي في شرفتي التي كانت مكان السعادة لي
أصبحت مكان الذكريات الآليمه، روحك في كل مكان، حديثك
في آذاني يتردد دائمًا لا يفارقني، ضحككتك في ذهني لا تغيب،
عينك الصغيرتان أشعر أنهما حولي، أنظر في عيون الناس لأراهم،
نعم، نعم.. ما زلت بقلبي وأكتب إليك كل يوم وأنت لا تشعرين
بروحي الممزقة، يا الله باعد بيني وبين هذه الذكريات إنني أموت

وجعًا وهي لا تشعر فكلما تذكرت وعودنا أشعر وكأن سيوفًا تمزق في قلبي.

لا أدري كيف أضحك مع الزملاء في العمل أو أضحك لأي سبب بعد أن هجرتيني! إن الضحكة التي كانت مرسومة على وجهي كنتِ أنتِ مصدرها، الضحكة والحب والتفوق والمذاكرة وكل شيء جميل كان من أجلكِ أنتِ ليس من أجلي!

نفسى قادرة على أن تفتح صفحة جديدة في حياتي وتمتزج بالناس من جديد وتخالطهم لكن عقلي لا أستطيع أن أخرس صوته العالي وأن أمحو الصور التي يعرضها أمامي عندما أتخذ خطوة تجاه فتح هذه الصفحة، وكأنه أقسم أن لا يتركني إلا ممزقًا في مدفني أو مسلوبَ العقل في إحدى مستشفيات الأمراض العقلية، فعقلي هذا أشعر أنه مثل ذكرياتك تمامًا يا حبيبتي ترهقني جدًا ورغم ذلك لا أطيق الاستغناء عنها، من منا يستطيع أن يحيا دون عقل حتى لو كان يألمه ليلاً ونهارًا؟

كنت دائمًا لا أصدق (شارلي شابلن) حين يقول: «التعلق هو جزء من الموت»، لكن مع مرور الزمن تيقنت أن التعلق هو الموت نفسه وليس جزءً منه، ما أقبح أن تتعلق بإنسان وتضع فيه كل أملك وحبك ويتركك لأي سبب كان!

أتذكر الكثير من الأحلام الذي حلمناها سويًا والكثير من العهود وحديثنا منذ عامين في ليلة من ليالي شتاء فبراير.

حين قلت لك: إحنا كملنا ٣ سنين ونص مع بعض من
كام يوم بس، ولسا المشوار طويل ولازم نبقى مع بعض عشان
منضيعش وطول ما إحنا مع بعض محدش هيقدر يهزمننا أبداً.

وقلت: أنا متحمسة وجاهزة ونفسي أكمل معاك العمر كله
لحد لما أموت، وهواجه الناس كلها مهما كانت قوتهم وهنتجوز
وهنعيش في سعادة غصب عنهم كلهم.

قلت: طبعا أول بنت هنجبها لازم تبقى على إسمك عشان
تطلع جميلة وعنيدة كدا زيك.

ابتسمت وقتها وقلت: لا أنا عايزها تكون على اسمي بس،
لكن تطلع شبهك في كل حاجه.

ضحكت أنا بصوت عالي وقلت: حرام عليك لو شبهي مش
هنتجوز أبداً.

وغضبت أنتِ وقتها وقلت: أنت لازم تكون واثق في نفسك،
إنت أحسن واحد في الدنيا دي كلها، أنت مش بالشكل اللي
مصورهولك عقلك إفهم بقى.

ابتسمت وقتها وقلت لك: أنا بحبك.. إنتي مصدر سعادتني
وكل حاجه ليا في الدنيا الكئيبة دي.

وكان ردك يفرح القلب حين قلت: أنا بحبك أكثر من كل
حاجه إنت بالنسبالي الأمان المكان اللي بالجأ له في كل أحوالي
وبلاقيه مستنيني سواء كنت مبسوطة أو حزينة.

وانتهى حديثنا عندما دخلت والدتها واضطرتنا إلى إنهاء الحديث وكلي شغف لرؤيتها في اليوم الثاني، وفي صباح اليوم الثاني بالفعل رأيتها وهي ذاهبة إلى درسها أنتظرها من بعيد لأراها وأبتسم وتراني هي الأخرى وتخجل وتضع عيناها أرضاً حتى لا يلاحظ الناس أننا نتبادل النظرات.

عندما أجلس وحيداً وأتذكر المحادثات واللقاءات والغراميات التي كانت بيننا أشعر بدقات قلبي تتزايد بزيادة دموع عيني وأن قلبي على وشك الخروج من بين ضلوعي وأنفاسي تزداد ويعلو أصواتها كأنني عداء أفريقي في سباق الألف ميل، فبدونك أنا في تعداد الموتى، جسد على قيد الحياة وروح قتلت من التعذيب والمعاناة.. تباً لهذا الحب الذي يسري في دمي ويسيطر على قلبي وعقلي! يا له من سم ليس بـ حب، فماذا لو كان حبي لك متجسداً في رجل وقتلته وتخلصت من عناء هذه الذكريات.

وبينما أنا أجلس في الظلمة الحالكة داخل غرفتي هائماً في همومي أسمع الأصوات التي لا أعلم مصدرها كعادتي تناديني بمسحة حزنٍ وهدوء: محمد.

فألثفت حولي مجيباً: مين؟

ثم يختفي الصوت مرة أخرى وأشعل الإضاءة باحثاً عن المصدر ولا أجده فأعيد الظلام من جديد، ويتكرر هذا الأمر معي في الليلة الواحدة ما يقارب الخمس مرات، هو الأمر الذي دفعني أن أستشير طبيب نفسي لأطمئن على سلامة عقلي.

ذهبتُ إلى عيادة دكتور «طاهر» النفسية والعصبية قمت بدفع ثمن الكشف لمساعد دكتور «طاهر» الذي يظهر عليه أنه في أواخر الخمسينات من عمره وجه بشوش ورغم ذلك نبرة صوته بها الحزن وقلة الحيلة وكأنه يحتاج هو الآخر لاستشارة الطبيب الذي يعينه.

إضاءة العيادة خافته وموسيقى هادئة متسلله من غرفة الدكتور التي أجلس أمامها جعلتني أتذكر المرة الأولى للقاء في المدرسة الإعدادية عندما رأيتها وشعرت أن الزمن توقف عند هذه اللحظة لدرجة أن عيني لم تفارق وجهها الجميل لمدة ربع ساعة كاملة، كنت في الثالثة عشر من عمري وقتها وليس لي تجارب حب سابقة لكنني أحسست وكأنني شاعر يملك من العمر خمسين عامًا مرت عليه العديد من التجارب، تحدثت إلى صديقاتها التي كانت قريبة مني في ذلك الوقت.

قلت لها: مين الحلوة اللي كانت واقفه معاكي في الفسحة النهارده؟

ردت ضاحكة: دي «ليلي» من أقرب الصحاب ليا، بتسأل ليه؟

أجبتها ونار الحب تشعل قلبي: أنا بحبها وبحبها أوي ومش عارف ازاي حصل كدا!

ظهرت علامات الدهشه على وجهها وقالت: بتحبها!! ازاي وانت لحد دلوقتي أصلاً مكنتش تعرف اسمها إيه؟

أجبتها بعجلة قبل دخول المعلم إلى الفصل: إيه ماسمعتيش
عن حُب من أول نظرة يعني؟

صوت «عزيز» مساعد الدكتور يقطع حبل الذكريات التي
كان يمر أمامي وهو يقول: أستاذ محمد انت كويس؟
تعجبت من سؤاله وقلت له: أيوه أنا تمام، بس انت بتسأل
ليه؟

قال: أنا ناديت عليك أكثر من ٣ مرات وانت باصص للحيطة
ومركز ومعزول عن المكان كله!
أجبهته وأنا في حيرة: أنا آسف بس سرحان في هموم الدنيا
والمشاكل.

رد بابتسامه جميلة: كان الله في عوننا كلنا يا أستاذ محمد
والله.

أقف على باب غرفة دكتور «طاهر» استأذن للدخول وألقي
عليه التحية، قام من مكانه مبتسمًا هو الآخر، وقال: أهلاً بيك يا
أستاذ محمد اتفضل أعدد.

ابتسمت له وجلست أمام مكتبه المُرْتب بشكل جميل.
وقبل أن أتحدث معه في شيء قال لي: عايزك تنسى إن أنا
دكتور وانك جاي محتاجني أعالج لك مشكلة تعباك أو مأثره
عليك.

أومئ برأسي موافقاً مع ابتسامة بسيطة، تبادلنا الصمت لمدة خمس دقائق فhez رقبته وبدء تشغيل مقطوعة موسيقية لعمر خيرت. ثم بدأت أنا بالحديث قائلاً: أنا بتقطع ومتدمر حاسس إن روحي هتطلع مني، الذكريات لما بسرح فيها بتقتلني من اللهفة والشوق للرجوع تاني، الوحدة يا دكتور، أنا بقيت لوحدي بمقتش عايش أنا بقيت زي الطفل اللي أهله وأصحابه كلهم ماتوا، عايش من غير حد يخفف عني الوجد اللي ملازمي دايماً، أنا بقيت أسمع أصوات غريبة بالليل في أوضتي بتنادي عليا بنبره هادية وحزينة وبشوف أشخاص ملهمش ملامح لمدة كام ثانية ويختفوا من قدامي ومعرفش إيه دا! هو دا جن وأنا حصل لي مس بسبب إني لوحدي؟

ضحك الدكتور وقال في هدوء: علم النفس مش بيعترف بالحاجات دي، اللي انت بتشوفه في أوضتك هو اللي انت بتتمناه يحصل لك في الواقع، لكنه مجرد تخيلات بيصورها ليك عقلك الباطن زي الأصوات اللي بتناديك مثلاً.. انت بتتمنى إن يكون فيه حد يحس بحزنك في الوقت المتأخر دا ويواسيك ويطمئك ودا أدى إلى اصطناع عقلك الباطن للصوت دا؛ عشان يصدر لك إحساس إنك مش لوحده وفيه اللي بيحس بالأمك، ونفس الكلام الأشخاص اللي بتشوفهم من غير ملامح وبتختفي تاني.. هما بردو الأشخاص اللي نفسك يكونوا جنبك طول الليل يقاسموك وجعك

اللي معذبك، لكن قوللي أنت سألت نفسك مرة واحدة بس قبل كذا
ليه الأشخاص اللي بتشوفها مش متحدد ملامحها؟

توقفت هنا وسألت نفسي نفس سؤال الدكتور ونظرت إلى
الأرض وأنا أهز قدمي في توتر لمدة دقيقتين وقمت بهز رأسي
يميناً ويساراً مجيباً بالنفي بدون أن أنطق بكلمة واحدة..

أكمل دكتور طاهر حديثه قائلاً: من الصعب جداً على كثير
من الناس إنهم يعيشوا لوحدهم بدون جليس، وإن يكون أنت
ونفسك بس اللي بتحملوا هموم بعض، وهو دا اللي بيأدي لخلق
حالة من الاكتئاب بتخلق الخيالات والحاجات اللي بتحصلك
دي كلها.

تبادلنا الصمت هذه المرة مدة أكثر من المرة السابقة ونحن
نستمع إلى الموسيقى، لكن شق الصمت صوت هاتف دكتور
«طاهر» الذي كان يبدو أنه يتحدث إلى زوجته في حديثٍ دام
لدقيقتين فقط.

ثم استأذن الدكتور في كل أدب وتقدير قائلاً: أنا آسف جداً
يا أستاذ محمد ابني الصغير تعبان ولازم يتنقل المستشفى حالاً
ممکن نكمل في وقت تاني؟

أجبتة سريعاً دون تردد: اتفضل يا دكتور ابنك محتاجك،
نتكلم تاني قريب.

استئذنت بالخروج وأرى ملامح القلق والإحراج على وجه
طبيبي وهو يجمع أشيائه الخاصة من مكتبه بشكل سريع، وذهبت

أنا إلى منزلي الذي عند دخوله أشم رائحة البؤس في كل أركانه، دخلت إلى غرفتي في صمت دون أنا أتحدث إلى أبي وأمي وأغلقت باب الغرفة ومع صديقي القط وجلست أمام مكتبي أمسك برواية أقرأها لمعشوقي الروسي «دوستوفسكي» وغلب عليّ النوم من شدة التعب النفسي الذي أرهق جسدي في طريقه.

رأيتها مجدداً في أحلامي وكأن الذكريات تركض خلفي لا أستطيع الفرار منها حتى في نومي كانت تأتيني بردائها الأزرق بابتسامتها الفاتنة تقول لي: إنت وحشتني أوي، ليه مبتسألش عليا؟ أنا واحشني كلامنا طول اليوم.

أجبتها بنبرة صوتٍ حزين: بس انتي اللي سيبتيني أواجه الدنيا لوحدي!، عارفه أنا محتاج ليكي أوي دلوقتي أكثر من أي وقت فات، حاسس إن العالم كله بيكرهني محدش بيحبنى من بعدك! قالت: متظلمنيش أنا براقبك كل يوم وبحس باللي انت حاسس بيه وأكثر أنا وحيد زيك بالظبط، بس الاختيار كان غصب عني لو كان بمزاجي مكنتش سبتك أبداً.. إنت أجمل حاجة حصلت لي.

قلت والدموع تملأ وجهي: يعني هشوفك قريب يا حبيبتى؟ وحشتيني مشتاق ليكي كفاية كدا.

تركتني وذهبت ووجهها حزين قائلة: ابدأ من جديد لسا في عمرك وقت تقدر تعمل كدا فيه، لو بتحبنى فعلاً إرجع لحياتك في ناس كتير بتحبك.. زيي.

ناديت عليها كثيرًا بكل ما أوتيت من قوة وأنا غارق في
دموعي، لكنها لم تجب النداء وذهبت بعيدًا كأنني لم أتحدث
إليها..

استيقظت من نومي وأمي تدعوني للإفطار الذي أصبح
بيني وبينه عداوةً، أكلت وجلست مع أبي وأمي نشاهد الأفلام
الكلاسيكية ونتحدث في أمور حياتنا وطال الحديث بيننا ثم انتهى
بدعوة أُمِّي لي وتركتني ودخلت إلى غرفتها، وعدت أنا الآخر إلى
غرفتي المظلمة، جلست على سريري أتذكر حلم الليلة الماضية
الذي رأيته فيه بعد غياب دام كثيرًا..

هي أول حب في حياتي كانت أجمل قصة حب يتمناها
العاشقون أن تدوم بينهم، كنا نواصل الليل بالنهار منهمكين في
حديثنا عن مستقبلنا الغامض الذي نرسمه سويًا، كنا نجلس جنبًا
إلى جنب في دروسنا نشجع بعضنا على التفوق وتحصيل أعلى
درجات النجاح، وبعد الدروس أمشي خلفها حتى الوصول إلى
مدخل منزلها وتلوح لي بيدها من بعيد بضحكتها البريئة فأبتسم
لها وأذهب إلى منزلي الذي كان على مسافة قريبة من منزلها.. لماذا
لم تدم هذه الأيام؟ أنا أكره القدر الذي أبعدك عني فضحكك
ما زالت تسري في عروقي، ما زلت أحلم يا حبيبتني أن تعودني
بكلماتك تواسيني.

الأغاني التي كنا نسمعها سويًا أصبحت أخاف سماعها وحدي! قلبي يذوب عندما أسمعها ولو صدفة في غيابك يا حبيبي، كم أتمنى رؤيتك ولو لثوانٍ لأقتل هذا الشوق الخبيث فأنا من اخترت أن أعيش لك وأنا من تركت حياتي في يديك حتى أنني لا أعلم ما أنا فيه الآن، هل هو وفاء لقصة حب أسعدتني كثيرًا أم استسلامٌ للأحزان والذكريات المؤلمة؟

كنت أتخيل أن غرفتي وشرفة المنزل هما من يتسببون في إحياء الذكريات داخلي، فقررت أن أبتعد عنهما بضعة أيام وأذهب إلى شقتنا الأخرى هناك في الإسكندرية أمام إحدى شواطئ ميامي وكان ذلك في نهاية ديسمبر ٢٠١٥ ورائحة الشتاء في كل مكان وكانت هذه الزيارة هي البداية..

دعوت العديد مِمَّن يدعون أنهم أصدقائي للمجيء معي لكنهم رفضوا جميعًا رفضًا قاطعًا بحجة أنني شخص كئيب لا أتحدث كثيرًا محبًا للجلوس في غرفتي أو في الشرفة التي ترى البحر، لم أعلق على حديثهم ولم أظهر لهم الوجد الذي شعرت به من حديثهم وضحكت وكأن شيئًا لم يحدث، وذهبت إلى غرفتي وأعددت حقيبة السفر الخاصة بي وودعت أبي وأمي الراضيين لفكرة سفري وحدي من القليوبية للإسكندرية، وتركت المنزل وذهبت إلى محطة القطار، حجزت تذكرةً وانتظرت قدوم القطار ولكن لم أنتظر كثيرًا، جاء القطار وصعدتُ إليه ووضعت حقيبتي فوق مقعدي في المكان المخصص للحقائب ووضعت السماعات

في أذني وبدأت أم كلثوم تقول: «طول عمري بخاف م الحب وسيرة الحب»، شعرت أن أم كلثوم تتآمر ضدي مع الوحدة لإحياء الذكرى التي لا تموت سوى دقائق قليلة، تذكرت وأنا جالس في القطار المرة الأخيرة التي ذهبت فيها إلى الإسكندرية مع أسرتي وكانت حالتي في هذا الوقت عكس حالتي الآن تمامًا، كان حينها يغمرنني شعور بالسعادة وتعبيرات الفرح تملأ وجهي وقلبي، كنا نتحدث من لحظة تحرك القطار إلى وصوله الإسكندرية وتظل تحذرني من السباحة بعد غروب الشمس حتى لا يصيبني أي مكروه، وألا أنظر إلى الفتيات المتواجدات على الشاطئ وإلا ستأتينني من بيتها لتقتلني، فأداعبها أنا قائلاً: البنات على الشط بملابس البحر حلوين أوي «رغم أنني مهما رأيت كثيرًا لا أرى غيرها».

فترد هي والغيرة في صوتها واضحة: لو مخرجتش من الشط دلوقتي حالًا هقفل الموبايل ومش هنتكلم تاني لحد ما ترجع لي من هناك.

فأضحك وأنا أشعر بالسعادة من غيرتها وأقول: لا لا خلاص أنا هخرج وأرجع الشقة تاني.

فأشعر بابتسامتها وهي تقول: كدا أقولك بحبك بقي.

ثم يتحول المشهد في ذاكرتي وأتذكر حين كنت على وشك الغرق في البحر وأنا بصحبة أسرتي لولا شجاعة أبي صاحب الخمسة وخمسين عامًا الذي صارع الموج وأنقذ حياتي ولم يهتم

لنفسه، وبعد أن أنقذ حياتي وحملني بين ذراعيه ليخرجني على الشاطئ أتذكر جيداً دموع أمي ولهفتها هي وأبي وهم يحركون في ذراعي ويدي ويضغطون على صدري ليخرج الماء من فمي وفرحتهم الكبيرة بعد أن بدأت أستفيق ويعود لي تركيزي وأسمع صوت أبي وأمي وبعض الناس الذين كانوا على الشاطئ يشكرون الله بعد إنقاذي من الموت غرقاً، وأمي التي ضمتني إلى صدرها وهي تبكي وتكرر «الحمد لله»، وبعد ذلك ذهبنا من الشاطئ إلى الشقة وظل أبي يعطيني محاضرة كاملة في السباحة وتعليمات صارمة في التصرف عند الشعور بأن الموج يسحبني إلى داخل البحر، لكن قاطعته أمي وقالت بكل جدية: انت بتعلمه كل دا ليه؟ أنا مش هخليه ينزل البحر تاني! خلاص إحنا اتعلمنا من درس النهاردا والموضوع خلص.

رد أبي: مين عارف إيه اللي ممكن يحصل في المستقبل ممكن يضطر ينقذ أرواح ثانية وممكن هو يروح من غير ما نعرف؛ عشان كذا لازم يتعلم ينقذ نفسه أو غيره.

نعم.. نعم أتذكر وكأن الأحداث كانت أمس ليس من فترة تزيد عن ستة أعوام تقريباً، فبعد أن داعبتني الذاكرة لمدة ساعتين وصل القطار محطة الإسكندرية ونزلت منه وخرجت من محطة القطار ورائحة الإسكندرية التي لها طابع خاص عندي أشمها وأشعر بلسعة هواءٍ نقي يجعلني أغلق عيني استمتاعاً بجماله، وبعد أن استمتعت حوالي عشر دقائق بالهواء أمام المحطة أوقفت

تاكسي وأخذني إلى ميامي أمام باب العمارة التي توجد بها شقتنا ثم صعدت إلى الشقة التي بعد دخولها شعرت أن الذكريات كانت في استقبالني عند مدخلها مباشرة، تذكرت غرفة المعيشة والتلفاز الذي كنا نسهر أمامه أنا وأسرتي نتحدث بالساعات؛ نضحك ونلهو، دخلت إلى غرفتي التي عند دخولها تذكرت أيام فرحي وسعادتي خصوصًا سريري الذي كنت أسهر عليه بالساعات أتحدث إليك يا حبيبتي فأنا أشعر أن روحك ترفرف في عالمي لتعيد لي الذكريات مرارًا وتكرارًا.

أخذت قسطًا من الراحة بعد شريط الذكريات الصغير الذي مر أمامي بعد دخولي الغرفة مباشرةً وأفرغت حقيتي ووضعت ملابسني في دولابي وأخرجت مستلزماتني الخاصة من الحقيبة ووضعتها إلى جانب السرير وأخرجت ملابس فضفاضه ارتديتها وأخذت هاتفي المحمول وراوية أقرأها أقتل بها الوقت وأكسر بها الوحدة، فبعد جلوسي على الكرسي مباشرة سمعت جرس هاتفي يدق، كانت أمي تطمئن على وصولي الشقة وعلى أحوالي ولم يطل الحديث بيننا وانتهت المكالمة بدعوتها لي كالعادة.

كنت أعتقد أن الذكريات ستختفي بتغيير المكان لكنني اكتشفت أن الذكريات تحيطني أينما ذهبت كأنها خيالي، كم يكون الليل شديد العتمة والكآبة حين نفقد شخصًا تعودنا على الحديث معه كثيرًا وكأنني لا أجيد سوى العزف على أوتار الذكريات والآلام، فالذكرى الواحدة تحمل مئات الذكريات حتى

أنني قاذني الظن أن أحاول أن أصنع من نفسي شخصاً حزيناً لكن حقيقة الأمر تختلف تماماً فالذكرى هي من تركض خلفي لتصنع مني هذا الشخص الكئيب دون مجهود يذكر أبدله، حتى أنني لا أعلم من أخاطب نفسي أم أخاطب من تركتني ورحلت؟

بينما أنا أجلس في شرفة الشقة أستمتع برؤية موج البحر ليلاً ويضرب وجهي نسمات الهواء سمعت مجدداً تلك الأصوات تنادينني «محمد» فسرعان ما تذكرت تعليق دكتور «ظاهر» على هذه الأصوات فتعاملت بإيجابية شديدة ولم أهتم لها، وبينما أنا أمسك بهاتفني وأفتح ألبوم الصور رأيت صورة لها لا أعلم إن كنت أقصد أن أراها أم كانت صدفة؟ وجدت نفسي بدون وعي أكبر الصورة على ملامحها وبدأت دموعي تنهال على وجهي وأنا أتذكر أن تلك الصورة أنا من صورتها عندما كنا نسير معاً على كورنيش النيل، كانت لابتسامتها مفعولاً قاتلاً على قلبي في هذه الصورة بشكل خاص التي كانت تظهر ملامحها جيداً، وجدت نفسي أبتسم ودموعي على وجهي عندما تذكرت هذا اليوم عندما كنا معاً وأوقفنا بائعة الورد تدعو لنا بالسعادة الدائمة وأن يبارك الله لنا في حياتنا فاشترت منها كل الورد الذي كان معها نظير دعواتها التي شرحت قلبي، فقالت لي حبيبتني: طب ليه مجبتش واحد أو إثنين بس؟ ليه جبت كل دا؟

قلت: دعوتها لينا تستاهل أكثر من كدا، لو كنت عارف إن الورد هيخليني أشوف الضحكة الحلوة دي دايمًا كنت اشتريت كل دقيقة ورد عشان أشوف جمال ضحكتك.

ابتسمت ابتسامة خجل ونظرت إلى الأرض ولم تنطق بحرف واحد، فأكملت حديثي مازحًا: ايه دا أول مرة أعرف إنك بتتكسفي.

ردت ضاحكة وهي تضربني على كتفي: أيوه بتكسف، انت مش شايفني بنت زي أي بنت مثلاً؟
قلت: لا مش شايفك زيهم.

بدت علامات الاستعجاب على وجهها وقبل أن تنطق بأي كلمة، قلت لها: انتي أهم منهم كلهم، انتي في نظري ملكة والملكات مش بيتقارنوا بحد، عمرك لقيتي خادمة من خادمات الأميرة ديانا بتقارن نفسها بأمرتها؟

عادت ابتسامتها تملأ وجهها من جديد، لكن سألتني سؤالاً أتذكره جيداً أغضبني وقتها.

قالت: إنت بتحبني فعلاً ونفسك نكمل حياتنا مع بعض لحد ما نموت ولا انت بتتسلي معايا وبعد فترة هتسبني لما تزهد زي رجاله كثير؟

ظهرت على وجهي علامات الغضب وأجبتها بكل جدية:
انتي بتهزري؟ انتي فعلاً بتظني فيا الظن دا؟ إحنا مر وفات علينا
مشاكل كتير كان من السهل عليا وقتها إني أسييك وفضلت متمسك
بيكي! انتي بتساويني بأشباه الرجالة دول؟ فاكراه إني منهم؟

شدت على يدي ونظرة لي بنظرة حنانٍ وعطفٍ وقالت: أنا
ماقصدش أهينك أبداً، أنا بس مجرد التفكير في إنك ممكن يجي
يوم تسبني بخاف أوي، إنت بالنسبة لي أرجل راجل في الدنيا كلها
ومالي عليا عيني وقلبي يا حبيبي.

بعد سماع هذه الكلمات هدأت أعصابي قليلاً وقلت لها
في هدوء: ليه بتتخيلي النهايات الحزينة؟ ليه مش بتتخيلي مثلاً
إننا هنتجوز وهنعيش الباقي من عمرنا في حياة وردية كلها حب
وسعادة ويبقى عندنا «ليلي» صغيرة شبهك؟

ابتسمت وقالت مازحة: إنت نسيت إن أنا عايزه ولاد وبنات
كتير مش واحد أو واحده؟

ابتسمت وقلت: نتجوز بس الأول ونشوف الموضوع دا
بعدين يا قلبي.

بعد ذلك الحديث وجدنا نفسنا أمام إحدى محلات الأيس
كريم، اشتريناه وأكلناه سريعاً ثم قالت لي ضاحكة: عارف أنا
نفسي في إيه دلوقتي؟

قلت: لا.

قالت: نفسي من زمان أجري وأرقص في شوارع وسط البلد
زي الأطفال.

بدون تفكير ووعي مني حملت حقيبتها الخاصة في يدي
ومسكتها من يديها وقلت لها: طب استعدي بقي عشان هنجري
ونرقص دلوقتي لحد ما نضحك الناس علينا، ثم أخذتها وركضنا
نصف ساعة، نركض ونضحك بصوت عالٍ والناس في الشوارع
ينظرون إلينا نظرتهم للمجانين ولا نلتفت إليهم ولا إلي حديثهم
عنا، حتى تعبنا من الجري وتوقفنا نلتقط أنفاسنا قليلاً فرفعت
يذاها ونظرت إلى السماء، وقالت في تعب: شكرًا يا رب على
نعمة وجود «محمد» في حياتي، ابتسمت وأنا أنظر إليها وقلت:
طول منا معاكي هعمل المستحيل عشان أحقق لك أحلامك،
هنخليهم كلهم يغيروا منك يا حبيبتي.

نظرت إلى الساعة في يدها وقالت: الوقت اتأخر وفات
بسرعة لازم نروح بقي ونفتح الموبايلات.

أخذتها ومشينا نستكمل حديثنا حتى وصلنا إلى المترو
ونزلنا في محطتنا وركبنا السيارة الأجرة التي تنقلنا إلى بلدتنا وفي
السيارة شعرت أنها تريد النوم ومرهقة.

فسألتها: عايزه تنامي شوية تترتاحي من تعب اليوم والجري
دا كله؟

قالت: لا أنا عايزه أفضل قاعده معاك عشان نكمل كلامنا.

ومجرد أن أخرجت محفظتي ودفعت الأجرة للسائق وجدتها أسندت رأسها إلى كتفي وبعد ثوانٍ كانت نائمة على كتفي دون أن تشعر، نظرت إليها ضاحكا أشفق عليها من التعب الذي كانت لا تريد أن تظهره وقلت في نفسي ضاحكا: عايزه تكلمي كلامنا؟ كمليه في الحلم يا حبيتي، وأسندت رأسي إلى رأسها ونمت أنا الآخر؛ حتى أيقظنا السائق عند وصولنا، ونظر بعضنا إلى الآخر ودخلنا في نوبة ضحك على الحديث الذي كنا نريد استكمالها حتى أن السائق صار يضحك على ضحكنا هو الآخر ونزلنا من السيارة ذاهبين إلى منازلنا التي كانت لا تبعد كثيرا عن موقف السيارات كانت هي تسبقني وأنا أتبعها مباشرة كعادتنا في بلدتنا كثيرة الحديث والأقاويل حتى وصلنا إلى بيتها ووقفت كعادتها في مدخل منزلها تلوح بيدها بضحكة أطفال أعشقها.

يا إلهي كم كانت ذكريات جميلة حقًا! لا أقدر علي نسيانها بتفاصيلها البسيطة مهما ذهبت بعيدًا إلى أي مكان ومهما قابلت الكثير والكثير لن أقدر على خيانة ذاكرتي التي تحمل العديد من اللحظات المبهجة.

بعد مدة طويلة من النظر في صورتها على هاتفي الذي امتلأ بدموعي أثناء رجوعي بالذاكرة للذي مضى كانت الساعة الثانية بعد منتصف الليل والهواء في شرفتي أصبح شديدًا ومنظر الموج وصوته كان مربعًا للكثير من الناس، لكنني أنا أحب رؤية الموج وهو على هذا الشكل، فوقفت وأنا أستند على سور الشرفة أستمع

إلى فيروز التي أشعر عند سماعها أنني لا أسمع أي شيء آخر
سواها وأستمر هذا الوضع إلى الرابعة ونصف تقريبًا لا أفعل أي
شيء سوى النظر إلى ظلام البحر وأمواجه وأستمع إلى فيروز حتى
اقترب موعد آذان الفجر فتوضّعت وانتظرت الأذان ثم بدأت
بالصلاة وكنت أدعو الله بقلب يملأه الخشوع أن أراها لو دقيقة
واحدة لاطمئن عليها ويطمئن قلبي وكانت الدموع تنزل بغزارة
على وجهي من شدة الدعاء والشوق إليها وأنا أرجو من الله رؤياها
ثم انتهيت من الصلاة وعادوت إلى سريري لأنام نومًا عميقًا..

الفصل الثاني

هلاوس

« لا تترك نفسك فريسة للمرض ولا تقف مكتوف الأيدي أمام الهلاوس ، فإن وصل بك الأمر أنك لا تستطيع أن تميز الواقع عن الخيال فأنت بحاجة للعلاج» .



استقيظت قبل ظهر اليوم التالي وجدت رقم أمي وأبي متكرراً في سجل المكالمات الفائتة يبدو إنهم يريدون الاطمئنان على أحوالي، قمت بالاتصال بهم وتبادلنا الحديث في مكالمة استمرت سبع دقائق اطمئنا فيها على كل شيء ثم ارتديت ملابسني وخرجت إلى أحد محلات الطعمية وأحضرت الإفطار وعدت للشقة وأعددت مائدتي للطعام وبعد ١٠ دقائق انتهيت من الإفطار، وقمت بعمل المشروب المفضل لي «الشاي بالنعناع» وذهبت إلى الرُّكن المفضل لي في شرفتي صاحبة الدهانات الزرقاء، ولكن حدث شيء غريب فإذا بي أنظر من الشرفة وقعت عيناى على فتاة بمجرد النظر إليها تشعر أنها ليست من البشر! وفي لحظة من الجنان ودون تفكير وجدت نفسي أترك كل شيء

في يدي وأنزل مسرعًا لأتأكد أنها حقيقية ليس من نسج خيالي، وعندما خرجت من باب العمارة وجدتها على الناحية الأخرى من الطريق تنظر لي وتبتسم! فما كان بمقدوري شيء غير أنني وقفت منتبهًا رافع الحاجب الأيسر وفي مفتوح وظل الحال على هذا لمدة لا تقل عن ٥ دقائق، ثم انتهت لحالي وقررت أن أذهب للناحية الأخرى من الطريق وهي ناحية البحر وأثناء عبوري للطريق كانت تقف بنفس الابتسامة وزادت الابتسامة عندما رأني أجري وأسرع لأصل إليها ولكن كانت المفاجأة عندما عبرت للناحية الأخرى لم أجد شيئًا! وقفت مصدومًا أحاول استيعاب ما حدث بدايةً من وقوفي في البلكونة مرورًا بابتسامتها وأنا أعبر الطريق إلى هذا الشيء الغريب! وتعددت السيناريوهات داخل عقلي.. ماذا حدث؟ هل كنت أتخيل؟ هل كانت حقيقية وركبت إحدى المواصلات ولم ألمحها وهي تركب؟ أم عادت أسطورة عروس البحر من جديد؟

تخلصت من تساؤلاتي لنفسي وقررت أن أجلس على صخور الكورنيش القريبة من الشاطئ كعادتي، فجلست وبدأت بتشغيل أغاني فيروز لكي أتعيش أكثر مع منظر الأمواج وهواء البحر.. وإذا بي أتذكر ملامح هذه الملاك وأحاول تجميع تفاصيل وجهه وجسده في عقلي لأجد المفاجأة...

إنها ليست جنًا أو شبحًا! إنها إنسانه ولكنها نسخة من
«ليلي» حبيبي التي أتحدث عنها! كيف هذا؟ كيف يكون هناك
شخصان متشابهان لهذا الحد؟

أوقفت صوت الأغاني وأنا في قمة التركيز والتفكير في سؤال
واحد.. هل معقول هذا؟

وأثناء هذا التفكير العميق أجد ذاكرتي تعود بي للخلف منذ
أكثر من أربعة أعوام وأنا أجلس مع حبيبي وأقول لها: تفتكري
هلاقي حد شبهك كدا وأعاكسه وأمسك إيديه وأعديه الطريق؟
وكان ردها: لأ يا حبيبي، أنا مفيش حد شبيهي ولو فكرت
تعمل كدا مع حد تاني هقتلك.

كان ردها «مفيش حد شبيهي» يتردد في عقلي مرارًا وتكرارًا
أكثر من أي شيء آخر، فما هذا الذي يحدث معي؟

وأثناء حديثي مع عقلي، وجدت يدًا تضرب كتفي بهدوء
فنظرت خلفي فوجدت صديقًا قديمًا لي عرفته من خلال الفيس
بوك ينظر لي بابتسامة كبيرة فنظرت إليه بنفس الشعور والابتسامة
وقمنا وتبادلنا الأحضان والقبلات، فقال لي معاتبًا: بقى ينفع
تيجي إسكندرية كدا ومتقولش لحد وأشوفك صدفة على البحر
كمان؟ مش كفايه إننا بقالنا أكثر من سنة مش بنتكلم!

قمت بالرد عليه محرّجًا: معلش والله يا خالد الموضوع جه
بسرعة مكنتش مجهز له خالص.

رد هو الآخر: على العموم إحنا لسا فيها والنهارده بالليل انت بتاعي وهنخرج وهنتعشى سوا.

وقبل أن أبدأ بالحجج وأقاطععه وأقول: بس أنا...

قاطعني قائلًا: والله لو مخرجناش النهارده واتعشنا سوا هيبقى فيه زعل كبير بينا.

قلت له: خلاص يا عم، لو هتعممني بقى يبقى فطار وعشا كمان.

ضحك وقال: إنت في إسكندرية يا ابني يعني أهل الكرم إحنا نشيلوك في عيننا عيب عليك.

ضحكت أنا الآخر وقلت له: نشيلوك؟ لا إسكندراني أصلي. تحركنا من على الصخور بعد أن طلبت منه أن يكمل معي الطريق إلى شقتي ليعرف مكانها وجاء معي وتحدثنا وضحكنا كثيرًا في الطريق، ووصلنا لبوابة المنزل ودعوته لتناول كوب شاي معي في الشقة، لكنه قال: ما احنا كدا كدا هنتقابل بالليل، إطلع انت وريح كدا عشان هقطعك دومينو النهارده مش هخليك تلعبها تاني.

ضحكت وقلت: كل ما أجي هنا تقول كدا وفي الآخر بتخسر وبتدفع حق المشاريب.

وأنهينا الحديث بضحك كثير وذهبت للشقة، وتشتت تفكيري بين الاعتذار لخالد عن عدم تناول العشاء معه لأجلس

وأجد تفسيراً للشيء الذي حدث في صباح اليوم أو أخرج معه لأنسى ما حدث، وبالفعل عندما جاءت الساعة التاسعة مساءً قمت بتجهيز ملابسى الخاصة لبدء الجولة مع خالد وبعد أن انتهيت، وجدت خالد يتصل بي يبلغني أنه قريب من المنزل وأن أقوم بانتظاره أسفل البيت على الناحية الأخرى من الطريق؛ لنركب السيارة الأجرة ونذهب إلى منطقة المنتزه، فقلت له: أنت قريب مني فعلاً ولا عايزني أنزل وهتسييني ساعتين في الشارع. قال بجدية: أنا خلاص قريب منك بص من البلكونة هتلاقيني جاي من بعيد لابس أحمر.

قلت له: ماشي أنا هلبس الجزمة وهبص عليك أهو.. مع السلامة.

وانتهيت من ارتداء الحذاء وفتحت شباكاً صغيراً بجانب الشرفة لأنظر من خلاله على خالد، وبينما أنا أنظر على الناحية الأخرى من الطريق على خالد إذا بها تقف في نفس المكان برداء مختلف وعلى وجهها الصغير الأشقر الذي يوجد به القليل من النمش حول أنفها ضحكة وابتسامة أعرفها جيداً كأنني رأيتها مرات عديدة قبل ذلك ليس مرة واحدة فحسب! فدقت النظر إليها ولكن هذه المرة لمدة أطول وهي تنظر إلي وعيناها الملونتان جاءتا في عيني لا أعرف كيف! رغم أنني أنظر من خلف شباك صغير كان مفتوحاً فتحة صغيرة جداً وكأنها كانت تنتظرنى أفتح الشباك لتبتسم لي، ففعلت مثلما فعلت المرة السابقة وأخذت

هاتفني ومحفظتي ومفتاح الشقة ونزلت مسرعًا جدًا على السلالم لدرجة أنني كدت أن أسقط مرتين وكل مرة أستند إلى الحائط، وعندما وصلت لباب المنزل وخرجت منه أنظر إلى ناحية البحر لم أجدها نهائيًا عكس المرة السابقة التي كانت تقف فيها وتضحك لي! قمت بتخطي الطريق ووصلت للناحية الأخرى وأنا ألتفت يميني ويساري أبحث عنها وأنادي.. ليلي!، إنتي روحي فين.

ولحسن حظي لم يكن عدد الناس كبير على البحر، لكن العدد الموجود ظل ينظر إليّ بتعجب كبير! حتى أنني سمعت أحدهم يهمس لصديقه: هو بينادي على مين المجنون دا؟

كانت هذه الكلمة كالصاعقة على قلبي، فاحمرّ وجهي وشعرت بإحراج كبير جدًا من نظراتهم إليّ وقررت الجلوس بجانب بائع متجول يبيع «الترمس» يقف أمام شقتي يوميًا فاشترت منه، وسألته: بقولك إيه يا حاج من ١٠ دقائق كدا مشوفتش واحدة حلوة كدا كانت لابسه أبيض وواقفه جنبك على مسافة قريبة وبتبص على الشقة اللي فوق دي وبتضحك؟

فنظر إليّ وردّ وملامح القلق على وجهه: بص يا ابني أنا شوفتها بس وأنا بقولها تاكلي ترمس بصت لي كدا ومتكلمتش وضحكت لي ومشيت ومفيش دقيقتين كنت بجهاز طلب لشابين ببص عليها ملقتهاش!

نظرت له بدون حديث وسكت هو الآخر نتعجب من الموقف، فقطع صمتنا خالد: إيه اتأخرت عليك؟

قلت له: لا أنا خلاص اتعودت بقي انك ملكش مواعيد.
قال: طب يلا عشان نركب ونمشي بقى.
نظرت للبائع ونظر إلي كأننا أصدقاء وبيننا سر، حتى لاحظ
خالد هذه النظرات وتعجب ونظر إلينا نظرة مُريبه..
وسألني: إنت بتبص للراجل دا كدا ليه؟ وهو بيص ليك
كدا ليه؟

وقف الكلام على لساني وتوترت وقلت بابتسامة مصطنعة:
راجل مين يا بني اللي ببصله ويبص لي دا؟ هو إحنا واخدين
بعض عن حب وأنا مش واخذ بالي.

ضحك هو الآخر ونسي الموضوع، ووصلنا لأحد مطاعم
الدجاج المشوي وطلبت الطعام وطلبت من الكاشير أن يرسل
الطعام لنا على القهوة التي توجد في آخر هذا الشارع، وكان خالد
يقف خارج المطعم ينظر لي وبتسم، وخرجنا من المطعم ذاهبين
للقهوة والهواء الجميل يملأ الشارع وبيوت الإسكندرية القديمة
كأنها تصدر إلى العابرين في طريقها الراحة النفسية والهدوء،
ومنظر البائعين والزحام ورائحة الأكلات المختلفة وأغاني أم
كلثوم وفيروز المنتشرة في الشارع.. تفاصيل تكاد تجعل المارين
ينامون في الشارع ويعيشون فيه من شدة جمال هذه الحالة، وصلنا
إلى القهوة وجلسنا وطلبت أنا من أحد العاملين أن يحضر لنا
الدومينو، فتعجب العامل وهو يحضرها فمازحته أنا قائلاً: مالك
يا عم مش عايز تجبلنا الدومينو ليه؟

رد ضاحكًا: لا يا باشا منقدروش اللي انت عايزه نجيبهولك.
قلت له: قول لحد يجب لي شيشه عشان اللعب يحلو وأهزم
الراجل دا بمزاج.

بالفعل طلبها وبعد ما ذهب العامل أشعل خالد سيجارته
وبدأنا باللعب والحديث في أشياء كثيرة وضحكنا، وبعد مرور
ساعة وصل الأكل وأكلنا وطلبت من العامل أن يحضر لنا كوبين
من الشاي، فتعجب العامل مرة أخرى وأنا لا زلت لا أفهم السبب
لم أهتم له كثيرًا ظنًا أن ضغط العمل عليه يمكن أن يجعله يتصرف
بغرابة، فشربنا الشاي وأكملنا اللعب كأن لم يحدث شيئًا.

انتهينا من اللعب وانتصرت في النهاية كالعادة وبدأت سلسلة
الحجج من خالد على أسباب الهزيمة، فقلت له: مش هتبطل بقى
يا ابني الحجج دي؟ انت مبتعرفش تلعب أساسًا.

رد ضاحكًا: يا عم والله انت محظوظ أوي أصلًا.

قلت له بسخرية: أيوه كل مرة بكسبك بالحظ مش كدا؟
فضحكنا ونظر خالد لي، وقال: مش هتقولي بردو كنت
بتبص للراجل كدا ليه؟

قلت له: منا قولت لك يا ابني! إنت بتنسي بسرعة ولا الهزيمة
أثرت عليك بقى.

قال: انت مقولتش حاجة أصلًا أنت توهت ومقولتليش فيه

إيه؟

فضحكت ضحكة مصطنعة وقلت: يا ابني ولا حاجة أنت
مركز مع الراجل كدا ليه! هو عملك حاجة.

قال بجدية: أصل أنت مشوفتش الراجل كان يبص لك
ازاي! وتركيزه معاك كان ازاي!

ابتسمت بسخرية وقلت: آه يا بني ما هو معجب انت مش
واخذ بالك.

رد بجدية مرة أخرى: يا ابني أنا بكلمك بجد مبهرش
دلوقتي! هو فيه ايه ماله الراجل دا؟

قلت له: يا عم منا كنت بيصله مشوفتش الكلام دا ليه؟
قال: ما هو كان يبص عليك بعد ما مشيت مش وانت
باصله!!

قلت له: يا سلام!! وانت شوفته ازاي بقي؟
قال: بصراحة كان فيه واحدة حلوة أوي واقفه قدامه وهو
يبص عليك ومش باصص عليها.

قاطعته بلهفة وقلت له: كانت لابسه أبيض وحلوة وعينها
صغيرة وعسلي كدا.

ضحك ونظر بتعجب وقال: الله! مانث مركز أهو وطلعت
بتشوف بضرهك يا ابن اللدينا.

صمْتُ لوهلة وازداد التوتر عليّ وبدأ وجهي في تغيير ملامح
الضحك لملامح الهدوء والاستغراب، وبدأ القلق ينتاب وجه

خالد هو الآخر وبدأ يشعر بأن هناك شيء غريب في الموضوع، وقال بضحك: مالك يا ابني في ايه متتح كدا وساكت، إيه اللي حصل؟ البنت عجباك مش كدا؟

قلت له باهتمام: هي البنت دي كانت واقفه مع الراجل دا من أول ما انت جيت وشفت الراجل ببص لي كدا ولا شوفتها أول ما اتحركنا بس ومشينا؟

قال والتوتر بدأ يظهر عليه من جدية الحديث: لا أنا أول ما جيت وشوفتك كدا مكنش في حد، بس بعد ما اتحركنا بدقيقة ولا اتنين لقيتها واقفة جنب الراجل على اليمين كدا وبتبص علينا لدرجة إني كنت فاكرها بتبص لي وكنت هرجع أكلمها بس لقيتها بتبص عليك ومركزه معاك انت، ومرضتش أقولك لحسن ترجع تكلمها وتأخرنا.

قلت له بجدية أكثر وأكثر: هاه كمل وبعدين حصل إيه تاني ومرضتش تقول عليه يا خالد؟

قال: الغريب إنها كانت واقفه على يمين الراجل والراجل ببص علينا ومش واخذ باله منها رغم إنها حلوة أوي ومش مديها أي اهتمام.

قلت: هاه وبعدين.

قال: الأغرب بقى لما العربية وقفت وانت ركبت الأول وأنا جيت أركب بعدك ببص عليها ملقتهاش ولقيت الراجل ببص على المكان اللي هي كانت واقفه فيه، مش عارف ببص على إيه!

قلت له: كمل كمل، هاه ايه كمان؟

قال: لما ركبنا العربية خلاص وقفلنا الباب والسواق لسا بيدوس بنزين وهيطلع ببص من الشباك وانت كنت مركز في موبايك كدا لقتها بتبص عليك وبتضحك! أنا مش هكذب عليك بس أنا خفت هي ازاي اختفيت ومرة واحدة بقيت قدام الشباك كدا؟

تبادلنا الصمت وكلّ منا ينظر للآخر نحاول استيعاب الموقف جيداً لنعرف السر وراء هذه الحساء، قاطع الصمت خالد قائلاً: هو أنت مخبي عليا حاجه يا محمد ومش عايز تقولها لي؟ أجبته بتوتر: هووو أنااا هخبي عليك ايه يعني؟

قال بهدوء: طريقتك دي في الكلام لوحدها تأكد لي إنك مخبي حاجه وحاجه كبيرة كمان!! يا محمد أنا آه يمكن بشوفك من السنة للسنة، بس إنت بقالك كام مرة مختلف عن قبل كدا فيك حاجة غريبة!. واللي بيحصل دا بياكد لي أكثر إن فيه حاجة غريبة، لو فيه حاجه مهمة احكي لي واتأكد إن كل اللي هتقوله مش هيطلع بره بس أنا حاسس إنك شايل حكايات كثير ومش عايز تقولها.

ابتسمت قائلاً: يا عم متكبرش الموضوع مفيش حاجه خالص، إنت مالك قلبت عاقل كدا من أمتي؟ انت اتغيرت أوي يا ض.

رد بجدية أكثر: أنا بكلمك بجد، انت ليه عايز تهرب من
الرد على السؤال؟

فنظرت له وقلت: سؤال إيه طيب؟

قال: مين البنت الغريبة اللي شوفتها دي وحكايتها إيه
بالظبط؟

بدأت أسرد له ما حدث اليوم أنني رأيته في الصباح بعد
ما تناولت الفطار، ورأيته للمرة الثانية وأنا أنظر عليه من الشباك
بعد مكالمته الهاتفية، وشرحت له بالتفاصيل كل ما حدث وكيف
تعاملت مع الموقف، وقلت له أنها تشبه حبيبتي حتى أنني ظننت
أنها هي من شدة الشبه بينهما، وبعد ما انتهت من حكاية ما حدث
لصديقي خالد وبدأت أنتبه لتعبيرات وجهه وجدت أنه كان مبجلق
العينين وفي أشد درجات التركيز لا ينظر يمينه أو يساره بل ينظر
إليّ فقط ثم بدأ الصمت من جديد لدقائق، وكالعادة خالد يشق
الصمت لكن هذه المره كان بسؤالٍ أفرعني وبطريقه كانت مفرعة
أكثر من السؤال ذاته!

قال وهو يتسم ابتسامة هادئة: يعني اللي شوفناها دي ممكن
تكون عفريته؟

فمازحته بضحكة حتى ننهي هذه الجدية في الحديث قائلاً:
آه خلي بالك لاخليها تجيلك بالليل بقي.

نظر إلي نظرة ثابتة وبنفس الابتسامة الغريبة قال: أهلاً
بالحبايب يا عم محمد.

مازحته مرة أخرى وقلت: هتعمل فيها مش بيهمك ولما تشوفها هتجري.

ضحك هذه المرة بشدة وقال كلمة واحدة: هجري!
وظل يكرر هذه الكلمة ويضحك لدرجة أنني ضحكت على طريقته.

ثم انتهينا من الضحك وانتقلنا للحديث عن شيء آخر للخروج من هذه الحكاية التي باتت مرعبة أكثر منها رومانسية! فسألته عن عائلته وبالأخص والدته لأنني كنت أعتبرها بمثابة أم أخرى بالنسبة إليّ؛ لأنها كانت تطلب من خالد دائماً عندما كنت نتحدث عبر الفيس بوك أن يرسل سلامها لي وأنها في انتظاري أتى في أي وقت للإسكندرية لتعد لي بنفسها المكرونة البشاميل التي أحبها منها، ولم أتناولها من يدها منذ أكثر من عامين لأنني كنت مشغولاً بالدراسة ولم أقدرُ على السفر.

قال خالد: ماما كويسه الحمد لله وقالت لي أسلم عليك كثير دي حتى قالت لي خليه يجي يقعد معانا بدل ما يقعد لوحده كدا في الشقة وتلاقيه مش عارف يعمل أكل لنفسه.

وعقب خالد على كلامه وقال: هاه إيه رأيك بقى تيجي تقعد معايا في الأوضة؟ واهو تاكل كل يوم من إيد أمي، أحسن ست بيت في إسكندرية كلها.

ضحكت على حديثه وقلت: سلم لي عليها بس لما تروح
قول لها أجلي العزومة الحلوة دي للأجازة الثانية، وقول لها إن أنا
بعمل أكل ولا أحسن شيف يعمله.

ضحك هو الآخر وسألني على أحوال أبي وأمي والقط
صديقي واطمئن على أحوالهم، ثم انتقلت أنا بالسؤال عن أخيه
الأصغر منه الذي كان في آخر عام له في الإعدادية، فاشتكي منه
ومن قلة مذاكرته وحبه للسهر والخروج مع اصدقائه فطلبت منه أن
يتصل به هاتفياً لأتحدث معه، لكن خالد سكت لثوان معدودة ثم
أخرج هاتفه وقام بفتح المكالمات واتصل به ووضع الهاتف على
أذنه وبعد ثواني، قال خالد: دا موبايله مقفول تلاقيه فصل شحن
منه ولا تلاقيه مع أصحابه وقافله عشان ما نزعجش سيادته ونقول
له يروح البيت يذاكر.

تخطينا موضوع المكالمة والأسرة وتفرغنا للحديث عن كرة
القدم خصوصاً أن مباراة الأهلي والزمالك كان قد اقترب ميعادها
في ذلك الوقت، وكان خالد مشجعاً للزمالك بينما أنا عاشقٌ
للأهلي وطلب خالد مني أن نشاهد المباراة في الأسبوع القادم سوياً
في مقهى على البحر، كنا نجلس عليه في العامين السابقين، لكنني
رفضت بحجة أنني لن أظل كل هذه المدة في الإسكندرية ولا بد
أن أعود إلى بيتي للاطمئنان على أحوال الأسرة، فبدأ يمازحني
قائلاً: ماتتججش بالبيت والكلام دا، إنت خايف الأهلي يخسر
يعني وأحفل عليك وكدا زي ما بتعمل معايا لما الزمالك يخسر؟

قلت له بسخرية وثقة في آنٍ واحد: الأهلي؟ وينخر من الزمالك!!
ليه إيه اللي جرا في الدنيا، ما تنساش نفسك يا ابني وانت بتتكلم على بطل إفريقيا!

ضحك وقال: بطل إفريقيا على أي فريق غير الزمالك.
ضحكت بشدة وقلت: بالعكس هو بطل إفريقيا بالذات على الزمالك.

واستمر النقاش والجدال في الأمور الكروية أكثر من أي موضوع آخر، حتى وصلت الساعة للثانية صباحًا وتفاجئنا من مرور الوقت بهذه السرعة وطلبت من خالد أن يعود لبيته لتأخر الوقت وأمه قد تكون تحتاج له في أي شيء خصوصًا أن أخيه الأصغر لا يعتمد عليه، فطلب مني أن يذهب معي إلى البيت ليطمئن على وصولي وحتى لا يحدث معي شيئًا في هذا الوقت المتأخر لكنني قلت له: يا عم ماتقلقش هو أنا هتخطف؟ ولا هتوه! دانا اسكندراني أكثر من الناس اللي هنا، ضحك وقال: متبقاش تكلمني بس بعد شوية تقول لي أنا اتسرفت تعالى روحي البيت وهات فلوس.

ضحكنا ومشى كلٌ منا في طريقه، لكنني كنت أريد أن أتمشى في الشوارع وعلى البحر فالجو كان يغريني بجماله فوضعت سماعة الأذن وبدأت قائمة الأغاني الخاصة بي بأغنية «أعطني الناي» للسيدة فيروز وكنت أشعر أنني أذوب بين كلماتها وصوتها في أذني وبين رائحة البحر ولسعة البرد على وجهي، كنت أشعر

أنني في عالم آخر حتى انتهت هذه الأغنية وبدأت «سهر الليالي» وعندما بدأت فيروز تقول «يا يا يا، يا سهر الليالي» وارتفعت الموسيقى في أذني وجدت نفسي أرقص وحدي على الكورنيش ولا يوجد ناس إطلاقاً لكن كانت هناك سيارات كثيرة تمر على الطريق كنت ألمح ضحكتهم وهم ينظرون لي ولكني كنت لا أهتم لسخريتهم بل كنت أنتبه للموسيقى والرقص، لكن في وسط كل هذا رأيته من جديد! نعم رأيته بنفس الابتسامة بنفس تعبيرات وجهها وهي تنظر لي! لكن هذه المره كانت داخل سيارة أجره على الناحية الأخرى من الطريق وكانت تجلس بجوار النافذة لكنها فعلت شيئاً جديداً هذه المرة.. أشارت بيدها يميناً ويساراً كأنها تقول «باي» من خلف زجاج السيارة وأنا أقف بنفس الطريقة مثل المرات السابقة وكالعادة عندما أتخذ خطوة وأتحرك تذهب بعيداً، تحركت السيارة التي كانت بداخلها وأنا ما زالت عيناى تنظر على السيارة من الخلف كأنني أودعها، وعندما التفت خلفي مباشرة إذ فجأة أجد خالد يقف مبتسماً.

فتعجبت وسألته: مش اتفقنا إنك هتروح بيتكوا يا عم
المجنون!

فضحك وقال: دي آخرتها يعني إنك مهونتش عليا أسيبك
لوحدك لحسن تتخطف ولا حد يثبتك!
ضحكت أنا الآخر وقلت له: عرفت مين إن أنا هنا يا عم
انت مخاوي ولا مراقبني ولا حكايتك إيه؟

ضحك أكثر وقال: مخاوي؟ لا بلاش خليها مراقباك أحسن.
وبينما أنا الحديث على طرف لساني أستعد لأقول له أنني
رأيتها من جديد، قاطعني وقال: شوفتها تاني؟ كانت في المشروع
اللي كنت إنت متنح فيه دا مش كدا؟

تعجبت من حديثه وسألته: إيه دا! انت هنا من بدري ولا
إيه؟ إنت شوفتها انت كمان!

قال خالد: أنا هنا من ساعة ما عملت لك باي.
قلت له بلهفة: يعني أنا مش بتخيل! وفي واحدة بشوفها فعلاً
أهو!

رد: مين قال إنك بتتخيل؟ ما انا شوفتها زيك يا محمد.
قلت له: أنا لازم أمشي بكرة من هنا، وأستشير دكتور طاهر
وأحكي له كل دا.

سألني قائلاً: مين دكتور طاهر دا؟
جاوبته: دكتور أمراض نفسية وعصبية، ممتاز وبرتاح معاه
في الكلام.

نظر إليّ وصمت لثوانٍ ثم قال: طب ما تكلمه في الموبايل
وخليك هنا كام يوم كمان!

فكرت لدقيقة وقلت له: معلش يا خالد الكلام فيس توفيس
أحسن عشان في تفاصيل وكلام ما بنعرفش نوصلها في الموبايل.

قال: كدا يعني تيجي وتمشي بالسرعة دي ومنلحقش نقعد خالص غير الكام ساعة دول.

ابتسمت له وقلت: الأيام جايه كثير، وبعدين ما انت بقالك كثير أوي مكلمتينش على الفيس!

ابتسم هو الآخر وقال: ما انت لو بتسأل كنت عرفت ماكلمتكش ليه كل دا!

ضحكت وقلت له: مانت عارف بقى الوزارة والبيت والأولاد شاغلني يا خالد، يلا قولني في إيه متكلمتش ليه الفترة دي كلها! ابتسم وقال: بعدين هتعرف بردو مكلمتكش ليه.

قالت له: ماشي يا عم الحويط، تعالى بقى وصلني الخطوتين دول وتيجي الصبح توصلني المحطة وتودعني والحاجات الحلوة دي.

ضحك وقال: تمام يا افندم.

تحركنا وفي طريقنا للبيت تحدثنا في أمور حجز التذكرة للقطار المكيف والفروق بين درجات القطار حتى وصلنا أمام المنزل وصعدت إلى الشقة وركب خالد السيارة الأجرة وذهب لبيته هو الآخر، وبدأت أجمع ملابسي وأغراضي الخاصة من الشقة وأضعها في حقيبة السفر، وانتهيت من تجميع الأشياء ودخلت إلى الحمام لأغسل يدي وخرجت منه وأكلت شيئاً خفيفاً وذهبت في نوم عميق كأنني لم أنم منذ عام، ولكن هذه المرة رأيت

حبيبتي بنفس الرداء الأزرق بإبتسامتها التي تقتلني شوقاً وحيناً لسنواتنا معاً كانت تقف بعيداً عني وأنا أنظر إليها بلهفة لكن كل ما تحركت نحوها تظل المسافة بيننا ثابتة لا تقل ولا تزيد، وبعد ثوانٍ تحول وجهها المبتسم لوجهٍ حزينٍ وصرفت نظرها عني ونظرت إلى قدميها وهي ما زلت حزينة! فتعجبت من تعبيراتها، وسألتها: زعلانه ليه دلوقتي؟

لم تنظر إليّ ولم ترد حتى بحرفٍ واحدٍ كأنني أتحدث إلى نفسي، فكررت النداء عليها ولكن بصوتٍ هادئٍ: ليلي.. ليلي إنتي سمعاني؟ طب لو سمعاني ردي عليا قولي لي أي حاجة! اكتفت هذه المرة بالنظر إليّ فقط!، ولكن عندما كنت أقرب منها كانت المسافة هذه المرة نقلٍ وأقتربت حتى أصبحت على بعد خطوات قليلةٍ منها وكررت النداء: ليلي! ردي عليّ.

ردت وقالت: نعم؟ عايز إيه!

قلت لها بسرعة وبدون ترددٍ أو تحضيرٍ للكلام: وحشتيني أوي.. بقى معقول ما نشوفش بعض كل دا ولا حتى صدفة! ردت: وتشوفني ليه بقى مانت مع أول بنت حلوة شوفتها بقيت تفكر فيها ونستني خالص أهو.

توترت وقلت لها: بنت! بنت مين؟

أجابتنني: البنت اللي ظهرت لك انهارده ٣ مرات وانت مش عارف هي مين وشكلها عجبك أوي.

ضحكت وقلت لها: إيه دا عرفتي مينين؟ وبعدين انتي مش سييتيني غيرانة ليه بقى؟ وعلى فكرة هي عجبتي عشان شبهك أوي بس.

ضحكت وقالت: شكلك نسيت كلمتي أنا مفيش حد شبهي!، ثم أدارت ظهرها لترحل؛ ولكن ناديت عليها وقلت لها: ليلي! انتي رايحة فين احنا مكملناش كلامنا لسا! انتي مستعجلة دايماً كدا؟ التفتت برقبته وقالت: ما احنا هنرجع تاني وهنتقابل كثير.

قلت والابتسامة العريضة على وجهي: بجد! إمتي؟ ابتسمت الابتسامة القديمة وقالت: قريب.. قريب أوي. وشاورت لي واختفيت من أمامي وأنا ما زلت أنظر إلى المكان التي كانت تقف فيه.

تحول المشهد تماماً ورأيت نفسي واقفاً على متن مركب في وسط البحر وهناك غريق، جثته تطفو على سطح البحر وحوله مركبين إنقاذ قام بانتشال جثته وفجأه اقترب المركب الذي أنا فيه من مراكب الإنقاذ وكانت جثة الغريق مغطاة بقطعة قماش، لكن الهواء وكأنه يقصد أن يعرفني على هوية الغريق وطار من على وجهه وإذا بي أجده خالد صديقي!! وباتت ملامح الصدمة على وجهي واضحة لكل المتواجدين وهو الأمر الذي دعاهم يسألوني عنه، فسأل أحدهم: حضرتك تعرف المتوفي يا أستاذ؟ تلجلجت في الإجابة وقلت: آه دا صاحبي.

وبدأت الدموع تنهال من عيني وازدادت سرعة ضربات قلبي
ولساني عجز عن الرد من شدة الصدمة، حتى أحضروا لي زجاجة
مياه وطلبوا مني الشرب والهدوء؛ ليتمكنوا من معرفة أهل خالد
وعنوانه؛ ليتواصلوا معهم ويسلموهم الجثة ليدفنها بمعرفتهم.

هدأت أعصابي قليلاً وكنا قد وصلنا للشاطئ وكان معي
رجلين من رجال الإنقاذ ومع أحدهم ورقة وقلم يسجل ما أقوله
وأعرفه عن خالد، وأثناء الإدلاء بالمعلومات التي أعرفها عنه
وقعت عيني على وجهه الذي ظهر للمرة الثانية أمامي فوجدته ينظر
لي ويبتسم، فزعتني الموقف وانتفضت من مكاني وأنا أدعك عيني
جيداً وأنظر إليه مرة والثانية والثالثة ولا أجد ما رأيته من دقائق
وأجد وجهه مغطى بالقماشة البيضاء كما هو!! حاول الرجلان أن
يهدأوا أعصابي ويقنعوني بأن ما شاهدته هو خيال ليس حقيقي
وأنه من أثر الصدمة على فراق صديقي وأحضروا لي هذه المرة
كوب ليمون كبير من مقهي على الشاطئ، شربت الليمون وهدأت
نوفاً ما واستمر الرجال في تفسير الأمر الذي شاهدته.. لكن عندما
نظرت للرجل الذي كان يكتب ما أقوله لأول مرة وجدت شيئاً
غريباً! إنه ليس رجل إنقاذ بل إنه بائع الترمس!! نعم بائع الترمس
الذي رأى الفتاة الحسنة، لكن ما الذي أتى به هنا؟ وما علاقته
بالإنقاذ؟ وهو في الأساس بائع متجول عمره يتخطى الستين
عاماً!!

سمعت منه هاتفي، دقت الساعة التاسعة صباحًا، بعد ليلة طويلة وحلمين أغرب من بعض تملأهم الألغاز، فقررت أن أكتبهم في الكشكول الذي أتركه جنبي دومًا قبل النوم لأسجل فيه أحلامي قبل أن أنساها، وبعد أن انتهيت من كتابة الحلم دخلت إلى المطبخ لتحضير إفطار سريع، حضرته ووضعتة على سفرة الصاله وقمت بإحضار ريموت التلفزيون وغيرت في قنوات عديدة للأفلام حتى وصلت لقنوات الأفلام الكلاسيكية القديمة وكانت أحدهم تعرض حفلة لكوكب الشرق وكانت الأغنية «أغداً ألقاك» فقلت في نفسي: يا سلام جيتي في وقتك.

وقمت برفع مستوى الصوت وتركتها وبدأت في تناول الإفطار، وبعد ما انتهيت وأعددت كوب الشاي بالنعناع، أمسكت الكشكول الذي أدون به أحلامي لأراجع التفاصيل التي قمت بكتابتها عندما استيقظت، وجاء تركيزي الأكثر مع البائع صاحب عربة الترمس فقرأت الجزء الذي يخصه في الحلم مرات عديدة، فجاء في عقلي فكرة التأكد من وجوده في الأساس. فقررت أن أفتح الشباك الصغير لأنظر منه وأتأكد، فوجدت العربة في مكانها وهناك رجل يقف ولكن ظهره فقط هو الواضح لي لا أستطيع رؤية وجهه لأتأكد أنه هو! لكن الشخص الواقف أمام العربة هو نفس طول الرجل الذي رآها والذي رأيته أنا في الحلم!، ماذا أفعل الآن؟ هل أنزل لأتأكد بنفسي؟ أم أنتظر قدوم خالد ليتأكد معي؟ لم يمر على الكثير من الوقت للتفكير في الأمر لأنني بالفعل

أخذت القرار وقررت أن أغادر الشقة ومعى أغراضى، وبالفعل غادرت الشقة وقمت بإحكام غلق الباب بالمفتاح وخرجت من المنزل دون أن أتحدث إلى خالد حتى، وعندما ألقىت نظري على مكان العربة وجدت المكان فارغاً!! لا عربة ولا بائع ولا أي شيء على الإطلاق!، ذهبت إلى المكان الذي رأيته فيه وسألت أحد المتواجدين في المكان: لو سمحت ما شوفتش راجل معاه عربة ترمس كان واقف في المكان دا من حوالي ١٠ دقائق كدا؟!
رد: أيوه هو كان واقف هنا بس لم حاجته ومشى من هنا كدا.

شكرت الشاب الذي دلني على الطريق الذي مشى منه وتركت حقيتي معه وطلبت منه أن يحتفظ بها ١٠ دقائق فقط.. وافق الشاب، وبدأت أنا أركض في الطريق الذي أشار عليه الشاب بسرعة كبيرة حتى لمحت العربة والرجل على بعد أمتار قليلة فلحقت به لأنه كان يمشي ببطء، ووضعت يدي على كتفه ليلتفت بوجهه وأجد أنه ليس الرجل الذي رأيته من قبل!! فظننت أنه بائع آخر غير الذي كان يقف أمام الشقة، ولكي لأتأكد من ذلك قررت استدراجه في الأسئلة، فقلت له: إسم الكريم إيه؟

رد: سيد فهمي عبدالعاطي، تؤمرني بحاجة يا أستاذ؟
قلت له بابتسامة وصوت هادئ: هو أنت كنت واقف فين من تلت ساعة كدا؟

رد: كنت واقف ورا شوية عند المرسى بتاع المراكب «أمام الشقة»، في حاجه يا أستاذ؟

جاوبته بابتسامة حتى لا يقلق: لا يا ريس ولا حاجه، أصل أنا متعود آخذ ترمس من العربية دي على طول حتى لسا واخذ امبارح وأول امبارح من الحاج والدك.

ضحك ضحكة بسيطة ممزوجة بسخرية: والدي؟ تعيش إنت يا بيه بقاله سنة.

ظهر تعبير الصدمة على وجهي وسألته مرة أخرى: هو والدك كان عنده دقن بيضا ويلبس شال أبيض زي اللي انت لابسه دا وكان أسمراني أهو ويلبس خاتم جواه فص إسود كدا؟

تعجب الشاب الذي كان يبدو أنه في منتصف الثلاثينات من عمره وقال: الله! دا انت كنت تعرف الحاج كويس بقى، أيوه أبويا كان يلبس زي ما بتقول كدا بالظبط.

ومدّ يده في جيبه وأخرج محفظته وأخرج صورة منها وأعطها لي، وقال: خد يا أستاذ دي صورة لأبويا ألف رحمة ونور تنزل عليه.

مسكت الصورة ويدي ترتجف بها وأنا أبحلق في وجه الرجل؛ لأنني وجدته بيتسم!! انتفضت ووقعت الصورة من يدي، وهو الأمر الذي جعل «سيد» البائع يقول بغضب: في إيه يا أستاذ؟ هو أنا بطلع لك صورة أبويا ومعطل نفسي معاك عشان ترمي الصورة في الأرض كدا؟

اعتذرت له بشدة: أنا آسف يا سيد والله وقعت غضب عني،
معلش.

ابتسم بطيبة قلب وقال: حصل خير يا أستاذ، عايز حاجة
تاني؟

قلت له: معلش هتقل عليك في سؤال أخير هو ممكن
يضايقك بس سامحني أنا بجد محتاج أعرف إجابته ضروري..
هو الحاج «فهمي» والدك مات إزاي؟

قال وهناك مسحة حزنٍ في صوته: بص يا أستاذ أنا أبويا قبل
ما يجيب العربية دي كان مع فرق الإنقاذ اللي بتلحق الغرقانيين
قبل ما يموتوا، أو بيطلع اللي ماتوا وجسمهم اتنفخ وبيبقوا عايمين
على وش البحر كدا واشتغل الشغلانہ المنيلة دي من وهو عنده
عشرين سنة لحد أواخر الأربعينات كدا، ولما تعب وحس إنه مش
هيقدر يساعد الناس مشي من الشغلانہ دي وكان معاه قرشين
شايهم للزمن فقال يجيب العربية اللي قدامك دي واهي شغلانہ
تعيشني أنا وهو وامي، ومن ساعة ما جاب العربية دي وهو حاططها
وبيبع في المكان اللي قلت لك عليه من شويه واللي انت شكلك
جاي من عنده كدا، المهم من سنة ونص كدا كنت أنا شغال في
محل سمك وقتها وبروح الساعة ٩ بالليل وأبويا بيروح الساعة
١٠، أنا روحت واتعشيت وقعدت وحكيت مع أمي والساعة بقيت
١١ وأبويا مجاش فأمي قلقت وقالت لي أروح اتظمن كدا اشوفه
فين لاحسن يكون تعب ولا فيه حاجه، روحت انا على مكان

العربية لقيت أبويا حاطط الفرش على العربية ومقفل الدنيا وراكن
العربية وملقتوش ولا لقيت حد خالص، روح البيت قلت لأمي
كدا قلقت أوي وانا طمنتها وقلت لها زمانه جاي تلاقيه بيحب
حاجه ولا قاعد مع عم فاروق صاحبه على القهوة، انطمنت شوية
وراحت في النوم وانا نمت بعدها بنص ساعة لما اتأكدت انها
نامت بس بردو نايم قلقان أصلها مش عوايد أبويا انه يتأخر يوم
الأحد كدا ولا يخرج مع اصحابه، أنا بس عشان مقلقش أمي،
صحيت تاني يوم الصبح على صوت أمي كانت الساعة ٨ كدا
بتقولي قوم دور واسأل على ابوك، دا عمره ما عملها ويات بره
وهو شاب هيعملها بعد ما كبر كدا؟ انزل يبني الله يبارك لك شوفه
فين.. قمت انا غسلت وشي ولبست وخرجت من البيت على أمل
إني ألاقي أبويا عند العربية ومفيش حاجه، لكن رحت ولقيت
كل حاجه زي ما هي فسألت البياعيين اللي هناك اللي عارفينه
وكلهم ميعرفوش راح فين، زاد القلق عليه يا أستاذ أكثر وأكثر
ومسكت الصورة اللي لسا موريهالك دي وبقيت اسأل الناس اللي
راحه واللي جايه عنه وفضلت أعمل كدا ٣ أيام ورا بعض، وأمي
صحتها في النازل ودمعتها مانشفتش على خدها ولا انا ولا هي
بناكل حاجه عايشين على شوية المياه يا استاذ والله، واليوم الرابع
قلت اشوف أكل عيشي وارجع المحل تاني منا مفيش في أيدي
حاجه اعملها وماعملتهاش، رجعت يا أستاذ المحل وانا مليش
نفس لحاجه خالص والساعة ١ الظهر كدا جالي واحد صياد على

المحل قالي انا روحت لك على البيت ملقتكش والحاجه قالت لي انك هنا، قلت له هاه فيه أخبار جديدة.. قال لي إنت مؤمن بالله ولا لا يا سيد؟ أنا فهمت من طريقة كلامه الخبر اللي كان عايز يقوله، قلت له لا إله إلا الله.. قالي شد حيلك الحاج فهمي لقينا جثته واحنا بنصطاد من ساعة وشكله غرقان من كام يوم ولقينا معاه جثه لشاب صغير على مسافة قريبه منه، شكله يا ابني حتى وهو في آخر أيام حياته كان عايز يرجع لعمله الطيب بتاع زمان وكان بيحاول يطلع الشاب دا فغرق معاه، زادت دموعي وانهارت واغم عليا وسط المحل والناس فوقتني وقالوا لي يلا عشان تجيب جثة أبوك ونصلي عليه ونلحق ندفنه أنت راجل كبير مش عيل صغير، وسمعت لكلام الناس الكبيرة وروحت وديت أبويا على المستشفى عشان أطلع تصريح الدفن واخلص الإجراءات وخلصتها فعلاً، بس واحنا بنشيل جثة أبويا وبنحطها في عربية الاسعاف وحطينا الجثة التانيه جنبها وكانوا الاتنين متغطيين، ودخلوا المستشفى مع بعض والحكاية دي انتشرت أوي في المنطقة كلها واتعرفت أوي.

قاطعته وقلت: ليه هما أول مرة يلاقوا اتنين غرقانيين يعني؟! أكمل حديثه قائلاً: يا أستاذ ما انا جايلك في الكلام أهو انت مستعجل ليه؟ احنا بعد ما خلصنا الإجراءات ودفنا أبويا الله يرحمه سمعنا إن المستشفى بتقول الجثة بتاعت الشاب اختفيت وهو دا اللي شهر الحكاية دي أوي كدا لأن بعد دخول الجثتين بكام

ساعة وعلى ما تعرّفوا على الغريق الثاني اللي مع ابويا واتصلوا على أهله يجوا يستلموا ملقوش الجثة! الجثة اختفيت ومحدش عارف راحت فين، والكلام انتشر في اسكندرية كلها وكرت الحودايت وكلام الناس اللي مابخلصش واللي يقول دا الممرضين باعوا الجثة لطلاب طب عشان يذاكروا عليها، واللي يقول دا الدكاتره كانوا طمعانيين ياخدوا قرنية العين لأنها الحاجة الوحيدة اللي كانت سليمة في جسمه، واللي يقولك دا الجثة اتحركت لوحدها وهربت ومكنتش مرتاحه، وحواديت كتير أوي يا أستاذ محدش عارف الحقيقة فين لدلوقتي بس في ناس قريبه أوي منه كانوا معاه في الكلية بيقولوا إنه بيجلهم يبصلهم ويضحك ويمشي من غير ما يكلمهم، وامه واخوه بيقولوا إنهم ساعات بيشفوه من ضهره واقف في البلكونه ولما يفتحوها ميلقوش حاجه! بس كدا يا أستاذ هي دي حكاية أبويا اللي انتشرت واتشهرت بين الناس.

قلت له: مش ناسي حاجه تاني، مش حاسس إنك عايز تقول

حاجه؟

فكر قليلاً ثم قال: ااه قبل ما اشيل جثة أبويا وانقلها للإسعاف خلعت الخاتم اللي انت شوفته معاه من إيده وحطيته في جيبي، ومد يده إلى جيبيه وأخرج الخاتم وقام بمسحه في الجلباب الذي كان يرتديه، ثم قال وهو يمد يده بالخاتم: اتفضل يا استاذ شوف كدا هو دا ولا؟

مددت يدي إليه وأخذته وتفحصته جيداً وقلت له: آه آه هو.

ثم رددت الخاتم إليه وشكرته على الوقت الطويل الذي أخذته منه في حكاية موت أبيه، وكان على قدر كبير من الاحترام ولم يطلب مني شيئاً وأخذ العربيه وغادر المكان.

بعدما غادر المكان نظرت في الساعة وجدت أنني وقفت مع الرجل ما يقرب من ٤٠ دقيقة، فتذكرت حقيبتى التي تركتها مع الشاب عند الشقة فعاودت بسرعة لأجد خالد يقف بجانب الحقيبة ويقول: بقى كل دا بترغى مع بتاع الترمس وسايب شنطتك! الشاب زهق وسابها ومشى.

ضحكت وقلت له: كويس إنك جيت ولحقتها قبل ما تتسرق، مكنتش دخلت البيت من غيرها.

ضحك هو الآخر وقال: طب يلا ناقص أقل من نص ساعة على ميعاد القطار.

أوقفنا تاكسي ووضعنا الحقيبة في شنطة التاكسي وانطلقنا إلى محطة قطار «سيدي جابر» ووصلنا المحطة وتركت خالد بجوار الشنطة ومعه هاتفى وأشياءى الخاصة وذهبت لأحجز تذكرة للقطار، وحجزت وجلسنا على مقاعد الانتظار حوالي ١٠ دقائق وعندما لمحنا القطار على مقربه من الرصيف ولن ينتظر كثيراً قمنا بتبادل الأحضان والقبلات، وأكد عليّ وقال: المرة الجايه لو ماتصلتش بيا وانت جاي هزعل أوي ومش هكلمك تاني والله.

ابتسمت له وقلت: لا خلاص والله ماتقلقش أنا هاجي قريب تاني وهكلمك أكيد مش هسيبها للصدفة زي المرة دي.

قال: طب يلا ناخذ صورة سيلفي للذكرى، وأخذ هاتفي
واخذنا الصورة وأعطاني الهاتف مرة أخرى وتصافحنا وأعطاني
ظهره وغادر المكان، وصعدت أنا للعربة التي بها المقعد الذي
قمت بحجزه ووضعت حقيبتى فوق المقعد في المكان المخصص
للحقائب، وتحرك القطار بعدها مباشرة.. فوجدت رقم والدتي
على الهاتف في المكالمات التي لم يرد عليها فاتصلت بها
وطمنتها على أحوالي وأن القطار لم يفتني ولحقته وانهيينا
المكالمة، فتذكرت أن أتحدث إلى دكتور «طاهر» لأحجز ميعاد
للكشف في عيادته الخاصة وبالفعل أجريت المكالمة معه، قلت:
ألو، حضرتك عامل إيه يا دكتور طاهر.

رد: الحمد لله يا محمد فينك مختفي بقالك كام يوم.

قلت: أهو يا دكتور بقى كنت في اسكندرية بفك عن نفسي
شوية.

رد: ماشي يا عم ربنا يسهلك أحوالك، مش هتيجي العيادة
نشوف وصلت لإيه بقى؟

ضحكت وقلت: سبحان الله أنا متصل آخذ ميعاد من
حضرتك أصلاً.

ضحك هو الآخر وقال: شوف الوقت اللي يناسبك وكلمني
وأنا هظبط الميعاد مع عم «عزيز».

قلت: خلاص يا دكتور شوف لو بكرا الساعة ٧ يناسب
حضرتك.

رد: خلاص تمام هستناك متأخرش.

قلت: شكرًا أوي يا دكتور، مع السلامة.

وانتهت المكالمة ومسكت بهاتفني وبدأت تشغيل قائمة الأغاني المفضلة لي وبدأت أغلق عيني أستعد للنوم، وبينما أنا أبدأ في النوم وقبل أن أغلق عيني تمامًا رأيتها تمر بجانب مقعدي!! انتفضت من مكاني وانتابني الفزع وكانت قد وصلت للعبوة الثانية فمشيت خلفها ثم ناديت بهدوء وترقب: لو سمحت يا أستاذة! التفتت إلي برقبته وهي تقف مكانها لكن هذه المرة كانت بنت أخرى ليست شبيهة حبيبتني!! وقالت بتعجب: نعم.. حضرتك عايز حاجة؟

اعتذرت لها في هدوء وانسحبت وعاودت أدراجي إلى مقعدي والنوم يملأ عيني، ثم وضعت سماعتي الخاصة في أذني وأكملت قائمة الأغاني، وبالفعل نمت نومًا عميقًا.

استفقت من النوم على صوت الكومسري وهو يقول: يلا يا أستاذ المحطة بتاعتك داخليين عليها أهو، يلا قوم وجهاز حاجتك عشان القطار مبيقفش كثير.

وجهت الشكر للكومسري وأنزلت حقيبتني وجمعت أغراضني الصغيرة ووقفت عند باب القطار استعدادًا للنزول، ولم يمر سوى دقيقة أو دقيقتين ووقف القطار وخرجت منه وغادرت المحطة وأوقفت سيارة خاصة لتنقلني إلى بيتي.

وصلت إلى المنزل وصعدت إلى شقتنا وكان أمي وأبي ينتظراني في صالة الشقة، فتحت الباب وألقيت التحية عليهما بابتسامة كبيرة ثم احتضنتني أمي وقبلتني ومن بعدها أبي ثم جاء القط من غرفتي ركضاً خلفي فرفعته عن الأرض وألقيت عليه التحية هو الآخر، ثم قالت أمي: طبعاً أنت جعان من السفر، أنا عملاك البشاميل اللي بتحبتها.

ابتسمت لها وقلت: آه بصراحة أنا مش قادر هفضي الشنطة وأغير هدومي على ما تخلصي.

وبعد مرور ربع ساعة كنت قد أفرغت حقيبتني، وغيرت ملابسني، وغسلت يدي، وأستعددت للغداء.. وبالفعل نادى عليّ أمي لتخبرني أن الطعام جاهز الآن، خرجت وتناولت الغداء وانتهينا منه وأحضرت أمي لنا الشاي بعد الغداء، وشربناه وتحدثنا عن أمور كثيرة حدثت في خلال أيام سفري للإسكندرية، وقال أبي: القط صحبك تعب يا عم وانت هناك ومش حاسس بيه.

قلت والدهشة على وجهي: إيه دا بجد امتي؟ وعملتوا إيه؟ ابتسم أبي وقال: ما تقلقش أوي كدا ما هو مش صحبك لوحدهك منا اللي بحط له الأكل وصحبي بردو، أنا اتصرفت ووديته للعيادة البيطرية وهما اتصرفوا معاه وعملوا الواجب وبقي زي الفل أهو.

أخذت نفساً عميقاً وأخرجته وأنا أقول: الحمد لله خضتني والله يا بابا.

ابتسم أبي وقال: عارف انت لولا إن القط بتاعك دا وفي
أنا كنت خليته يمشي وانت مش مسافر، بس القط دا غريب طول
مانت مش موجود مكشش بيقوم من على السيرير بتاعك غير للأكل
والشرب والحمام بس، لكن غير كدا يفضل قاعد جوا.
ضحكت وقلت: أيوه ما هو وفي زي صاحبه طبعًا.
قال مازحًا: لا وانت وفي أوي يلا.

ثم دخل أبي ليرتاح قليلاً على سريريه، وفتحت أمي التلفزيون
على القنوات الكلاسيكية التي تعشقها والتي صدرت حبا لي
وقمت أنا لأدخل غرفتي التي أفتقدها وأفتقد جوها كثيرًا، وعندما
دخلت وجدت نفسي أشعر بالخوف لأول مرة ولا أعلم لماذا!،
لكن لم أهتم لهذا الخوف بحجة أن هذا الخوف يبدو أنه من قصة
وفاة «فهمي» صاحب عربة الترمس والشاب الذي كان معه.

قمت بتشغيل أم كلثوم على هاتفي ووضعته بجانبني، وأسندت
رأسي إلى وسادتي التي كنت أفتقدها أيام سفري وأخذني النوم
سريعًا في أحلام كثيرة لا أتذكر شيئًا منها.

استيقظت في مساء نفس اليوم على صوت أمي، وهي تقول:
يلا يا محمد عشان تاكل.

نهضت من سريرتي وخرجت لتناول العشاء وسط ابتسامات
وضحك أبي وأمي مع بعضهم وكان صديقي القط يجلس معهم
وكأنه من أفراد أسرتي يستمع للحديث بانتباه لكن ينقصه لسان
بشري ليتحدث معنا ويحاورنا.

انتهينا وأحضرت أمي الشاي وتفرغنا للحديث عما حدث
معي خلال الأيام التي قضيتها في الإسكندرية، وجاءت أسئلة أبي
وأمي عن ماذا فعلت هناك وهل كنت سعيدًا في هذه الأيام أم لا.
فقال أبي: طبعًا عملت كل اللي نفسك فيه وقضيت لك
يومين حلويين.

ضحكت له وقلت: آه طبعًا طبعًا.

وأنا في داخلي أسخر من حديثه؛ لأنه لا يعلم الأشياء الغربية
الذي حدثت معي هناك.

علقت أمي على حديثنا وقالت: لا دا بيضحك علينا، حتى
كان رايح لوحده من غير أصحابه وتلاقيه رجع بسرعة عشان زهق
وملقاش حاجه يعملها.

رد عليها أبي مازحًا وقال: هو دا بيغلب؟ تلاقيه اتلم على
ناس من هناك وكان بيخرج معاهم بس يا رب يكونوا رجاله بس
مش بنات.

فضحكت على حديثهما وقلت: الله! داننوا بتحفلوا عليا
بقي؟ شكلي كدا هاخذ صحبي (القط) ونروح أوضتنا بكرامتنا.
ضحك أبي وقال: ما هو انت ما قلتش قضيت اليومين دول
مع مين!

قلت له: مع خالد صحبي يا بابا هو أنا بخرج مع حد غيره
هناك!

تدخلت أمي وقالت: خالد محمود اللي بتكلمه كل ما تروح
إسكندرية؟

ابتسمت وقلت لها: ايوااه هو دا.

فطلب مني أبي أن يرى صورة لخالد ليتعرف على شكله،
فأخرجت هاتفي من جيبتي وكانت صورتي أنا وخالد التي مر
عليها عامين أو أكثر خلفية للهاتف وعرضتها هي وصورًا أخرى
عليه فابتسم أبي وهو يشاهد الصور مما جعلني أشعر باستحسان
أبي له، وبعد ثواني أكد أبي ذلك الشعور عندما قال: شكله جدع
وابن ناس.

وعقب على كلامه مازحًا وقال: ويترى الجدع دا عزمك على
حاجه هناك بقى ولا لا؟

فضحكت وقلت: آه دول أهل كرم، عزميني على فرا...
وقبل أن أكمل الكلمة وجدت المشهد يُعاد في ذاكرتي..
كيف كان خالد لديه إصرار ورغبة كبيرة في أن يدفع ثمن الوجبة
وعند الوصول للمطعم لم يدخل معي وطلب أن ينتظرني بالخارج؟
فلاحظ أبي أنني توقفت في الحديث فجأة، فداعبني وقال: الفراخ
كانت فاسدة ومش عايز تخرج صاحبك قدامنا ولا ايه؟
ضحكت ضحكة مصطنعة وقلت: عرفت منين يا حاج؟ انت
مخابرات ولا إيه!

مع كل هذا الحديث أُمي لم تعلق على شيء واكتفت بالصمت ومتابعة الحديث في هدوء، مما جعلني أشعر أنها تجمع تفاصيل الحوار لتصل لشيء ما، ولاحظت زيادة تركيزها عندما توقفت في كلمة «فراخ» وتذكرني موقف خالد، فمازحتها وقلت: مالك يا حابه ساكته ليه؟ بتخططي لإيه كدا.

ابتسمت وقلت: بسمعكوا يا ابني بفرح لما بشوف ضحككتكوا سوا.

نظرة لها بابتسامه وقلت: ربنا يخليكي لينا وتعيشي وتشوفي ضحككتنا.

وانتهى حديثنا ودخل أبي وأمي لغرفتهما ودخلت إلى غرفتي لكن أمر خالد أصبح موضع تفكيري حتى أنني انغمست في التفكير في موقفه هذا لوقت ليس بقليل، وفي النهاية لم أصل لنتيجة غريبة بل كل ما وصلت إليه قد تكون استنتاجات طبيعية! قد تكون سقطت محفظته أو وضع ثمن الوجبة في شيء أكثر أهمية بالنسبة له ورفض أن يفصح لي بشيء حتى لا يشعر بالإحراج، وهو الأمر الذي كان يجعله محرّجاً من دخول المطعم وانتظر بالخارج بحجة أن لديه مكالمة هاتفية.

ارتاح عقلي للنتيجة التي وصل إليها وذهبت لنوم عميق بعد التفكير في أمر خالد، واستيقظت في عصر اليوم الثاني ونظرت لساعة هاتفي وجدتها الثالثة عصرًا فتعجبت! كيف تركتني أُمي كل هذه المدة نائمًا ولم تُوقظني للإفطار حتى! قلقت واعتقدت

أن أبي قد يكون عاد له المرض ويريد هو وأمي أن يخفوا الأمر عني فتحركت من سريري مسرعًا وعيناى ما زالتا لا أرى بهما جيدًا من أثر النوم فوجدت باب الغرفة مفتوحًا رغم أنني أغلقتة مباشرة بعد دخولي للغرفة كالعادة! لكن لم أقف كثيرًا عند هذا الأمر، وقبل دخولي لغرفة المعيشة لأطمئن على حال أبي سمعته يتحدث مع أمي بصوتٍ منخفضٍ وبحذرٍ شديدٍ فدفعني الفضول لأختبئ بجوار الحائط؛ لأعرف السر الذي يريدون إخفاءه عني، وبدأت سماع الحوار الذي كان يبدو أنه في بدايته..

أمي: متأكد إنه نايم ولا حاسس إنه ممكن يصحى دلوقتي ولا بعد شوية! لو صحي هتبقى مشكلة وممكن يجيله صدمة عصبية تاني.. كفاية مرة ما صدقنا بقى كويس شوية.

أبي: لا ماتقلقيش دا نايم خالص، شكله كان سهران.. هاه في إيه؟

أمي: الولد اللي محمد يقول إنه خرج معاه في اسكندرية وعزمه على أكل دا، هو اللي أنا قولت لك عليه السنة اللي فاتت إنه مات غرقان وجابوا صورته على التلفزيون لما جثته اختفت ولا اتسرقت باين وقلت لك حتى ماتقوليش لمحمد كفاية اللي هو فيه، فإكر؟

أبي: ااه يعني إيه الكلام دا؟ يعني ممكن....

قاطعته أمي: استنى بس دا المصيبة إنهم قالوا في نشرة الأخبار إن التحقيقات وصلت لإن الجثة ماخفتش ولا اتسرقت ولا شغل

العفاريت دا، الجثة خال الولد اللي غرق سرقها بمساعدة المسئول عن استقبال الحالات عشان يدفنها بسرعة لأن الإجراءات كانت هتطول وهيفضل في المشرحة والمرحوم كان يا عيني شاب زي الورد لسا صغير.

أبي: يعني إيه! يعني ابني اتلبس واللي ظهر له دا يبقى.....
أمي: الله أعلم.. ما يمكن الحاله اياها رجعت له وافكرها!
واستمر الحوار والاستنتاجات والتفكير بينهما لوقت طويل حتى انتهى بفكرة أبي أنه سوف يحضر شيخاً ليقراً القرآن عليّ ليحصنني من أي مسّ.

كنت أقف على قدمي بصعوبة بالغة وأنا أستمع لهذا الحوار حتى كدت أن أسقط على الأرض من أثر ما خرجت به من حوار أمي وأبي لكن عدت لغرفتي وأنا أستند على الحائط وأمشي ببطء وبحذر دون أن أصدر صوتاً لخطواتي حتى لا يلاحظوا أنني سمعت حوارهما، وصلت لسريري الذي استلقيت عليه بهدوء وبدأت أن أجمع أفكار من جديد وأربط الأحداث ببعضها، تذكرت الكشكول الخاص بي الذي أسجل فيه أحلامي عقب استيقاظي من النوم فنهضت من مكاني وأحضرتة من حقيبة السفر، حيث أنني قد نسيت إخراجه أثناء تفرغ الحقيبة مع البعض من الأغراض الصغيرة الأخرى.. أحضرتة وجلست على السرير ممسكا به وفتحته على الصفحات التي بها الحلم الذي سجلته وأنا في الإسكندرية؛ لأتذكر تفاصيل حلم خالد الذي رأيته يغرق فيه واسترجعت كل

ما حدث في الحلم بالتفاصيل الصغيرة والكبيرة وبعدها مباشرةً تأكدت أن الشاب الذي حكى عنه «سيد» ابن بائع الترمس الذي غرق مع أبيه هو... خالد!! خالد صديقي!!!، وأن رؤية «فهمي» بائع الترمس بملابس الإنقاذ كان لها مدلول!؛ لأنه كانت وظيفته القديمة قبل أن يتركها، وبالنسبة لوجوده بجانب خالد صديقي فكان بسبب أنه حاول إنقاذه!، لكن الأمر المحير الآن هو أنني تحدثت مع خالد وتواجدنا مع بعض في أكثر من مكان! وتحدثت مع «فهمي» البائع المتجول! والأمر المحير أكثر الآن أنهما فقط من رأوا الفتاة الفاتنة التي ظهرت أمامي أكثر من مرة!! ماذا يعني ذلك؟ أن الفتاة التي تشبه حبيبتي هي أيضاً.....

تخلصت من التساؤلات والاستنتاجات، ونظرت إلى هاتفي وجدت الساعة السادسة ونصف وميعادي مع الدكتور «طاهر» في السابعة وأنا ما زلت بملابس البيت! وبالتأكيد سأتأخر عن ميعادي، أجريت مكالمة للدكتور طاهر وأبلغته بأنني سوف أتأخر وأعتذرت له عن ذلك وكان صدره رحباً كعادته وتقبل الأمر دون أن يعرف حتى سبب تأخيري.

فتحت دولابي وأخرجت ملابس لي للخروج ولبست بسرعة حتى لا أتأخر أكثر من ذلك، وأخبرت أمي أن لدي ميعاد مع الدكتور طاهر «نعم كانت تعرف أنني أحتاج لعلاج نفسي وتعرف من البداية أن الدكتور طاهر هو المسؤول عن علاجي النفسي ولا يوجد أي حرج في استشارة طبيب نفسي».

خرجت من منزلي وأشرت لأحد التكسيات وكان السائق يبدو أنه في الخمسينات من عمره، وكان من محبي أغاني الزمن الجميل وكان ذلك واضحًا من وضعه صورة صغيرة لـ «عبدالحليم حافظ» على الزجاج الأمامي للسيارة، ومن أغنية أم كلثوم «سيرة الحب» التي كانت تخلق حالة من الهدوء والاسترخاء، وكان هذا السائق من السائقين القليلين الذين لا يتحدثون كثيرًا.

وصلت للمنزل الذي توجد به عيادة الدكتور وكانت الساعة الثامنة فصعدت مسرعًا إلى أن وصلت للعيادة ودخلت ووجدت «عزیز» مساعد الدكتور يجلس على مكتبه الخاص في غرفة الاستقبال وعلى وجهه الابتسامة المعتاد عليها، وعندما نظر ليرى من دخل العيادة ووجدني أمامه زادت ابتسامته وكأننا أصدقاء قدامى لم نر بعضنا منذ وقت طويل! فابتسمت له أنا الآخر، فقال وهو يصفحني بابتسامة: عاش من شافك يا أستاذ محمد.. أبارك أیه؟

ابتسمت له وقلت: الحمد لله تمام.. عامل إيه انت يا عم

عزیز؟

- الحمد لله في نعمة، بس انت فينك كدا من آخر مرة

كنت هنا والدكتور استأذن يمشي؟

- كنت في اسكندرية يا عم عزیز والله بغير جو شوية.

- حمد لله على سلامتك يا رب تكون قضيت لك يومين

حلوين.

قلت لنفسي بسخرية: آه دول حلوين بشكل.

ثم قلت لـ «عزيز»: آه الحمد لله حلوين.

- الدكتور عنده كشف قرب يخلص ارتاح يا أستاذ محمد شوية على ما يخلص.

- ماشي يا عم عزيز شكرًا.

وجلست على أحد المقاعد الموجودة أمام باب غرفة الدكتور وكالعادة أخذني عقلي إلى مكان آخر، فوجدت نفسي أتذكرها من جديد ولكن ليست الذكريات الجميلة المعتادة بل وجدت نفسي أرى الذكريات المؤلمة!! ولا أعرف لماذا تأتيني هذه الذكريات وأنا لا أبحث فيها من الأساس ولا أريد تذكرها!!، فبرغم أن حبيبي كانت لها الكثير من الإيجابيات ولكن كان لديها سلبيات كأني إنسان يخطئ ويصيب.. كانت عندما تخطئ لا تعتذر كانت دائمًا تنتظرني أنا لأعتذر لها عن أخطاء لم أفعلها!! وإذا لم أفعل ذلك كان من الممكن أن نظل أيامًا كثيرة لا نتحدث فيها ولا نرى بعضنا، وتذكرت بعض مواقفنا السيئة التي كانت تجعلني أنام ودموعي لا تفارق وجهي، لكن قبل أن أتعمق في هذه الذكريات التي لا أحب تذكرها ناداني «عزيز» وطلب مني الدخول للدكتور بعد خروج الحالة التي كانت بالداخل وأنا كنت في حالة أشبه بالنوم لا أرى ولا أسمع أي شيء من حولي، وهو الأمر الذي دفع «عزيز» ليقول: انت تعبان أوي كدا يا أستاذ محمد؟

فأظهرت التعجب على وجهي وقلت: أنا؟ دا اشمعنا يا عم عزيز؟

قال: كل مرة وانت مستني دورك بتقعد سرحان ومابتدراش بأي حاجة حواليك!، دانا ناديت عليك كتير أوي لحد ما سمعتني انت لو مكنتش مفتح عينيك ع الآخر كنت افكرتك نايم والله. قلت له بابتسامه مصطنعة: المشاكل والضغط يا عم عزيز والله.

قال: يلا ربنا معاك، وان شاء الله الدكتور هيساعدك. انتهى حديثي مع عم عزيز بهذه الكلمات ثم تركته واتجهت لغرفة دكتور طاهر واستأذنت الدخول، وكان مشهد دخولي عليه في غرفة الكشف هو نفس مشهد دخولي العيادة بنفس ابتسامات وتعابير وجه «عزيز»، هذه الغرفة أشعر فيها بالاطمئنان بمجرد الجلوس فيها وقبل أي حديث بيني وبين الدكتور حتى! أشعر أنني أريد تبديل كل الطاقات السلبية التي بداخلي بأخرى إيجابية. بدأت الحديث مع الدكتور وقلت: إبنك عامل إيه يا دكتور دلوقتي؟

رد مبتسمًا: لا الحمد لله بقي أحسن من الأول. بدأ الدكتور بإخراج السي دي من غلاف مكتوب عليه «بيتهوفن» ووضعه في الكاست وبدأت موسيقي بيتهوفن

تتسرب إلى كل أرجاء الغرفة لتملأها بالدفء والأمان وتشجعني على الحديث.

صمت معتاد لبضع دقائق.. شق الصمت الدكتور عندما طلب مني أحكي ماذا حدث في الأيام السابقة منذ آخر لقاء لنا في العيادة.

بدأت بالحديث قائلاً: أنا شفت حاجات غريبة! مش لاقى ليها تفسير واضح مش فاهمها من الأساس.. أنا شفت واحدة شبه حبييتي بالطبط وشوفت صاحبي اللي ميت من سنة واتكلمت معاه!، وشفت واحد بتاع ترمس وكلمني وكلمته وطلع هو كمان ميت!! هما دول عفاريت؟

ابتسم وقال: كمل وبراحة واهدى انت ليه قلقان..

قلت: أنا شوفتها وانا ببص من الشباك ولما نزلت كانت لسا واقفه على ما عديت الطريق ملقتهاش! وشوفتها مرة ثانية راكبة ميكروباص وبتعمللي باي وهي بتضحك! ومرة تالته وانا اللي راكب الميكروباص وهي بره في الشارع وبتضحك لي بردو!!.. وصحبي خالد! بقالي سنة مكلمتوش واتفاجئ وانا قاعد على البحر بيخبطني على كتفي ويسلم عليا وبيتفق معايا على خروجه وخرجنا وكلنا وحتى وصلني لمحطة القطر و....

الدكتور: وإيه؟ حصل ايه هناك؟

- وطلب مني نتصور صورة للذكرى واتصورنا عندي على موبايلي.

- طب ممكن أشوف الصورة!

أخرجت هاتفي ودخلت إلى الصور وكانت المفاجأة.. أنا فقط الموجود في الصورة!! وعندما ظهرت آثار الدهشة على وجهي طلب مني الدكتور أن يرى الصورة فأعطيته الهاتف ليراها، فابتسم ابتسامة خفيفة وهز رأسه ووضع الهاتف أمامه على مكتبه، وطلب مني أن أكمل ما بدأته..

- أنا كنت بتعامل معاه وبشوفه عادي جداً وبكلمه زي ما بكلمك دلوقتي!! وكمان أنا شوفته في الحلم وهو غرقان وشوفت الراجل بتاع الترمس وهو لابس ملابس الانقاذ وقاعد في المركبة اللي عليها جثة خالد صحيبي! مكنتش فاهم إيه العلاقة بس عرفت بعد كدا إن دي كانت شغلته القديمة قبل ما يشتري عربية الترمس.. في إيه يا دكتور؟ توقفت عن الحديث في محاولة لتمالك أعصابي واستمر دكتور طاهر على هدوء لدقائق، ثم قال: أنا عايزك تبقي أهدى من كدا، إنت كويس جداً ومفيش حاجه.. إرتاح وهدى أعصابك. وأكمل حديثه وقال: تفتكر الأصوات اللي كنت بتسمعها في الأوضه بتاعتك من فترة واللي أنا متأكد إنك ما زلت بتسمعها! انت ضحية لدوشة كبيرة جواك، ومش انت لوحدك اللي بتسمع الأصوات دي.. لأ دا في ناس بتسمعها عشرات المرات في اليوم وفي تصور إن الأصوات دي زي ما قلت لك قبل كدا بتعبر عن

الحاجه اللي نفسك فيها ومش لاقى حد ينفذها لك وعقلك
الباطن بيخلق الأصوات دي عشان يريحك وفي تصور تاني إن دا
ممکن يبقى حوار مع نفسك مثلاً وفي تصورات كتير في موضوع
الأصوات دا..

ثم صمت الدكتور لحوالي دقيقتين وكأنه يعطيني فرصة
لاستيعاب حديثه وتحليله للأمر، ثم استكمل: أنا بفكرك
بموضوع الأصوات دلوقتي عشان اللي انت شوفته ممكن يكون
تطور من الموضوع دا.. وانت عشان شخص عاقل ومثقف هتقدر
توازن بين الحقيقة والخيال «التهيؤات» بين الواقع والوهم
بين المنطقي والغير منطقي، وكل مرة بتدخل صراع الأصوات
دا بيكون اختبار واقعي ليك عشان تعرف قدرتك في مدى
سيطرتك على نفسك وتحكمك فيها لأنك لو مقدرتش تعمل كدا
هتقع في فخ الشيزوفرينيا اللي هي «الفصام».. لو الأصوات دي
اختفت بالتدريج من حياتك لما تلاقي الشخص اللي تفرغ معاه
احتياجاتك ويكملك هترجع أحسن من الأول في كل حاجة بس
لو ملقتش الشخص دا هتبقى فريسة للنداءات الوهمية وهفضل
غرقان في بحر الكلمات اللي بتتقال لك من مصدر مش معروف
وهفضل محبوس جوا أوضتك ونطاق تفكيرك هيفضل يصغر
لحد ما يوصلك للدرجة اللي هتحس فيها بإنك بقيت مشلول!
ومهما صرخت كل صرختك مش هتخرج منك ومش هتبقى أعلى
من الصوت اللي بتسمعه دايمًا بيناديك.

ثم عاد صمت الدكتور من جديد ليعطيني مساحة لإدراك حديثه، قلت: يبقى إحساس صعب أوي لما تبقى مشوش من كتر الأفكار والصراعات اللي جواك، ويبقى أصعب وأصعب لما تتمكن منك وتسيطر عليك، ساعتها بس بيكون الحل إنك تنسحب وتبدأ تعمل لنفسك عالم لوحدك في خيالك انت بس عشان تهرب من كل الضغوط اللي انت فيها.

قال الدكتور: والنتيجة؟ النتيجة إنك بتبقى مش مهتم ولا مدرك بأي حاجة بتحصل برا العالم بتاعك ودا بيقلل ويضعف قوة تركيزك اللي تكاد تنعدم، مع كسور في الذاكرة وشوية وهتחס نفسك برا الدنيا وهتبدأ تعيش في عالم كله تهيؤات.. ومش هتقدر تكمل! اللي بتفكر فيه غلط حاول تعيد تفكير فيه تاني وفكر في اللي قلته ليك.

- تمام يا دكتور، وبالنسبة للي حصل لي في إسكندرية؟
- انت كل ما بتنزل إسكندرية بتكلم مين أو بتقعد مع مين؟
- خالد الله يرحمه ومبقعدش مع غيره ولما كنت أروح هناك وأنا مخنوق مكنتش أكلم غيره.
- وقعدت أد إيه ماتكلموش؟
- سنة أو سنة ونص!
- طب وهو من الطبيعي لما اتنين اصحاب زيك انت وخالد واضح انكم تعرفوا بعض من فترة مش قليل وكمان

بتحكي له اللي مضايقتك وأصحاب أوي كدا إنكم ما
تتكلموش كل دا؟

لم أعط الدكتور أي رد ولكن كنت أحاول أن أفهم ما يريد
توصيله لي من هذه الأسئلة، وكان عندي اعتقاد أن الدكتور طاهر
هذه المرة لن يفيدني بشيء بل يحاول إضاعة بعض الوقت..

فاستكمل حديثه وقال: ظهور صبحك وخروجك معاه
وحكايتك له عن البنت اللي شوفتها نفس فكرة الأصوات اللي
بتسمعها.. ظهوره مجرد تهيؤات أو عقلك خلقه في الوقت اللي
انت كنت محتاج حد تكلمه ويسمعك وتخرجوا مع بعض والدليل
على كدا أكثر من حاجه لما روحوا مثلاً تتعشوا سوا مدخلش
يحاسب رغم إنه كان من المفروض إنه عازمك! والصورة مثلاً
اللي المفروض انكم مع بعض فيها وفجأة لقيت نفسك لوحداك
فيها كل دا من نسج خيالك، وبالنسبة للراجل بتاع الترمس والحلم
اللي انت حلمته.. دا كان تنبيه وإشارات عقلك بيعتهالك بطريقة
غير مباشرة عشان يفوقك ويوصلك رسالة موت صاحبك وأنت
استجبت ليها بس استجابتك كان ماليتها الخوف كنت بتدور ورا
حقيقة الحلم وخايف تتصدم بالحقيقة اللي انت كان عندك شك
فيها اللي هي عدم وجود خالد صاحبك من الأساس!. انت اكيد
كنت تعرف الراجل بتاع الترمس دا او شوفته قبل كدا وكلمته قبل
المرة اللي فاتت دي لأنه مش هيطهر لك في الحلم كدا ويكلمك
من غير تعاملات بينكم ولو لمرة واحدة قبل كدا...

نظرت إلى سقف الغرفة ورجعتُ بذاكرتي لعامين أو عامين ونصف منذ أن كنت في الإسكندرية المرة قبل الأخيرة، وبالفعل الدكتور كان معه حق، لقد تحدثت مع هذا الرجل من قبل عندما كان يتحدث عن «النادي الأهلي» بعظمه مع أحد أصدقائه البائعين وتدخلت في حوارهم وتحدثنا ربع ساعة تقريباً ومن يومها وأنا ألقى السلام عليه كلما مررت من أمام عربته..تذكرت هذا ونظرت إلى الدكتور وعيناي ترمش أريد أن أقول له أن كل ما قاله صحيح وأن اعتقادي في أول الحديث كان على خطأ وكان يجب أن أتمهل في الحكم على أي شيء.

قاطع تفكيري الدكتور وقال بابتسامه: سكوتك ونظراتك ليا بتقول إن فعلاً كان في كلام بينكوا أو كنت تعرفه قبل كدا؟
- أيوه أنا فعلاً تعاملت معاه قبل كدا! يعني أفهم من كدا إنه مش عفريت والكلام دا؟

ضحك وقال: كويس إنك وصلت لوحدك وعرفت إن ولا في عفاريت ولا أي حاجه من الكلام الفاضي دا.. هي الفكرة كلها إنك محتاج ترتبط وتتجاوز وتكون أسرة عشان كل الحاجات دي تبعد عنك، انت مش صغير يا راجل دا انت فوتجرافر أد الدنيا لازم ترجع شغلك وتعيش حياتك الطبيعية عشان كل الأوهام دي تبعد عنك.

ضحكت وقلت: تمام يا دكتور.. طب ومين اللي ظهرت دي؟ أنا متكلمتش معاها خالص ولا قربت منها بس أنا كان عندي اعتقاد إن هي كمان....

قاطعني وقال: عفريتة واحدة ماتت وكدا، صح؟ لا هي مش حاجة من دول.. هي فعلاً ممكن تكون إنسانه حقيقية ودا احتمال مش قوي بنسبة كبيرة آه بس وارد! لكن الاحتمال الأقوى إن البنت تكون زي خالد صحبك بردو تطور للأصوات دي، وأنا قلت لك الحل في كل دا!

لحظات من التفكير، قلت بعدها: بس دي شبه حبيبتني، شبهها أوي! طب أنا هعمل ايه لو ظهرت لي تاني؟ أبعد ولا أقرب؟ قال: احنا لسا مش عارفين حقيقتها هل هي فعلاً هتبقى موجودة في الواقع؟ ولا موجودة بالنسبة ليك انت بس اللي شايفها؟. أما بالنسبة لحكاية الشبه مفيش فيها قلق عادي ممكن تلاقي ناس شبهك وناس شبهني دا أمر طبيعي، بس أنا بارجح إنها مش هتظهر تاني وهتطلع زيها زي خالد وزى الراجل بتاع الترمس يعني مجرد هلاوس وهتروح بالعلاج .

دقيقة من الصمت مرة أخرى ثم قال: طب انت في عندك أي حاجة تاني بتشتكي منها ولا تعباك؟

- النوم.. مابعرفش أنام بسهولة ولا قادر أظبط مواعيدي بسبب الفكر بتاع كل ليلة في كل حاجة، تمام..

- وإيه تاني غير النوم؟
- ولا حاجه هو النوم والصداع.
- كدا كدا من الطبيعي إن يجيلك صداع عشان مواعيد نومك مش مضبوطة، وانا هكتب لك على نوع مهدأ كويس هيريح جسمك وهيساعدك على النوم، وتاخده في المواعيد اللي أنا كاتبها بس.

الفصل الثالث

بين الواقع والخيال

«إذا خانك تفكيرك بأنك تستطيع شرب نهر من أول
رشفة.. فعليك إكمال الكوب إلى آخره».



أخذت الروشته من دكتور طاهر وخرجت من العيادة وأنا أضع كل ما قاله أمامي وأفكر فيه، وأثناء عبوري للطريق وأنا أنادي على أحد التاكسيات لم أنتبه للطريق وإذا بإحدى السيارات تأتي من مسافة بعيدة بسرعة، وأنا أراها وأشهد سرعتها، وأقف في مكاني رغم صراخ من المارة على جسدي الذي أوشك أن يُحطم! لا أعرف إذا كانت رغبتني أن تصدمني السيارة أم عقلي غير قادر على التحكم في جسدي ليحركه بعيداً!. وجاءت لحظة الاصطدام المنتظرة التي كانت شديدة الألم، نعم أتذكر المشهد ومقدمة السيارة تصطدم بي وأنا أنظر إليها لدرجة أنها قذفتني على بُعد ليس بالقليل، أتذكر مشهد المارة من حولي والدماء تلتخ صدري ووجهي، والناس من حولي يصرخون ويحاولون تحريك رأسي بهدوء؛ ليتأكدوا إذا كنت على قيد الحياة أم فارقتها، مرّت أمامي هذه الأحداث وأنا ما زلت في وعي، ومن ثم بدأت عيني تغيب عن الوعي تدريجياً وسط محاولاتي المستميتة لفتحهما، ولكن كانت صدمة السيارة قوية للغاية.

بدأ شريط حياتي يعاد أمامي.. أرى أمي وأبي وأسمع ضحكاتهما وأتذكر حديثنا في الأيام السابقة وأرى دكتور طاهر وحديثنا منذ دقائق يعاد منه بعض التفاصيل وأرى... أرى خالد! نعم خالد صديقي يناديني ويمد يده ويقول: تعالى يا محمد إنت واحشني، هو أنا موحشتكش؟

قلت له والدموع على وجهي: وحشتني أوي يا صاحبي.. أنا جايلك، بس أمانة عليك لو اتأخرت خلي بالك من الغالين اللي عندك.

بينما أنا في آخر لحظات حياتي أشعر بها في غرفتي في المستشفى وأشم رائحتها التي لا أتوه عنها أبداً تملأ المكان، أرى الغرفة وكأن عيني مليئة بالغشاوة وأراها معي برؤية ضبابية في الغرفة تقف أمام الباب وعيناها مليئة بالدموع وأسمع دقات قلبها تتزايد أكثر فأكثر.

قلت بصوتٍ يملأه الحزن يمتزج باللهفة وعيني بها دموع الفرح ووجهي يحاول الابتسام:

- ليلي! انتي عرفتي ازاي إن أنا هنا؟ وجيتي ليه في وقت متأخر زي دا! أنا كويس ماتخافيش، امشي دلوقتي الوقت اتأخر عليكى برا.

ردت وملامح القلق والحزن تغمر وجهها: مش مهم عرفت ازاي! انت ليه مسمعتش كلامي وليه منفذتش وعدك ليا؟ انت مش وعدتني إنك هت حافظ على نفسك عشاني؟

نظرت إليها بشفقة ولا أجد كلمات لأرد عليها لكنها لم تنتظر ردًا وبدأت بالاقتراب مني وأمسكت بيدي ويا لها من راحة كنت أفتقددها، لم أشعر بها طوال فترة فراقنا، بمجرد حضن يدها ليدي شعرت أنني أمسك العالم بيدي وأنها أزاحت كل أوجاع الدنيا عني..

وجدت نفسي أقول لها وهي تمسك بيدي: عارفه.. أنا ما أكلتش مرة في بعدك وشبعت للآخر، ولا نزلت مرة وسط الناس وما دورتش على ملامحك في وشوشهم، ولا نمت يوم من غير ما أقوم قلقان أفكر فيكي وفي اللي عيشناه سوا، دايماً كان فيه جزء ناقص، شيء مش مخلي الدنيا كاملة في عينا، آه عايش لكن عايش ب نص حياة..

لم ترد على كلماتي لكنها شدت على يدي وابتسمت ودموعها ما زالت على وجهها لا تفارقها!

أكملت حديثي: حاسس إنك مش بعيدة عشان استناكي! ولا انتي معايا عشان أفرح بوجودك جنبي ولا انتي حرمانني منك عشان أفكر بس إني أنساكي.. أنا ساعات ببقى حاسس إن انتي معايا وساعات مش معايا دايماً في نص كل حاجة.. ودايماً محتاجك جنبي.

ردت هذه المرة ولكن ب قبلة على جيبيني، ثم وجدت الباب يفتح وإذا بي أجد والدتها التي كانت لا تعرف شيئاً عن قصتنا وكانت بها ملامح القلق وكأنها تعرفني وبيننا أحاديث سابقة،

فتملكني شعور مزيج من التعجب والفرح! معنى أنها قلقة بشأني وأتت لزيارتي إذا ليلى أثرت عليها وحدثتها كثيراً عني لدرجة أنها أتت في هذه الساعة المتأخرة من الليل للاطمئنان على أحوالي!
قالت السيدة «سلمى» والدة حبيبتي: انت كويس يا ابني؟
مش تخلي بالك من الطريق وانت ماشي.

قلت لها وأنا أبتسم: الحمد لله يا طنط جت سليمة، أنا مبسوط إنني شوفتك واتعرفت عليك.

ابتسمت هي الأخرى وقالت: انت راجل يا محمد وفيه حاجات كتير هنتكلم فيها بس لما تقوم بالسلامة كدا وتخرج من هنا الأول.

كان حديثها استكمالاً لشفائي فكان بمثابة مسكن أقوى من كل أنواع المسكنات، شعرت وأن كل شيء أصبح يبتسم لي، وكل ما مرّ من وجع سينتهي ويذوب مع كل الذكريات المؤلمة.

مرت دقائق ووجدت باب الغرفة ينفتح عن آخره وأمي وأبي يسرعان بخطواتهما تجاهي ويحتضناني وهما يبكيان، وكعادة أبي يداعيني ويقول: يلا قوم البس عشان نروح بيتنا ولا صحبك مش واحشك؟ هتعمل تعبان يعني! دانت صحتك جت على الحادثة يلا بلاش دلع.

ضحكت أنا وكل الموجودين وقلت: حاضر انت روح البيت وهتلاقيني حتى قاعد على السرير أنا وصحبي اللي زمانه دلوقتي قالب البيت عليا وفاكرني مستخبي منه.

وفي وسط الضحكات والفرح دخل دكتور طاهر علينا الغرفة بالورود والشيكولاته يبستم في وجهي ويقول: حمدالله على سلامة الفنان.

ابتسمت له وقلت: الله يسلمك يا دكتور.

وقمت بتعريف المتواجدين في المكان على بعضهم، وبعدها بدقائق دخلت الممرضة لتغيير المحلول ولتطلب من المتواجدين أن يخلوا المكان لإراحتي بعض الوقت من مجهود الحديث والمناقشة معاهم والصوت العالي مِمَّن حولي، وبالفعل خرج الجميع وأخلوا المكان من حولي.

مرَّ وقت ليس بالقليل على تواجدي في المستشفى، وخرجت وأنا أستند على عكاز لأحاول ممارسة حياتي الطبيعية الذي أصبحت الآن سعيدة بوجود حبيبتي مرة أخرى جانبي.

دخلت المنزل وأنا أسمع صوت هاتفي لأنظر إليه وأجد حبيبتي هي من تتصل بي وكانت المكالمة يملأها الشوق لسماع صوتها ولهفتي لحديثنا كسابق عهدنا..

- وحشتيني.

لم ترد ولكن سمعت صوت ضحكتها التي كنت أتمنى الموت لأسمعها.

- مش هتردي يعني؟ لا يبقى أقفل بقي.

- لأ استنى، وحشتني أكثر..

أبي: بيتهيا لي العروسة كلنا عارفنها من زمان، مانت مفضوح
وبتحبها من إعدادي وكنت كل يوم تحكيلنا عنها وإنك نفسك
تتجوزها.. صحيح كنا بنتريق عليك أنا وأمك وبنقول عيل صغير
وبيتكلم في حب وجواز بس انت كسفتنا احنا الاتنين وانتصرت
في الآخر وطلعت راجل تشيل مسؤولية بيت.

قلت ضاحكاً: إيه دا انتوا متفقيين عليا بقى! وعاييزني
اسييلكم البيت واضح إني خانقكم أوي!

قال أبي مازحاً: أيوه يا محمد انت خانقنا وعاييزينك تمشي.

قلت: طب مش تاخذ رأي العروسة الأول؟

ضحك وقال: وأنا هستناك تقول لي كدا مثلاً؟ منا خلصت كل
حاجه مع مامتها في المستشفى بس كنا مستنينك تقوم بالسلامة.

غمرت قلبي السعادة وقلت في لهفه: بتتكلم جد والله؟

قال: أمال ههزر معاك؟ أمال احنا جايينك ليه من أوضتك

يا ابني.

قلت: طب هاه امتي؟

ماما: واضح إنك مستعجل أوي يا أستاذ.

قلت ضاحكاً: يعني من إعدادي لدلوقتي وتقول لي واضح

إنك مستعجل؟ دانا ههظفها لو ما اتجوزناش أنا وهي وهيبقى

انتوا السبب.

ضحكت أمي وقالت: لا وعلى ايه يا مجنون! أنا خدت رقم مامتها وهكلمها وهنروح نقعد احنا ستات مع بعض نشوف أراء أهل البنت وأعرفهم عليك أكثر وعلى شغلك وشهادتك وكل حاجه عنك، وأشوف إذا كانوا راضيين ولا لا!

قلت مازحًا: هيوافقوا طبعًا هيلاقوا عريس أحسن مني فين يعني يا ست الكل؟

مازحني أبي وقال: أنا لو من أهلها موافقش بصراحة، مش عارف البنت ومامتها بيحبوك ليه!

قلت: انت بتحقد عليا يعني؟ ماشي ماشي.

انتهينا من حديثٍ دام لوقت طويل، ثم استأذنت للنزول بحجة أنني سوف أقابل بعض الأصدقاء القدامى لكن حقيقة الأمر أنني كنت ذاهبًا إليها حسب اتفاقنا أننا سوف نعوض كل شيء.

تقابلنا عند موقف السيارات وركبنا إحدى السيارات الأجرة المتجهة إلى مكاننا المفضل «وسط البلد» والذي يحمل تقريبًا أغلب ذكرياتنا الجميلة في السنوات التي قضيناها سوياً، حيث اتفقنا أن ندخل أحد الأفلام الأجنبية في سينما من سينمات وسط البلد، ركبنا وجلسنا إلى جانب بعضنا ووضعت سماعات الأذن واحدة في أذني والأخرى في أذنها وأعطيت لها الهاتف لاختيار الأغاني والمقطوعات الموسيقية التي تريدها وأنا على ثقة تامة أنها ستختار ما أريد أن أختاره أنا وبالفعل بدأت بتشغيل الأغاني الهادئة لـ «فيروز» وبعض من مقطوعات البيانو الحزينة..

ساعة ونصف من الهدوء إلى أن وصلنا لمكان السينما حتى أننا كنا نرتدي السماعات في طريقنا أثناء السير في الشارع ونحن متشابكي الأيدي، ودخلنا قاعة السينما وفي أحداث الفيلم كنا نتفاعل لدرجة أن الدموع كانت تنزل من أعيننا دون الشعور بها وعند ملاحظة أحداً للآخر وهو يبكي كان يضحك عليه واستمر الوضع على ذلك إلى نهاية الفيلم، وخرجنا والسعادة تملأنا نتمنى أن الوقت يقف عند هذه اللحظة.. يقف ولا يتحرك نهائياً فما زالت القلوب تحتاج أن تشبع بالمزيد من البهجة والذاكرة تحتاج أن تُملاً بالذكريات والأوقات السعيدة والروح تشتاق الإحساس بالراحة التي كانت تفتقدها منذ وقت كبير..

كان الوقت يحكمنا كعادته وكان أماننا ساعة واحدة فقط للرجوع لمنازلنا ولا نعرف كيف نقضيها بأي شيء سنفعله سويًا سيكون له طابع خاص ومبهج لنا!، لكن بعد تفكير قررنا أن نظل هذه الساعة المتبقية في الشوارع لا نفعل شيئاً سوى أن نتمشى في الشوارع ونشاهد الناس والأطفال وكل تفاصيل الشارع، حتى توقفنا أمام إحدى القصور التي كانت صاحبة تراثٍ قديم من حيث الإنشاء أو الشكل الخارجي له ودار بيننا حديث حول أمانينا ونحن ننظر إلى عظمة هذا القصر.

- عارفه أنا كان نفسي أوي أكون عايش في زمن القصر الجميل دا وتكوني معايا في نفس الزمن ونتجوز ونعيش في الشيء العظيم دا.. يااااه بجد لو دا كان القصر بتاعنا.

- آه ونعيش بقى زي الملوك وطباخ يعملنا الأكل
والجنائني يزرع الجونية ويقص الشجر والشغالات
يصحونا من النوم وتبقى علاقتي بيك إني بقعد معاك
على السفرة أفطر ومنشوفش بعض في اليوم إلا ساعة
ولا ساعتين وباقي اليوم انت في شغلك وأنا في شغلي
مش كدا؟ طب دي تبقى حياة! هيفدنا بيايه كل دا واحنا
مش بعض.

- آه دا واضح إن الأفلام مأثره عليكى أوي.. هو لازم
عشان نعيش في قصر زي دا يبقى عندنا شغالات
وخدم يعملولنا كل حاجة ونقوم من النوم نفطر كروسون
ونشرب شاي بالبن وميقاش في حياتنا حاجه بقى غير
الشغل والأكل والشرب ونيجي آخر اليوم ننام ويبقى دا
روتين حياتنا، وفي الأجازة ناخذ الولاد ونروح النادي
نسيبهم يلعبوا وانتي تقعدي مع فريدة هانم وأنا اقعد مع
مراد بيك وبعد ما كل واحد يخلص قعدته نقوم نركب
عريتنا ونمشي وفي الطريق نفضل ساكتين انتي نايمه مع
الولاد وأنا بشرب سيجارتي وبسوق.. مش كدا؟

- إيه دا انت كنت بتتفرج معايا على نفس الأفلام؟
- يا حياتي أنا حافظك أكثر من نفسك!! أنا لما بقول
نعيش في قصر زي دا يعني نبقي احنا فيه بس وهيبقى
عندنا بواب للحراسة مش أكثر، واصحى كل يوم على

صوتك وانتى بتقولي لي يلا يا حبيبي عشان جهزت
الفطار وامتأخرش على شغلك، فأقوم واقولك صباح
الخير يا حياتي وننزل من الأوضه بتاعتنا على السفره
على طول واحنا إيدينا في إيد بعض، ونخلص فطارنا
وننزل على الجونينه نسقي الورد والشجر مع بعض ونغرق
بعض بالمية واقطف وردة واحطها في شعرك وندخل
البيت تاني واحنا فيه متغرقين ومتبهدين ونغير اللبس
بتاعتنا ونلبس عشان الشغل وننزل واخذك معايا في
العربية وطول الطريق نشغل الأغاني اللي بنحبها، وتنزلي
انتى على شغلك وأروح أنا على الشغل بتاعي وكل يوم
اعدي أخذك ونروح البيت نقف في المطبخ نعمل
الأكل مع بعض ونبهدل الدنيا ونضطر ناكل الأكل اللي
احنا بوظناه ومعرفناش نعمله بس مضطرين بقى عشان
جعانين، ولما نخلف والولاد يكبروا ويوصلوا لمرحلة
المدرسة بقى وتصحينا انتى كلنا وتجهز لنا الفطار وننزل
نوصلهم لحد الباص بتاعهم وبعد كدا بقى نروح احنا
شغلنا، ونتجمع كلنا ناكل مع بعض بقى بالأكل بتاعك
اللي ميتاكلش دا.

- وانا اللي كنت لسا هحب فيك واقولك اني ظلمتك وكنت
فاهمه غلط!، أكل مين يا حبيبي اللي ميتاكلش انت

أصلاً جربته يعني؟ عارف مش هخليك تجربته خالص
وشوف بقى مين هياكلك بس.

- لا لا خلاص دانتي أكلك اللي أنا مجربتوش دا أحسن
أكل في الدنيا ولا أحسن شيف يعمله.

- لا يا حبيبي خلاص ابقى قضيتها أكل من برا منا أكلي
ميتاكلش!

- يا حبيبي احنا بنتخيل والله خلي خيالك واسع شوية،
وبعدين الجمال دا كله يعمل أكل وحش؟
- مميمم أيوه كدا.

واستمر الحديث أكثر من ذلك حتى وصلنا لنصف ساعة
كاملة ونحن نقف أمام عظمة القصر ونتخيل أننا نملكه ونعيش
فيه.

مشينا في الشوارع الأخرى حتى وجدنا أنفسنا على مقربة من
مراسي المراكب النيلية ووجدتها مثل الأطفال تمامًا تجري تجاه
هذه المراكب وتطلب مني أن نستأجر واحدة لفسحة نهريّة قصيرة،
قالت وهي تركض مسرعةً وتسحبني من يدي: الله أنا بقالي كثير
أوي مركبتش مركب في النيل، وتقعد تلف بيا كثير، وانزل إيدي
ألمس بيها الميه، وانتصور وانا واقفه والنيل ورايا.

قلت وأنا أركض خلفها: طب براحه بس متجريش وهعملك
اللي انتي عايزاه.

أخذتها واستأجرنا أحد المراكب وكنا نحن الاثنان فقط
وصاحب المركب الذي كان شعره الأبيض يملأ رأسه ولحيته..
وكانت أغاني «عبدالحليم» تشق الصمت الذي كنا فيه، حيث
كنا ننظر إلى بعضنا بخجل ولا ينطق أحدهنا بكلمة واحدة كان كل
ما نفعله نبتسم لبعضنا وكأننا أغراب لا نعرف بعضنا وكل منا
يريد أن يلفت انتباه الآخر، ولكن عندما قال «عبدالحليم»: «على
قد الشوق اللي في عيوني يا جميل سلم..»

مازحتها: إيه يا جميل مش ناوي تسلم ولا هفضل ساكتين
كدا؟

نظرت إلى يديها وبدأت حُمره الخجل المفرطة تظهر على
وجهها ولم ترد بل اكتفت بابتسامة.

قلت لها وأنا أضحك: يا حبيبتى سيك من شغل الكسوف دا
مش حلو عشانك والله.

- ليه بقى؟ مش بنت انا يعني ولا انت بتكلم واحد
صحبك؟

- مش أنا قلت لك قبل كدا انتي غير أي بنت وانك مينفesch

تقارني نفسك بيهم؟ ولا كمان كلامي بيتنسي يا هانم؟

ضحكت وقالت: أبداً يا سي محمد دانا قاصده أقولك كدا

عشان اسمع كلمتين حلويين بس.

- برافو ممثلة هايلة، يا ترى مبسوطه بقى ولا لا؟

- طول ما احنا مع بعض انا مبسوطه مش مهم احنا فين او مع مين المهم وجودك معايا وجنبي.
- يارب نفضل مع بعض دايمًا ومتفرقش بينا حاجه ابدًا، ثم عقبته على كلامي وقلت: شوفتي بابا وماما عايزين يجوزوني واحده كدا من جيرانا بس بصراحه هي حلوه.
- شكلك كدا عايز تترمي النهارده في النيل وهيبقى يوم مش فايت على دماغك يا محمد.
- وانا مالي هو انا اللي بقول دا هما!!
- آه وانت مبسوط أوي! وبعدين انت عرفت مين انها حلوة؟ دا انت مركز معاها بقي.
- أنا؟ لا دا عشان بس بشوفها وانا طالع ووانا نازل فيبص عليها غصب عني.
- غصب عنك آه.. والمفروض بقى أصدق؟ واضح انها عجبك روح لها.
- أنا موافق.
- قالت وكانت عيناها بدأت بالاحمرار وعلى وشك البكاء: أنا عايزه أروح دلوقتي، ممكن؟
- ضحكت أنا وقتها وقلت: يخربيتك انتي صدقتي؟ أنا بهزر معاكي! جارتني مين دي ولا غيرها اللي أبص لها وانتي معايا؟ هو في حد يبقى معاه القمر دا وعينه تروح يمين ولا شمال؟ وكمان

بابا وماما قالوا لي قبل ما انزل النهارده انهم كلموا مامتك وتقريبًا فتحوا كلام معاها في موضوعنا، وماما ممكن تيجي تزوركوا في البيت قريب عشان تشوف رأي أهلك ولو كدا أنا وبابا وعمي هنيجي ونخلي كل حاجه رسمي.

بدأت تعابير الحزن التي كانت على وجهها تتحول لضحكات وابتسامات وبدأت دموع الفرح تهرب من عينيها والكلام يتلثم على لسانها، وقالت: إيه دا؟ طب ازاي.. انت انت بتهزر عشان تضحكني بعد اللي انت قلته، صح؟

- لا والله، هو دا اللي حصل فعلا.

- يعني بجد هنتجوز؟ يعني خلاص هتبقى ليا لوحدي!
هشوفك كل يوم وهنعيش مع بعض في بيت واحد
وهنحكي حكايتنا للناس كلها وخلاص قصتنا هتظهر
للنور؟

- خلاص يا حبيبي كل اللي احنا حلمنا بيه من واحنا
لسا صغيرين هيتحقق، وهنعوض كل الوحش اللي مرينا
بيه وهنعيش في أمان وهعملك كل حاجه عشان اشوف
ضحكتك الحلوة دي.

- عارف يا حبيبي.. انت كل حاجه بتمنها من الدنيا دي
كلها مش عايزه حاجه غيرك انت.

- وانتي نور حياتي من الأساس، لما بتضحكي لي بشوف
الدنيا تضحك لي ولما بتبقى غايبه عني بشوف كل حاجه

من غير ملامح وكل حاجه من غيرك ملهاش طعم.. لما
بشوف الدنيا وانتي جنبي بيبقى ليها طعم ثاني بحس
بحلاوة الدنيا وانا شايفها بعينيكي.

- انا بظمن وانا معاك، بحس انك شبه بابا الله يرحمه انا
اه معشتش معاه كتير لانه مات وانا صغيرة لكن فاكره
نظراته ليا وهو بينصحني وهو خايف عليا بشوف نظراته
دي فيك اوي.

- انتي بتأكدي لي يوم بعد يوم ان انا قدرت احافظ عليك
وعلي حبنا كل السنين دي، ومعني انك بتشبهيني بوالدك
الله يرحمه بيبقى انا كدا نجحت ونجحت اوي كمان.

- ايوه لازم تنجح طبعًا، ياريتهم كلهم زيك..

قلت ضاحكًا: لا لا مش للدرجه دي يعني! انا مش خارق
انا واحد عادي وأقل من العادي كمان بيحب حبيته ونفذ وعده
ليها وخلاص ناقص حاجه بسيطه وهيتجوزها.

- مش كفايه بقى تقليل من نفسك؟ انت مش واحد عادي
خالص!! انت شخص مميز.

- مش يمكن ابقى مميز بالنسبالك لوحدك وللناس القريبه
مني لكن في العموم شخص عادي!

- وانت عايز ايه ثاني! مش كفايه انك مميز بالنسبالي انا؟

- لا دا كدا حلو أوي.. أنا ميهمنيش رأي حد فيا كفايه
أوي انك تبقي راضية عني ومعايا.

- مممم والرواية بتاعتك اللي انت كنت بطلت تكتبها
عشان «الفصل الأخير» مش عارف تجمع أحداثه في
دماغك!!

- أيوه يا حبيبتي بس أخيراً الرواية بتاعتنا هتكمل، وكل
اللي أنا وانتي مرينا بيه هوثقه في «الفصل الأخير» منها
وهتبقي انتي البطلة بتاعتها.

- بطلة! بطلة إيه انت لسه مصمم على موضوع البطلة دا؟
- طبعاً ومين يستاهل دور البطلة غيرك! أنا الرواية بتاعتي
حقيقة يبقي لازم تكون البطلة بتاعتها من الواقع؛ عشان
اللي هيقراً يقدر يتخيل كل اللي عيشناه سوا ويتخيل
نفسه مكاناً.

- نفسي كل الناس يعيشوا حاله زي اللي أنا فيها معاك.
- قلبك الطيب والحنينه اللي فيكي دي بتخليني أحبك كل
يوم حب فوق حبي ليكي، بيخليني أتمسك بيكي أكثر
وأكثر.

ملست بيدها على شعري وهي تنظر في عيني وابتسامتها
ترسم جمالها على وجهها، وبمجرد لمستها شعرت أنني في عالم

آخر وكأنني أحلق في السماء وقدماي لا تلامس الأرض وكسرت كل قوانين الجاذبية! كان إحساسًا لا نشعر به إلا كل وقتٍ بعيد..
- أنا أول مره أحس بالسعادة اللي أنا فيها دلوقتي دي! انتي ازاي كدا؟ وخلييني مبسوط كدا ازاي!

- السعادة اللي انت فيها دي مش أنا السبب فيها! انت السبب فيها، أفعالك معايا وكلامك ليا بيخلوني طايره من الفرح وعائز أفرحك بأي شكل ممكن.

- طب ربنا يقدرني وأقدر أفرحك أكثر وأكثر وميجيش اليوم اللي تندمي فيه على حبك ليا.

قالت ضاحكة: أندم؟ أنا عمري ما اندم عليك انت بالذات، دا انت خلاص بقيت الترمومتر بتاع مزاجي تزعل بزعل تفرح بفرح.. حالتني متوقفة عليك انت وعلى مزاجك.

وفي هذه اللحظة تدخل صاحب المركب وقال: الوقت اللي انت مأجره خلص يا أستاذ، تحب تأجر وقت كمان وهعمل معاك واجب المرة دي..

ردت هي وقالت: شكرًا الوقت اتأخر، مرة تانية بقي.

- ايه دا دا حنا اتأخرنا فعلاً وزمان مامتك قلقانه عليكي دلوقتي، يا رب بقي منلاقيش زحمة في المواصلات عشان نوصل بسرعة.

خرجنا من المركب ومشينا نستكمل ما كنا نقوله حتى محطة المترو التي كانت غير مزدحمة بالمره وركبنا ووصلنا إلى أقرب المحطات لنا وخرجنا منها وكان موقف السيارات به سيارة وحيدة وينقصها كرسيان فقط وكأنها تنتظرنا، تحركت السيارة من أمام المترو ونحن نضع السماعات وفيروز بصوتها الجذاب تطربنا وهي تقول: «شاييف البحر شو كبير كبير البحر بحبك، شاييف السما شو بعيد بعد السما بحبك» كنا نسمعها ونحن نسند رأسنا إلى رأس بعض وكالعادة يأخذنا النوم إلى أن وصلنا لبلدتنا. تركنا السيارة ومشيت هي أمامي ولحقتها حتى وصلنا إلى منزلها الذي كان لا يبعد عن منزلي كثيرا والتفتت بوجهها كالمتعاد وابتسمت وهي تشير لي بيدها قبل صعودها درجات المنزل فابتسمت لها من بعيد وذهبت أنا الآخر في طريقي للمنزل، لكن سمعت صوت نجاة الصغيرة تقول «القريب منك بعيد» فتوقفت لأعرف مصدر الصوت حتى عرفت أنه من المقهى التي بجانب منزلي فنظرت للساعة في هاتفي وكانت قد وصلت للحادية عشر ونصف فقررت أن أجلس النصف ساعة الأخرى على هذه المقهى؛ لأستمع لعظمة أغاني الزمن الجميل مع العواجيز الممسكين «بالشيشة» وهم يستمعون مثلي تماما ويحركون رأسهم ويغنون مع الأغنية وهم يلعبون «الطاولة» - وهي اللعبة المفضلة لحبيبتني والتي كنت أريد تعلمها - فجلست بجوارهم لأسمعهم وهم يلعبون ويغنون ولأتعلم منهم أيضا، طلبت من أحد

العاملين كوب من الشاي وشيشة مثل المتواجدين واستمر الحال ساعة ونصف ليس نصف ساعة فقط كما كنت أريد من شدة إعجابي بجمال الحالة التي أشعر بها في هذه المقهى القديمة بكل التفاصيل الموجودة، لكن وجدت أمي تتصل على هاتفي لتطلب مني أن أعود للبيت لأن الوقت قد تأخر وهي تريد الاطمئنان على أحوالي قبل أن تنام. وبالفعل تركت المقهى وذهبت إلى منزلي وكانت أمي تنتظرنني، وقالت ضاحكة: حمد لله على السلامة، كل دا مع أصحابك بردو؟

شعرت من طريقتها أنها قد عرفت أنني كنت مع «ليلي» وليس أصدقائي كما قلت لها قبل النزول، قلت ضاحكا: الله! مانتي فاهمة أهو انا كنت مع مين، لازم تخرجيني يعني.

- مانت اللي مقولتش من الأول، من إمتي وانت بتخبي عليا وانت خارج معاها.

- وانتي حد بيعرف يخبي عنك حاجه بردو!! دايمًا قفشانني كدا.

- كلت حاجه بره ولا أحضر لك العشا؟

- نامي انتي أنا هاكل أي حاجة خفيفة وأكلمها شوية وأنا.

- ماشي بس هتحمكي لي بكره عملتوا إيه مش هتهرب مني زي كل مرة.

ضحكت وقلت لها: لا هحكيلك هحكيلك، يلا انتي بقى
عشان سهرتي كدا.. تصبحي على خير.

- وانت من أهله، واتجهت لغرفتها.

دخلت إلى غرفتي لأرتدي ملابس البيت ووجدت صديقي
القط نائمًا على سريري وعندما وضعت قميصي على السرير شعر
بوجودي واستفاق من نومه ونظر لي وجلس في مكانه، وعند
دخولي للمطبخ لتجهيز العشاء جاء خلفي وقفز إلى الطاولة التي
توجد في المطبخ وجلس فوقها ليسليني حتى انتهيت من كل شيء
ووضعت له طعامه قبل أن أتناول عشائي.

انتهيت من كل شيء وغسلت يدي ودخلت إلى صالة البيت
فوجدتها اتصلت على هاتفي خمس مرات، فاتصلت بها أنا..

- ألو، لو سمحت الرقم دا اتصل بيا ٥ مرات ممكن أعرف
مين؟

- أنا معجبه.

- طب مش هنتعرف بيكي يا معجبة؟

- أنا ليلي ومعاك في نفس الشارع واعرفك من إعدادي
ويقولوا انك بتحبني من إعدادي تقريبًا!

- مين دا؟ أنا؟ لا الحقيقة أنا معرفكيش عشان أحبك.

- لا والله!! طب ما نتعرف.

- معلش والله مينفعش أنا مرتبط وبحب حبيبتى.

- ممممم لا بتعرف تصد كويس بس يا ريت تكون بتعمل كدا فعلاً.
- على أساس إن المعجيين كثير وكدا؟
- أيوه كثير ، انت بتضحك عليا يعني بكلمتين! لا أنا عارفه كل حاجه بقى على فكره.
- وحشتيني.
- إحم إيه دا فيه إيه؟ ما احنا كنا لسا مع بعض من ٣ ساعات بس.
- كثير عليا الساعتين ونص دول.. بس خلاص هانت ونبقى مع بعض على طول.
- يا رب بس متزهقش مني بعد كدا وتبص بره.
- منا زهقت من دلوقتي أهو أنا لسا هستنى بعد كدا!!
- كمان؟ دا واضح إن في حد هيموت النهارده.
- استنى يموت إيه بس، نتجوز الأول ونشوف الموضوع دا بعد كدا.
- ثبتني أوي، مانث مش بتعمل حاجه غير إنك بتثبتني.
- طب عشان نكون على نور كدا من الأول، انا هتجوزك وهتجوز بعد كدا اتنين كمان.
- لا وتجوزني ليه بقى يا حبيبي ما كفايه عليك الاتنين.

- ما هو انتي هتبقي ست البيت وهما موجوديين عشان يريحوكي بس.
- أيوه كلام الأفلام والمسلسلات اهو بقى، لا يا حبيبي أنا لوحدي اللي هتجوزك ولو فكرت بس مجرد التفكير في الحاجات دي هموتك وانت عارف اني مجنونه واعملها.
- طب واهون عليكى؟
- مممممم مانت اللي عايز تخوني بقى.
- يا حبيبتى اخونك ازاي بس؟ أنا عيني مابتشوفش حد غيرك والله، انتي مش عارفه إن أنا بهزر.
- خلاص هعديها لك المرة دي.
- اتبسطي بخروجة النهارده بقى ولا؟
- طول ما انا معاك أنا مبسوطه حتى لو قاعدين في الشارع مش مهم.. المهم إنك جنبي.
- طب عشان الكلام الحلو اللي بتقوليه من الصبح دا بقى.. هقولك على مفاجأة حلوه.
- مفاجأة إيه؟
- أنا هكلم ماما عشان تيجي عندكم تفتح كلام رسمي وكدا وبعدها هاجي أنا وبابا وعمي ونتفق ونقرأ الفاتحة ونحدد ميعاد الفرح وكل حاجه.
- انت بتتكلم بجد فعلاً ولا بتهزر كالعادة؟

- والله فعلاً بتكلم بجد هقول لماما تيجي عندكم يوم الجمعة الجايه دي كمان مش هنستنى تاني.
- طب، طب استنى عشان...
- لا مش هستنى عشان أي حاجه خلاص هو دا آخر كلام وهتيجي الجمعة يعني هتيجي الجمعة.
- أنا مش مصدقه نفسي! يعني ناقص يومين بس ونبدأ كل حاجة تبقى رسمي فعلاً!!! طب أنا كدا مش هلحق أظبط البيت واروح الكوافير واعمل حاجات كتير ورايا، استنى الأسبوع الجاي.
- يا حبيبتى كوافير إيه وحاجات كتير إيه! انتي زي القمر من غير حاجه خالص، وبعدين دي ماما بس اللي جايه يعني مش لازم كل اللي هتعمليه دا، متعبيش نفسك!!
- لا مينفعش دي أول مره تيجي عندنا يعني لازم أكون حلوه كدا ومجهزه نفسي لكل حاجه.
- مفيش فايده، هتفضلي طول عمرك عنيده.
- سييني بقى أنا فرحانه دلوقتي وطايره من الفرحة كمان.
- حقك تفرحي مانتى العروسه ومين قدك دلوقتي.
- طب يلا عشان ننام يا عريس بقى عشان ورايا حاجات كتير يا دوب الحق أعملها اليومين دول.
- هههههههههه ماشي يا حبيبتى يلا تصبحي على خير.

- وانت من أهله يا حبيبي.

انتهت مكالمتنا وذهبت إلى غرفتي أمسكت بكتاب كنت أقرأه واستكملت قرائتي لحوالي نصف ساعة وغلبني النوم فتركته على المكتب وأخذت صديقي بين ذراعي وذهبنا إلى سريري ووضعته جانبي وملست على رقبته حتى أغمض عينه وأغمضت عيني أنا الآخر وذهبنا في نوم عميق..

استيقظت في ظهر اليوم التالي وأمي تدعوني للإفطار وكنت على غير عادتي مؤخرًا وكان عندي استعداد لتناول الطعام بكل راحة وسعادة، وكيف أكون حزينًا أو ممتنعًا من الطعام وملذات الحياة بعد أن عادت لي من جديد؟

قالت أُمي: بقالك كثير مابتفطرش معنا ونفسك مفتوحة ومبسوط كدا! شكل الخروجه امبارح مع أصحابك كانت حلوه وفتحت نفسك أوي.

فهمت ما تلمح له وقلت ضاحكًا: آه والله دا أصحابي امبارح خلوني ضحكت واتبسطت أوي.

تدخل أبي في الحوار وقال: أصحابك ااه، كنت معاها امبارح وانت وماما بتتكلموا كأني مش فاهم يعني؟ لا دا انا اللي مربيك وعارف كل حاجه.

قلت له: طب ماما مش المفروض تروح يوم الجمعة تفتح كلام معاها وكدا؟ أنا اتفقت معاها إن خلاص ماما رايحلهم وقلت لها تعمل حسابها وتقول لمامتها.

قال: متستعجلش يا عريس أوي كدا.

قالت أمي: لا سيبه يفرح هو هيتجوز اللي بيحبها كل يوم يعني؟ هي فرحة العمر ربنا يسعده.
قلت لأبي: شفت ماما فاهماني ازاي! وآه أنا مستعجل بصراحة ومش قادر استنى تاني.

قال: طب خلاص ولا تزعل نفسك، أعتبر ماما هتروح الجمعة الجاية زي ما انت اتفقت مع ليلي.

قمت من مكاني وقبلت رأسه ورأس أمي وأنا في غاية السرور.. ولكني ولا أعلم ما أنا فيه الآن حلم أم حقيقة؟ هل من الطبيعي أن يتبدل الحال في يومين؟! هل الحادثة التي كانت على وشك أن تودي بحياتي إلى الهلاك أصبحت سبب النعيم والسعادة التي أعيش بها الآن!! هل يعقل هذا أن كل ما حلمت به يتحقق في فترة قصيرة جداً وبسرعةٍ أبداً ما كنت أتوقعها حتى في أشد الحالات التي كان يملكني فيها الشعور بالأمل والتفاؤل؟ أم ما أنا فيه الآن مكافأة من الله على صبري وتحملي كل هذه الفترة الطويلة لـ الآلام والعذاب وقلة النوم والتعب النفسي والجسدي الذي كان كالحمل فوق رأسي حتى كاد أن يحني ظهري من شدته؟ كنت في وقتها لا أعرف إجابات كل هذه التساؤلات التي كنت أريد بأي شكل معرفتها ليرتاح عقلي من التفكير، فأنا من النوع الذي يبحث خلف كل شيء حتى ولو كانت نهايته غير مرغوب فيها..

- التفاهم.. احنا تقريبا متفاهمين في كل حاجة! يعني انتي قبل ما تقولي الحاجه بحس باللي هتقوليه وبقى مجهز الرد عليكى، هقولك يعني عارفه أنا لو اديتك الرواية تكتبي الفصل الأخير وتكلميه انتي بأسلوبك أنا متأكد إنك هتكلميه زي ما في دماغي بالضبط.. ومش بس الرواية! لا دا كل حاجه يعني فاكره انا وانتى قولنا كام مرة نفس الكلام مع بعض في صوت واحد؟ أنا شايف إن التفاهم دا عامل حالة عظيمة بينا مخلينا قريبيين من بعض أكثر وأكثر.

- طب أكد لك كلامك بقى؟ والله قبل ما تنطق كلمة التفاهم دي أنا كنت هقولها لك..

- شوفتي بقى! مش بقولك التفاهم بينا دي بيخلي العلاقة أحلى وأحلى، يلا احكي لي عملتي إيه؟

- بص يا سيدي يوم الأربع عملت الشقه كلها وجهزتها وخذت مني اليوم كله بس نزلت عشان أجيب بقى الأكل اللي مامتك بتحبه عشان ماما قالت لازم طنط تتغدا عندنا.

- إيه دا وعرفتي منين بقى الأكل اللي ماما بتحبه؟

- مانت قولت لي من زمان! انت فاكرني بنسى زيك؟

- أيوه صح.. هاه والنهارده عملتي ايه؟

تغمرنى فاليوم سوف يكون بداية تحقيق ما أنتظره منذ زمن،
وبدأت نظرات الضحك والسعادة تملأ المكان ورائحة الفرح
تعطر المكان، وكعادة أبي لا يترك فرصة للمداعبة أو موقفاً ما
يحدث مني أمامه ليبدأ بمداعبتي..

فقال: إيه يا محمد النشاط اللي انت فيه دا على الصبح؟
لا متعودناش على كدا في آخر أيامك معنا لاحسن نجيبك من
شقتك كل يوم تشيل الفطار وتحضره لنا على السفرة كدا.

قالت أمي: أيوه ما هو عريس النهارده بقى.

قلت: حتى انتي يا ماما؟ ماشي ماشي.. أنا غلطان يعني اني
عايز أشيل عنك شويه يااه مكنش العشم يا أم محمد لا.

ضحكت وقالت: تشيل عني شويه إيه؟ انت عشان مبسوط
بس اني رايحة لعروستك النهارده.

قلت: إيه دا يا ماما مالك متوصيه بيا النهارده كدا ليه؟

قال أبي: لازم تتوصي بيك يا عريس دا انت العريس حتى.

ضحكت وقلت: ماشي ماشي عارف إنك فرحان فيا.

ضحك وقال: مش انت مستعجل يا حبيبي على الجواز

أوي!! استحمل بقى.

قلت لأمي ضاحكاً: الله الله! ما تشوفي قصده إيه بالكلمة

دي، شكله كدا يقصدك والله أعلم.

نظرت أُمي لأبي وقالت: آه صحيح قصدك إيه بالكلمة دي؟
شكلك انت وابنك هتناموا برا النهارده.
ضحكت أنا كثيرًا وأنا أنظر لأبي وكأنني انتصرت عليه في
معركة مثلاً.

فقال لأُمي: كدا؟ كدا بتشمتي الواد فينا! ماشي متشكرين.
وانتهى حوارنا المعتاد الذي دائماً ما يملأه الضحك
وخصوصاً في هذه الفترة بعد حديث بيننا حول زيارتها لبيت
حبيبي وكانت تتجاوب معي في كل شيء كنت أقوله لها..
مر الوقت ببطء شديد حتى وصلت الساعة السادسة مساءً
وهو الوقت الذي حددنا فيه ميعاد زيارة أُمي وأعدت أُمي نفسها
للزيارة جيداً وقبل أن تفتح الباب لتذهب، قلت لها: يا ماما والنبي
واقفي على أي حاجه وعائزك تحكي لي كل حاجة حصلت هناك،
وخلي بالك من طنط سلمى مامت ليلي يعني خليك صريحة معاها
وقولي لها كل حاجه عني وأي طلبات عائزنها أنا مستعد وجاهز
ليها..

ضحكت وقالت: يا واد مترميش نفسك كدا ومتخافش انا
عارفه انت عائز إيه وهعملك كل اللي انت عائزه، فاهمه إنك
بتحب وواقع على الآخر.

قال أُمي ضاحكاً: صدقت أم كلثوم لما قالت «أهل الحب
صحيح مساكين» يا مسكين انت.

ضحكت أُمِّي وغادرت المنزل متجهَةً إلى منزل حبيبتِي، وأنا دخلت إلى غرفتي واتصلت بـ ليلي في الحال لأبلغها بأن أُمِّي قد غادرت المنزل وهي الآن ذاهبة إليها.

كنت أجلس وأنا أنتظر أُمِّي تأتي من هُناك وأنا مثل طالب الثانوية العامة الذي كان يذاكر طوال العام وأجاد الحل في الامتحانات وينتظر النتيجة التي سوف تحدد مصيره..

مرت ثلاث ساعات وسمعت جرس الباب فانفتحت من مكاني على أمل عودة أُمِّي بالأخبار السارة التي سوف تجعلني لن أنام الليل من فرحتي، ولكن حدثت نقطة التحول عندما فتحت الباب ووجدت.. وجدت خالد! نعم نعم خالد صديقي الذي من المفترض أنه مات منذ أكثر من عام..

مد يده ليصافحني وهو يقول: مبروك يا أطيّب صاحب في الدنيا.

وكانت هذه الكلمات هي الأخيره قبل أن أشعر بالدوار والصداع الشديد وأشعر بجسدي يُلقى على الأرض ويمر أمامي كل شيء حدث بدايةً من زيارة حبيبتِي ووالدتها في المستشفى وكل حديثنا الذي مر في الفترة السابقة ومرورًا بـ لقائنا ودخولنا للسينما والرحلة النيلية وحديث أُمِّي وأبي معي نهايةً بـ جرس الباب ومنظر خالد صديقي وهو يقف يبتسم ويمد يده ليصافحني..

عاد المشهد من جديد نفس السرير نفس الممرضه التي تبدل المحلول نفس الغرفة نفس كل شيء سبق ورأيتّه، وبدأت

أفتح عيني وأغلقها مرات متتالية وأرى أمي وأبي برؤية ضبابية جداً لم يلحظها سوى الممرضة التي كانت تبذل المحلول وقتها، قالت: يا جماعه بدأ يفوق ويفتح عينيه اهو الحمد لله شكله فاق من الغيبوبة!!

كانت كلمة «غيبوبة» تنزل مثل الصاعقه على قلبي وأنا أحاول استيعاب الأمر وأقول لنفسي:..

«يعني إيه؟ يعني إيه غيبوبه؟ طب و... طب واللي انا عيشته وشوفته دا كله يبقى إيه؟ كان حلم؟ كان تهيؤات؟ كل التفاصيل اللي شوفتها وعيشتها دي كانت ايه؟ كانت وهم؟ طب والفرحة اللي أنا كنت فيها! كانت من خيالي! أنا بس اللي عيشت كل دا وشوفت كل دا؟ طب ازاي! دا أنا اتكلمت مع.. مع بابا وماما وحببتي ومامتها والدكتور طاهر والسواق والناس في السينما و... وخالد.. خالد!!».

قلت هذه الكلمات في نفسي بعد أن أدركت أن كل الأحداث التي عيشتها كانت مجرد هلاوس وتهيؤات من آثار الغيبوبة ولم يطل الوقت الذي استفتقت فيه حتى عدت مرة أخرى للغيبوبة من جديد وكان آخر مشهد رأيته وأنا أحاول فتح عيني أمي وأبي وهما يمسكان بالمصاحف ويقرآن فيها وأعينهما تفيض من الدموع..

نعم عدت للغيبوبة من جديد لكن هذه المرة لم أر حببتي ولم أر أي شيء مما قد رأيته في المرة السابقة؛ لأنني رأيت الفتاة التي كانت تشبه حببتي في مشهد مختلف تماماً وخارج حدود

الغرفة والمستشفى بالمرّة، حيث أننا كنا نجلس على مقاعد حديقة وكان من حولنا الناس وأتذكر حديثي معها جيداً.. أتذكره وكأنه حدث منذ دقائق.

- انتي مقولتليش انتي مين لحد دلوقتي وجيتي ورايا اسكندرية ازاي وعرفتي مكان الشقه بتاعتنا هناك من مين و....

- أنا عارفك من زمان واعرف عنك كل حاجه بس ممكن تكون انت مكنتش بتاخذ بالك مني.

- من زمان! ازاي عارفاني من زمان؟

- مش يمكن ساكنه على مسافه قريبه منك؟ أو مثلاً أنا دفعتك؟

- مممممم كمللي.

- أنا عايزه أقولك بس اني بحبك من زمان؛ من زمان أوي وكنت بستناك تعدي من تحت بيتنا انت وصحابك عشان أخرج وابص عليك من ورا الشباك كل يوم في نفس الميعاد.

- وكنتي عارفه مواعيدي كمان؟ غريبة الحاجات دي محدش يعرفها غير شخص واحد بس!

- أنا عارفه الشخص اللي انت تقصده وعارفه انت بتحبه أد إيه..

- عارفه!! طب مين؟

- ليلي.. ليلي اللي انت وهي بتحبوا بعض من وانتوا صغيريين وعيشتوا مع بعض أجمل قصة حب يتمناها أي اتنين وكنتموا معروفين في المدرسة كلها من زمان إن انتوا لبعض بس الظروف والقدر كانوا أقوى منكم انتوا الاتنين ومكملتوش..

بدأت دموعي تسيل على وجهي دون إحساس فوجدتها تنظر إلى عيني بكل شفقة ووجهها تحول إلى وجه حزين ونظرت إلى الأرض، وقالت: أنا آسفة مش قصدي أجرحك.

أخرجت منديلاً ومسحت دموعي وقلت لها: لا مفيش حاجة عادي، بس بردو انتي مردتيش على كل كلامي.. ازاى عرفتي كل الحاجات دي؟

- أنا صاحبة ليلي الوحيدة التي كانت بتحكي لها كل حاجه عنك بتحب إيه وتكره إيه، بتروح فين لما تكون زعلان من الناس كلها، مين أصحابك، مين أهلك، كل حاجه..

- لكن ليلي مكنش ليها صحاب!! أنا كنت كل حاجه كنت حبيها وصحبتها وأخوها وأبوها.. ولما سألتها قبل كدا ليه ملهاش صحاب، قالت إن أنا كفايه عليها وان نفسها هي صاحبته..

- يبقى هي كانت مخبية عليك إن أنا كمان صحبتها.

- مستحيل!! مكنتش بتخبي عني حاجة..
- طب سيبني أكمل كلامي، أنا جيت وراك اسكندريه
عشان عرفت انك متضايق وزعلان بس مكنش عندي
الجرأة إني آجي واكلمك، بس كنت براقبك واشوفك
فين عشان تاخذ بالك مني ولما شوفتني أول مرة عند
شقتك وضحكت لك وانت كنت مذهول وقتها توقعت
انك هتنزل واستنيتك وقلت هعترف لك بكل حاجة
بس في آخر ثانية رجعت في كلامي ومشيت، واتكرر
الموقف كذا مرة وفي كل مرة كنت برجع في كلامي على
آخر لحظه وبمشي عشان ممكن تخرجني.
- طب وحكاية الشبه دي إيه؟ دا انتي كمان كنتي لابسه
نفس الفستان الأزرق بتاعها اللي كنت بحبه!!
- ما هو حكاية الشبه دي هي اللي قربتني أنا ويلي من
بعض لما عرفنا الموضوع دا وكنا كمان لما بتتنزل تجيب
حاجة جديدة كنت ببقى عارفه إنك انت اللي بتقولها
على الألوان اللي بتحبها عشان تشتريها، فأنا كنت بجيب
زيها في حاجات كتير..
- طب ازاي إنتي تبقي عارفة إني كنت مرتبط بصحبتك
وبحبها الحب دا كله وجايه تحبيني انتي كمان؟ مش
كدا خيانة لصحبتك اللي أمنتك دونًا عن الناس كلها
على سرها!

- أنا بحبك من قبل ما تحب ليلي وكنت شيفاك ليا من زمان ولما لقيتك انت وليلي مبسوطين مع بعض قررت ابقى زي ما بنقول صندوق الأسرار بتاعكم وكفايه أشوفك مبسوط ..

- بس مفيش حد بيعمل كل اللي بتعمليه دا!!
- أنا عملت كل دا عشان بحبك ونفسي تحس بالحب دا.
- بس أنا لسا...

- لسا بتحبها؟ ما هي خلاص مشيت وسابتك!!
- مش بمزاجها!!

- مش مهم، المهم إنها مشيت.. دي مشيت وهي عارفة إن روحك كانت متعلقة فيها!

- ولسا روحي متعلقة فيها ولسا هي حضن الأمان ليا..
مش عارف أفهمك ازاي! هو لو مثلاً واحد مامته ماتت ينفع يدور على أم تانية يعيش معاها حتى لو بعد مرور وقت كبير على موت أمه دي؟ هل هيقدر يعيش معاها ويحكي لها ويشكي لها من هموم الدنيا زي أمه مثلاً؟

- إنت معاك حق في كل دا، بس انت أكيد مش هتعيش عمرك كله من غير بنت في حياتك! مش هتوقف حياتك عليها.. انت لسا شاب والعمر قدامك وفي ناس كتير هيناسبوك ويناسبوا تفكيرك وهيقدرُوا يتعايشوا معاك زيتها..

- هكون واقعي معاكي وهقولك إن اللي قولتیه دا صح، بس هي.. هي مفیش زیها مفیش حد هیقدر یحس بیا ولا یریحني غیرها مفیش حد هیقدر ینسینی الوجد وکل مشاكل الدنيا بضحكة ونظرة لیا غیرها، مفیش حد هیبقى فاهمني من غیر ما اتکلم ولا أنطق بحرف غیرها مفیش حد هقدر أعیش معاه وأقول له الکلام اللي کنت بقوله لیه! عارفة أنا لو عملت کدا؟ أبقى محبتهاش وأبقى خاين وانا عمري ما کنت خاين.. بصي أنا وعدتها من زمان إن أنا لو مش لیها مستحیل أبقى لغيرها وأنا لسا عند وعدي لیها وعمري ما هخون..

- هي كانت ملاك یعنی؟ أكید جت في مرة زعلتك، أكید في مرة هددتك تنهي علاقتکم لو معملتش حاجة معينة طلبتها منك!

- مفیش إنسان معصوم من الأخطاء هي عملت کدا بس أنا عشان کنت متمسک بیه لدرجة انتي مش قادرة تفهمیها لأنک لو فاهمة وحاسة بکل دا مکنتیش جيتي دلوقتي وقولتي لي إنک بتحبيني وعایزاني وکل الکلام اللي انتي قولتیه دا.. أنا کنت بحب إحساس إنی ضعيف معاها وضعيف قدام حبها کان ممکن أي حاجة تهون في سبیل حبي لیه، عمرك شوفتي حد یحب یبقى ضعيف؟ أنا

كنت بحب كدا لأنني عارف إنها مستحيل تستغل إنها
نقطة ضعفي وتأذيني.

- محمد.. الحياة عمرها ما وقفت على اللي راحوا!
- مش معني إنها بعيدة عني ومش قادر أوصل لها يبقى
راحت خلاص ونسيتها! على فكرة هي لسا بتحس بيا
وقريبة مني ولما بتعب بتجي لي وتهون عليا بردو.
- يعني يا محمد مش هتقدر تحس بيا وتفهم أنا أد إيه
بحبك وتدي لنفسك فرصة تعيش معايا فترة صغيرة بس
يمكن تغيير رأيك!
- أنا نفسي تقدرني اللي أنا فيه وتحسي إن أنا لو مش ليها
فأنا مش لأي واحدة تانية..


في هذه اللحظة تغيير صوت الفتاه وتحول إلى صوت حبيبي
بطريقة غير مفهومة وقالت:

«أنا طول عمري كنت براهن على حبك ليا وعارفة انك
عمرك ما هتخون وعدك مهما حصل، بس مكنتش أعرف إنك
جواك الحب دا كله واللهفة دي كلها على غيابي.. أنا آسفة، آسفة
إني خيلتك تحبني للدرجة دي وإني مشيت وسيتك ومقدرتش
أكمل وعدي زي مانت لسا بتكمل في وعدك وعائش على
الأمل.. أنا آسفة بس القدر أكبر مني ومنك وكل حاجه أنا عارفه
إني كنت عمري ما هقابل حد بيحبني زيك مهما أنا لفيت الدنيا
كلها وقابلت ناس.. أنا آسفة».

الفصل الرابع

صدمة النهاية

« لو دقت النظر في أصغر التفاصيل مثل العلامات، لكنت أدركت أحداث هذه النهاية منذ البداية.. ».



كان صوتها آخر صوت أسمع قبل أن يتبدل المشهد من جديد وأفتح عيني لأرى نفسي في نفس الغرفة ومن حولي أكثر من طبيب ينظرون إلى عيني وهم يرفعون جهاز التنفس الاصطناعي من فوق أنفي ويقول أحدهم: حمد لله على السلامة يا بطل.

قلت بصوتٍ خافت جداً: هو إيه اللي حصل، أنا فين؟

- مفيش حاجة انت كويس وفي المستشفى ولما تشد حيلك كدا معانا هنفهمك كل حاجة.

- طب أنا هخرج امتي؟

- كام يوم كدا ولو التزمت بمواعيد العلاج وحسيتك كويس هتخرج.

- ماما وبابا و.. وليلى هنا؟

- آه بابا وماما هنا بس ليلي مش هنا وهدخلهم يطمنوا عليك ٥ دقائق كدا ويخرجوا تاني عشان متبدلش مجهود يتعبك احنا ما صدقنا إنك فوقت من الغيبوبة الطويلة دي.

أنهى حديثه معي ويبدو أنه كان يجهل من هي «ليلي» وأخذ الطاقم الذي كان يقف معه وغادروا الغرفة وبعدها بثوانٍ دخلت أمي وهي ما زلت ممسكة بالمصحف في يدها وما زال الدمع على خديها ومن خلفها أبي الذي رأيته يبكي ويبتسم في آنٍ واحد عندما رأى عيني مفتوحة وأنظرُ إليه، وكانت المرة الأولى في حياتي التي أرى فيها أبي يبكي!! اقتربوا من السرير الذي أنا بجانبه ووجدت أمي تقبل رأسي وتحمد الله أنني بخير، ومن خلفها أبي الذي ما زالت دموعه على وجهه يفعل مثل أمي وحينها بكيت أنا الآخر عندما رأيتهما يبكيان، فقال أبي: حمد لله على السلامة يا حبيبي، بتعيط ليه انت كويس وزى الفل مفيش فيك حاجة.

وقالت أمي: خلاص يا حبيبي انت بخير وهتخرج من هنا بالسلامه ان شاءالله قريب، هانت خلاص.

قلت: طب انتوا بتعيطوا ليه انتوا كمان؟ مش أنا زي ما بتقولوا كويس أهو ممكن كفايه طيب عشان متعبش أكثر!

قالت أمي: يا حبيبي دي دموع فرح، فرحانيين إنك قمت لنا بألف سلامة.

قال أبي: يلا يا واد قوم مش كفاية خضتنا عليك الفترة دي كلها! يلا عشان ماما عماللك البانيه اللي انت بتحبه، وصحبك تعبان ومبياكلش ولا يشرب حاجة إلا كل فين وفين ووزنه نزل للنص.

قلت: هو فين؟ هاته معاك يا بابا وانت جاي بكرة دا وحشني
أوي.

قالت أمي: هجبهولك أنا بكرة بس قوم انت وشد حيلك يا
حبيبي.

قلت: ماما هي ليلي ومامتها دخلوا عندي هنا واطمنوا عليا
ومشيو؟

نظرات متبادلة بين أمي وأبي وكأنهم لا يريدون إخباري
بأنها لم تأت، فكررت سؤالي مرة أخرى.

قال أبي: لا يا محمد مجتش، سيبك منها بس دلوقتي ولما
تخرج نشوف الموضوع دا.

قلت له: ماشي يا بابا.

دخلت الممرضة في هذا الوقت وطلبت منهم الخروج لأن
حان ميعاد تغيير المحلول والأدوية التي كتبها الطبيب المعالج
الذي يتابع حالتي، فاقتربت مني أمي ووضعت يدها على جبيني
وأمسكت بالمصحف ووقفت تقرأ وهي تضع يدها هكذا لحوالي
خمس دقائق أخرى ثم خرجت ومعها أبي، وبدأت الممرضة
بتغيير المحلول وإعطائي الدواء ولم تأخذ وقت كبير حتى خرجت
وطلبت مني الراحة التامة والنوم ليتم شفائي سريعاً ويجب أن
ألتزم بتعليمات الدكتور وحديث من هذا السياق الذي تعودنا على
سماعه في كثير من الأفلام والأعمال الدرامية..

خرجت الممرضة وبقيت وحيداً أحاول فهم واستيعاب ما حدث في الأيام السابقة وتجميع الأحداث والمشاهد التي رأيتها والتي ما زال جزءً من عقلي لا يستطيع تصديق أن كل ما قد مرَّ كان مجرد غيبوبة نتج عنها هذا الكم من التخيلات!، حتى تذكرت شيئاً هاماً هو الذي سوف يحدد حقيقة ما رأيته.. الرواية نعم أنا كنت قد بدأت بكتابة بعض الصفحات فيها، فماذا لو ما كتبته كان بالفعل موجود وقلمي في موضعه كما تركته؟

مرّت حوالي عشرة أيام على استفاقتي من الغيبوبة وبدأت أشعر بتحسّن وتقدم في حالتي الجسدية، وطلبت من أمي أن تحكي كل شيء منذ قدومي إلى المستشفى إلى الآن..

وقالت أمي: يا ابني احنا كنا قاعدين في البيت وجالنا تليفون من المستشفى إنك عملت حادثة وانتقلت المستشفى من ساعة والظاهر إن هما طلعا رقم بابا من على موبايلك قمنا لبسنا وجرينا على المستشفى لقيناك في أوضة العمليات والدكتور يقول إن الحالة خطيرة والحادثة عملت نزيف في المخ ويحاولوا يوقفوا النزيف وقالنا ندعي المرحلة دي تعدي على خير لأنها أخطر مرحلة دلوقتي طبعاً كل أهلنا وأصحابك كانوا واقفين على باب أوضة العمليات منهارين ويدعوك وبعدها بكام ساعة الدكتور خرج وقالنا إن الحمد لله قدروا يوقفوا النزيف بس انت دخلت في غيبوبة والدكتور قالنا مش هتطول فيها وقعدت حوالي تقريباً ٣ اسابيع مبتفتحش عينيك ولا بتتحرك وعائش على الأجهزة

بس الدكتور كان بيطمنا إنك هتفوق منها وهتبقى كويس، لحد ما
الممرضة كانت بتغير لك المحلول وشافتك وانت بتفتح عينيك
وخرجت تقول للدكتور إنك فوقت قعدنا نعيط أنا وبابا ونحمد
ربنا إنك فقت بألف سلامة، ماحنا كنا معاك في الأوضة بنقرأ
قرآن وندعي ربنا يعدي الغيبوبة دي على خير، بس بعدها دخلت
في غيبوبة تانية لكن مطولتش فيها قعدت لك يومين تلاتة وفقت
وخرجت من مرحلة الخطر وبقيت بخير يا حبيبي.

- ماما لتالت مرة بسألك.. ليلي ومامتها دخلوا عندي هنا
واتكلموا معايا؟

- يا ابني انسى بقى ومتتعبنيش وتتعب نفسك عُمر اللي
راح ما هيرجع تاني.

- لا يا ماما متقوليش كدا، متظلميهاش هي أكيد في حاجة
منعاها أو محدش قالها ومعرفتش اللي حصل بس لما
تعرف هتجي لي.

- يا حبيبي متعلقش نفسك بحاجة عمرها ما هتحصل
وارتاح وريح عقلك من التفكير فيها شوية عشان تخرج
من هنا وترجع بالسلامة لأهلك واصحابك.

- خلاص يا ماما اللي تشوفيه، أنا دماغى ثقيله وعائز انام
شويه.

- أنا هخرج أطمئن اللي بره واقعد معاهم ولو عوزت حاجه
دوس على زرار الجرس اللي جنبك.

خرجت أُمي وأغلقت الباب من خلفها وأنا لا أريد النوم ولا أي شيء، لكن كانت كلماتها تنزل مثل السيف على قلبي وهي لا تتبته لما تقوله وملت برأسي تجاه الشرفة التي كانت في هذه الغرفة. لم يمر الكثير من الوقت وأنا أميل برأسي مرة أخرى تجاه باب الغرفة حتى وجدتها بنفس المنظر الحزين الذي كانت عليه أثناء رؤيتي لها في الغيبوبة تقف أمام الباب وتنظر إلى السرير ولا تنطق ولكن عينيها كانتا تقولان كل شيء..

- أنا قلت لماذا انك هتيجي لما تعرفي ومكنتش مصدقاني وظلمتك.

ظلت في مكانها ولم ترد واستمرت في النظر إلى عيني ووجهي الذي ابتسم عند رؤيتها، فقلت لها: مبتريش عليا ليه وليه اتأخرتي في زيارتك دي أوي كدا؟

- أنا متأخرتش أنا معاك من أول ما جيت هنا وبتطمئن عليك أول بأول.

قلت متعجبًا: ازاي؟ أومال ماما بتقولي إنك ماجتيش خالص ليه!

- معلش بس ممكن تلاقيها كانت مش مركزة في الناس الموجودين من كتر زعلها وقلقها عليك.

- أيوه صح معاكي حق، شوفتي حصلي إيه؟ مش هنرجع بقي وكفاية كدا..

- أنا في المكان الأحق بيا دلوقتي.. إنساني يا محمد
وريحني أنا مش مرتاحة أكثر منك!!
- انساكي؟ إنتي للدرجة دي مش عايزاني وكرهاني؟
- أنا بقول كدا عشان كنت بحبك حُب محدش هيقدر
يحبهولك من بعدي! بس أنا مش عايزاك تعيش الباقي
من عمرك بتتعذب بسببي.
- مش لما اكون عايش أصلاً! مين قالك إنني عايش؟ أنا
من ساعة ما بعديت وبموت في اليوم ألف مرة، بشوفك
وانا لوحدي في أوضتي، وفي وشوش الناس في الشوارع،
وكل حاجة حلوة بشوفك فيها..
- الزمن هينسيك كل حاجة بس ابدأ انت وشوف حياتك
وهتلاقي حد أحسن مني يعوضك عن كل اللي انا اتسببت
لك فيه.
- انتي ازاي فاكرة كل حاجة بالسهولة دي؟ اللي بتتكلمي
فيه دا مش هيحصل ولو عشت مية سنة كمان!
- كفايه يا محمد أنا مش قادره ارتاح وانا شايفاك كدا لا
طایل سما ولا أرض!
- قلت ودموعي على وجهي: ارجعي لي وكل دا هيتصلح
وهبقي كويس.. والله هبقي كويس.

- خلاص مبقاش نافع! فات الآوان وعمرنا ما هنبقى لبعض.

التفت بوجهي بعيداً عنها والكلام يرفض الخروج من فمي واكتفيت بالبكاء لدقائق معدودة..

ثم قلت: انتي ليه بتعملي معايا كدا؟ أنا عمري ما حببت حد زيك! ليه بتعذبيني معاكي بالشكل دا؟ انتي بتعاقبيني عشان حبيتك ومقدرتش احب غيرك ومش قادر حتى أشوف غيرك؟
لم ترد على أي شيء من الذي قلته ولكن ليس لأنها لم تسمعه بوضوح أو لا تجد ردًا لحديثي لها، لكن عندما التفت إلى المكان الذي كانت تقف فيه أمام باب الغرفة لم تكن موجودة! غادرت الغرفة دون أن أشعر بها لتتهرب من الرد على أسئلتني الذي من الواضح أنها كانت تُأنب ضميرها.

بعدها بحوالي خمس دقائق وجدت أبي يفتح باب الغرفة ومعه دكتور طاهر الذي كان يحمل باقة من الورود الزرقاء الذي كان يعلم أنني أحبها ووضعتها بجانبني في هدوء، وقال: ألف سلامة يا محمد، يلا شد حيلك كلها كام يوم وتخرج.. لازم هنقعد مع بعض أول ما الدكتور يكتبلك على خروج.

- الله يسلمك يا دكتور، انا اللي محتاجك والله في حاجات كثير حصلت عايزين نتكلم فيها.

- خلاص وقت ما تخرج من هنا كلمني وانا هجي لك
البيت على طول مش لازم العيادة كفايه اللي حصلك من
الطريق اللي هناك.

ابتسمت وقلت: لا يا دكتور ربنا يخليك، أنا هجيلك
مايصحش والله.

- يا استاذ محمد أنا جايلك البيت أزورك ولا انت بخيل
ومش عايز تضاييني في بيتك؟
ضحكت وقلت له: لا أبداً دا انت تنورنا والله، خلاص اللي
تشوفه.

- خلاص يبقى اتفقنا أول ما تروح بيتك كلمني على طول،
وانا هتابع حالتك مع والدك بردو.
قلت له بابتسامه: شكراً على اهتمامك وانك جيت لحد هنا
يا دكتور.

- انت صديق وأخ صغير ليا مش مجرد حالة عندي بتعالج
وخلاص، عيب تشكرني اني جيت لك..

خرج الدكتور طاهر ودخل خلفه مباشرة الطبيب المُكلف
بعلاجي ليخبرني بخبر سعيد.. وهو أنني سوف أخرج في خلال
أسبوع، لكن سوف أستند على عكاز بسبب بعض المشاكل في
ساقَي الأيسر وسيكون بشكل مؤقت ومع جلسات العلاج الطبيعي
سوف يتحسن الأمر وأستغني تدريجياً عن العكاز وأمارس حياتي
بشكل طبيعي.

لم يلفت انتباهي في حديثه سوى «العكاز»! أنا رأيت نفسي في الغيبوبة أستند إليه عندما خرجت من هنا!! فماذا يعني ذلك؟ أن العكاز هو بداية لتحقيق كل ما قد رأيت في الغيبوبة؟ أم ما حدث مجرد تشابه في الأحداث؟ ليبقى الفصل الأخير في الرواية هو الخيط الذي سيفصل بين كل هذه الألغاز والاستفهامات التي بداخلي.

مرَّ الأسبوع الذي حدده الطبيب المعالج بسرعة وكانت كل يوم تأتيني ونتحدث وفي كل مرة ترفض الرجوع وتخرج من الغرفة أثناء انشغالي بأي شيء دون أن أشعر بها، ودخلت أُمي لتجمع ملابسها وأشياءها الخاصة من الغرفة لنستعد للعودة إلى منزلنا، دخل الطبيب وقال: حمد لله على السلامة يا أستاذ محمد هتوحشنا والله، متنساش تتابع عند الدكتور اللي كتبت لك عنوانه وارجوك متهملش جلسات العلاج الطبيعي عشان ميحصلش حاجات لقدر الله مش هتبقى حلوة عشانك.

- الله يسلمك يا دكتور ومتقلقش أنا هعمل اللي عليا وان

شاء الله تعدي على خير وهبقى كويس.

- إن شاء الله، استأذن انا بقى واسيبك مع أهللك.

خرج الطبيب، وقالت أُمي: الراجل دا محترم جدًّا وتعب

معاك أوي من أول ما جيت هنا للنهارده.

- باين من كلامه وشكله إنه فعلاً راجل كويس، ما علينا

دلوقتي عملتي أكل إيه واحشني الأكل بتاعك.. وعلى

فكرة انتي بقالك كتير بتضحكي عليا وكل يوم كنتي
تقولي انتي وبابا هنجيب لك صحك وضحككتوا عليا
الفترة دي كلها!

ضحكت وقالت: أولاً عملالك البانيه والمكرونة اللي انت
بتحبهم، وثانياً احنا سألنا الدكتور وقال ممنوع أصلاً الحيوانات
تدخل للمرضى وقال هانت ويروح البيت ويقعد معاه براحته.

- ماشي ثبيني أوي.. خلاص لميتي الحاجة كلها ولا
نسيتي حاجة؟

- لا كله تمام كدا، استنى أجيبك العكاز وآجي عشان
نخرج، على فكره بابا مع أصحابك وقرايبنا كلهم برا
مستينك.

خرجت أمي ولم تغلق باب الغرفة بإحكام وأثناء ما أنا أنظر
إلى الغرفة وأركانها نظرة الوداع الأخيرة، وجدتها تجلس على
الكرسي القريب من الباب لكن هذه المرة كانت تبتسم على
عكس كل المرات السابقة، يبدو أنها كانت تعرف أن هذا يومي
الأخير في المستشفى..

- بقالي كتير مبشوفش ضحككتك.. انتي عرفتي اني خارج
النهارده مش كدا؟

- أيوه عرفت ولازم تاخذ بالك بعد كدا على حياتك
وتلتزم بالجلسات زي ما الدكتور قالك عشان رجلك
ترجع أحسن من الأول.

- إيه دا انتي اتكلمتي مع الدكتور كمان؟
- مش مهم اتكلمت مع مين، المهم إنك خلاص بقيت
كويس وهتخرج من هنا بقي.
- يعني خلاص كدا مش هشوفك تاني؟
- كفايه كدا.. أنا كنت هنا كل يوم من أول ما دخلت انت
المستشفى عشان أطمئن عليك.
- لا مش كفايه احنا هنفضل نتقابل كل يوم زي ما عودتيني
مفيش حاجة هتتغير تاني!
- مش بإيدي مانت عارف!.

خرجت من الغرفة بعد أن ودعتني ووصتني أن أعود للعمل
من جديد وأن أنساها ونفس الذي تقوله في كل مرة..
مرت ساعات قليلة ووصلت البيت ومعني أبي وأمي وتركنا
كل من معنا على باب المنزل لأرتاح اليوم ويأتون لزيارتي غدًا،
وبمجرد دخولي من باب الشقة وجدت صديقي يقف كعادته فوق
الكرسي الموضوع بجانب الباب وعندما نظرت إليه رفع صوته
ونزل من على الكرسي وظل يحك رأسه في قدمي ويدخل من بين
أقدامي ويستند بيديه على ساقَي وينظر إلي فجلست على الأريكة
فقفز وجلس بجانبني فدعكت رأسه وظهره كما يحب وداعبته
كثيرًا حتى أحضرت أمي الطعام ووضعت على السفرة وجاء أبي
لأستند عليه حتى ساعدني في الجلوس على السفرة، رائحة أكل

أمي والسفرة والمنزل وكل شيء هنا أفتقده بشدة.. وهذا ما جعلني أأكل كثيرًا وكأنني لم أأكل منذ شهور قبل الآن. ولم أصبر كثيرًا بعد أن انتهيت من طعامي ودخلت مسرعًا إلى غرفتي وأغلقت الباب بالمفتاح من خلفي وجلست على المكتب وبدأت بالبحث عن روايتي وسط الكتب ويدي ترتعشان خوفًا من النتيجة! فالآن سوف أطمئن على سلامة عقلي بعد كل ما مررت به.. وجدتها أسفل بعض الكتب وأمسكت بها وكنت أرتعش والعرق يملأ جبينني ووجهي وقبل أن أفتحها أمعنت النظر فيها وأنا أرجوها أن تكون على الوضع الذي تركتها عليه في الغيبوبة وأرجو هذا من الله، وفتحت الرواية ومررت بعيني بين صفحاتها على كل ما قد كتبه من قبل حتى وصلت لورقة مكتوب عليها «الفصل الأخير» وطويتها بيدي لأنظر فيما خلفها وأجد...

أجد صفحات فارغة تمامًا لا يوجد بها أي حرف أو نقطة حتى وكأنني أراها الآن لأول مرة وكل ما كتبه وأنا في مرحلة الغيبوبة لم يوجد له أثر في الكشكول الخاص بالرواية ولا أنا أتذكر أي كلمة أو جملة وضعتها من قبل في هذه الصفحات.. فماذا يعني كل هذا؟ كل ما رأيته كان من أثر الغيبوبة وكانت هلاوس! هل بالفعل عقلي مسه الجنون؟

أنا الآن أشعر أنني خسرت كل شيء.. حبيبتي التي كانت الأمومة والوطن التي سلبت معها قلبي وحطام عقلي الذي كنت أعيش به، حتى بدأت خيبات الأمل تملأني وأشم رائحة الموت

في كل مكان وكأنه هو الحل الآن.. فأنا أتعذب في هذه الدنيا أعيش بجسدي فقط وكل شيء بداخلي قد مات ولن يعود من جديد مهما حاولت، ففي كل مرة أعاند فيها الواقع أخسر جزءاً آخر من عقلي وكأنني أدمت الخسارة وعقلي قد انتهى منه العقل.

مرت الأيام والأسابيع وكنت أذهب ثلاث مرات في الأسبوع الواحد للجلسات، لم يفتني جلسة واحدة حتى عادت ساقني كما كانت، وكان دكتور طاهر يتابعني هاتفياً ويزورني في البيت أسبوعياً وكانت هي تأتيني في أحلامي ولا أراها أبداً في أي مكان كما تمنيت، حتى أنني ذهبت إلى كل الأماكن التي كانت تجمعنا وبحث عنها فيها ولكن في كل مرة لا أجدها، حتى أنني كنت على وشك أن أحمل صورة لها وأمشي بها في الشوارع وأسأل المارة عنها على أمل أن يكون رآها أحد ويريح قلبي..

حاولت تخطي كل هذا وأنغرس في عملي ليلاً ونهاراً كمصور وأصبحت أحمل نفسي أكثر من طاقتها ظناً مني أن هذا سوف يجعلني أنساها تدريجياً كما طلب الجميع مني وعلى رأسهم هي، لكن عند كل صورة أتخذها لأي فتاة سواء في حفل زفاف أو في إعلان أو أي شيء آخر كنت عندما أضع عيني في الكاميرا أراها هي من تقف أمامها وعند رفع عيني من الكاميرا لأتحقق منها لا أجدها!، ولم يقف الأمر على هذا فقط بل أصبحت أرى خالد صديقي من جديد في أماكن متفرقة وهو يبتسم لي، وعندما أذهب إليه وأناادي عليه: خالد! أجد شخصاً من المارة لا أعرفه

في كل مرة حتى ظن الناس أن عقلي بدأ بالجنون فعليًا وأصبح
يصور لي أنني أرى أشخاص غير موجودين بالفعل، لكنني متأكد
من سلامة عقلي ونظري أنا رأيتهم بالفعل وعلى يقين تام من
رؤيتهم! كنت أحكي لدكتور طاهر كل ما أراه يوميًا في عملي وفي
غرفتي وما يقوله الناس عني وكان يحلل ويفسر كل ما أراه علميًا
حتى أنني من تكرار سماعي تحليلاته لنفس المواقف أصبحت لا
تأثر على حالتي النفسية تمامًا، وهو ما شعر به دكتور طاهر ودفعه
في إحدى زياراتي ليقتراح علي أن أذهب إلى مستشفى لعلاج
الأمراض النفسية لمدة شهر واحد فقط، وقال: بص اعتبر نفسك
في إجازة ورايح تريح عقلك ونفسيك وترتاح من ضغط الشغل
اللي انت حطيت نفسك فيه واللي كان السبب في كل التهيؤات
والهلاوس اللي انت شوفتها الفترة اللي فاتت دي، روح وجرب
ووقت ما تحب تمشي هتمشي عادي! انت مش مجبور انك تقعد
هناك إنت رايح بكامل إرادتك وكامل قواك العقلية كمان.

- تفكر هو دا الحل يا دكتور؟ اني اقعد في مكان معرفش
حد فيه!

- متقلقش هتتسبط هناك خصوصًا إن المكان نضيف
والرعاية الصحية هناك هتعجبك وممكن تقعد أكثر من
شهر كمان والدكاتره هيتابعوك يوميًا هناك وأنا هشرف
على المتابعة بتاعتهم بنفسي وهشوفك لو حد مضايقتك
أو محتاج حاجه بالموبايل كدا.

- خلاص يا دكتور أنا موافق، هقولهم في البيت وأحضر
الشنطه وأجيلك ونمشي على هناك.

- إن شاء الله وهترجع من هناك زي الفل وموضوع
التهيزات دا هينتهي بالمره.

أنهيت حديثي معه وقد أعجبتني فكرته وقلت أن هي الحل
لكل هذه المتاعب وأني بالفعل أحتاج إلى الراحة، ذهبت إلى
المنزل وأخبرتهم بحديث دكتور طاهر معي واقتراحه الذي أراه
مناسباً وكانوا في أول الأمر معترضين على تواجدي في مستشفى
أمراض نفسية بحجة أن المتواجدين هناك في هذه الأماكن
«المجانين» فقط، ولكن شرحت لهم الأمر وأقنعتهم بكل شيء
بصعوبة لكنهم اقتنعوا ووافقوا، وفي اليوم التالي كانت أمي قد
أنهت تحضير حقيبة السفر ووضعت بها الملابس وأغراض
التي طلبت منها أن تضعها وودعتهم بقبلة على أيديهم وغادرت
المنزل وذهبت إلى الدكتور طاهر الذي أخذني معه في سيارته
إلى المستشفى وأخبرني في الطريق بوضعي في غرفة بها شابين
الأول يُدعى «شادي» والثاني «عمرو»، وعندما سألته عن سبب
وضعي مع أشخاص لا أعرفهم وأنه من المفترض أن أجلس في
غرفة بدون أحد، قال: يعني أنا جايك هنا تتعالج من هلاوس كان
السبب الرئيسي فيها الوحدة عشان بردو أقعدك لوحك واللي
بتشوفه بره تشوفه هنا تاني! يبقى استفدنا إيه؟ لازم تقعد مع حد
وتحكوا مع بعض وتختلط بالناس كدا من تاني؛ عشان دا هيفيدك

أوي وهيساعد على تقدم حالتك بشكل ممتاز بس انت امشي مع التعليمات اللي هيطلبها منك الدكاتره وهتبقى أحسن إن شاء الله.. وكان لحديثه القدرة على إقناعي بالجلوس في هذه الغرفة مع هذين الشابين، ووصلنا بالفعل إلى المستشفى وطلب الدكتور من أحد العاملين هناك أن ينقل الحقيبة إلى الغرفة رقم ١٧٧ واصطحبني بعد ذلك إلى الغرفة ليعرفني على أصدقائي الجدد، دق على باب الغرفة ليستأذن في الدخول.

ثم قال: صباح الخير يا شباب.

وتبادلوا التحيات والأسئلة حول مدى تقدم حالتهم الصحية وكانت إجابتهم مبشرة للغاية، ثم قال مرة أخرى: آه نسيت اعرفكوا ببعض، دا محمد شغال مصور فوتجرافر.. جاي يقعد معاكوا فترة صغيرة يرتاح فيها لو معندكوش مانع.

قال أحدهم مبتسمًا وكان يرتدي نظارة وصاحب بشرة سمراء نوعًا ما: لا يا دكتور ولا أي مانع دا ينورنا والله كفايه إنه جاي مع حضرتك وشكله راجل محترم وهنساعد بعض.

قال له الدكتور: شكرًا يا عمرو على الكلام الجميل دا.

قال الآخر ضاحكًا أيضًا وكان صاحب شعر ناعم طويل وطويل القامة: احنا كنا عايزيين حد جديد يقعد معانا نحكي مع بعض بدل ما انا وعمرو في وش بعض بقالنا كتير كدا لحد ما زهقت منه.

ضحك الدكتور وقال: متشكرين يا عم شادي وهو من ناحية هيكلمكوا فمتقلقوش هو هيخرجكوا من جو الكآبه اللي انتوا فيه دا، محمد دمه خفيف وهتبتسطوا مع بعض كلكم.

كنت أقف وهم يتحدثون إلى بعضهم عني ولا أرد على أحدٍ منهم بل كنت أكتفي بالابتسامات في وجوههم، فأنا ما زلت أشعر برهبة المكان ورهبة الوضع الجديد، خرج الدكتور وتركنا مع بعضنا لتحدث ونحاول أن نتعايش مع بعضنا وكانت الأمور تسير في طريقها الصحيح ومرّت حوالي عشرة أيام نتحدث بشكل ودي وطبيعي وما زالت لا أعلم سبب مجيئهم إلى هنا ولا هم أيضًا يعلمون.

كل ليلة وأنا هناك كانت لا تمر دون أن أسأل نفسي كيف وصلت إلى هذا؟ ما نوع الحُب الذي يؤدي إلى الفتك بالإنسان وتدمير حياته لهذه الدرجة؟ إلى متى.. إلى متى سأحاول تكذيب كل من حولي وأنا أعرف الحقيقة تمام المعرفة منذ سنوات! فالجميع يعتقد أنني أصبحت مريضًا أنكر ما حدث في الحقيقة وأتوهم رؤية أشياء لم تعد موجودة الآن وأخرى لم تكن موجودة من الأساس، لكنهم جميعًا ينظرون بأعينهم من بعيد لا يحاولون الاقتراب مني وينظرون بقلوبهم لما أشعر به ليعطوني عذرًا لما أنا عليه الآن.. وكان هذا السبب خلف اعتزالي الاختلاط بالناس وإخراج ما بداخلي من أوجاع لأي شخص لأنني أعرف أنهم يسمعون من باب الفضول لا المساعدة.

في إحدى الليالي التي كنا نجلس فيها أنا وعمرو وشادي ولا نجد ما يسلينا لنفعله والجو أصبح مملاً جداً من تكرار ما نفعله يومياً، قال شادي: طب ممكن تقولنا يا محمد انت هنا ليه؟ إيه المشكلة الكبيرة اللي تخليك تيجي تقعد هنا مع ناس متعرفهاش ومكان غريب عليك كدا ومستشفى ودكاترة وجلسات كل يوم وكل دا مع إنك كان ممكن تتعالج من غير ما تكون هنا.. وأنا آسف إنني بتدخل في أمورك الشخصية بس اهو أدينا بنتسلي عشان مانزهقش.

قلت: لا يا شادي عادي مفيش حاجة، بس ما تحكي لي انت الأول عشان اتشجع كدا واحكي انا كمان.
قال: بس كدا؟ خلاص اتفقنا وكدا كدا أنا وعمرو يعني عارفين حكايات بعض بس هنقول لك.

ثم بدأ حكايته: أنا عيشت من وانا صغير مع جدتي في بيتها ومكنش في حد عايش معنا غير أختي الأصغر مني وكانت جدتي بالنسبة ليا أبويا وامي وكل قرابي وأهم حاجه في حياتي؛ لأن بابا وماما كانوا طول السنة مسافرين بره مصر شغالين بيحاولوا يأمنوا مستقبلي انا واختي ومكناش بنشوفهم غير كل كام شهر يومين تلاته بالظبط واستمر الحال دا لحد ما وصلت لمرحلة الكلية وانا طالب في كلية الهندسة وكل ما بكبر اكثر الحمل بيزيد عليهم في الغربة أكثر واكثر لحد ما بعد سنين طويلة من الغربة قرروا يرجعوا ويكملوا كفاحهم هنا في مصر واهو بيقوا وسطنا، وكلمونا قبل ما

ينزلوا بأسبوع وبلغونا بالخبر اللي كنا طاييرين من الفرحة بعد ما سمعناه انا واختي وجدتي وقعدنا طول الأسبوع دا نجهز في البيت والأكل ونجهز الأوضه بتاعتهم وننصفها ووظبنا كل حاجة ليهم وكنا بنشتغل كدا واحنا مبسوطيين ومش حاسين بتعب بعد ما خلاص اللي كان نفسنا فيه من زمان هيتحقق وهنعيش مع بعض كلنا زي أي أسرة عادية، ميعاد طيارتهم كان الساعة ١١ وكنا كلنا طول الليل مش عارفين ننام من الفرحة ونزلنا من الساعة ٧ وكلمنا سواق مخصوص جه خدنا أنا واختي وجدتي ووصلنا المطار وطلبنا منه يستانا نرجع معاه، وفضلنا شوية في المطار جدتي كانت بتحكي لنا فيهم عن ذكريات فرح بابا وماما واهو بتسلينا لحد ميعاد الطائرة ووصلت الطائرة الحمد لله واترмина في حضن بابا وماما اللي كانوا واحشينا.

وبدأت دموع شادي تملأ وجهه ويتكلم وهو يبكي كالأطفال وقال: خرجنا من المطار وربطنا الشنط وركبنا كلنا العربية واتحرك السواق وفي الطريق كان في عربية نقل كبيرة ماشيه جنبنا وهي بتغير الاتجاه السواق عديم الضمير بتاعها الظاهر كان شارب مخدرات ويا دوب بس لمس العربية واحنا ماشيين بسرعة والعربية اتقلبت على الطريق وانا وقعت من الشباك على الطريق وكلهم ماتوا.. وانا اللي عيشت لوحدي، زادت دموعه وصوت بكائه وقال: ليه؟ ليه انا بس اللي اعيش؟ ليه مموتش معاهم وارتحت من العذاب اللي انا عايش فيه دا! عشان اتعذب لوحدي يعني واشوفهم كل يوم في

كل مكان على كذا هيئة!! ليه القدر بيعمل كذا فيا؟ أنا هنا عشان كذا! عشان مش قادر أعيش لوحدي مش قادر ابطل تفكير فيهم وكل يوم بييجولي كلهم بشوفهم ليل ونهار قدامي مش قادر انسى اللي حصل كل ما احاول انسى ألف حاجه بتفكرني، وبدأ بمسح دموعه وقال: لحد ما اقترحوا عليا ولاد الحلال آجي هنا وهلاقي علاج لكل دا، والحمد لله بقالي هنا حوالي ٥ شهور وبدأت كل حاجه تروح بالتدرج والعلاج جاب نتيجة معايا والدكاترة قالولي إن كلها شهر ولا اتنين إن شاء الله واخرج من هنا واقدر اعيش حياتي من جديد في هدوء وأكمل آخر سنة ليا في الكلية واتخرج واشوف حياتي..

تفاعلت مع شادي وكانت عيني تدمع معه وعمرو كذلك وحاولنا تهدأته حتى هدأ وطلب مني أن أحكي لهم أنا الآخر حكايتي والسبب وراء مجيئي هنا..

وجدتها فرصة لأخراج كل التفاصيل وكل شيء كنت أخفيه بداخلي معهم فأنا كنت أحتاج إلى وجود صديق أفرغ معه كل ما بداخلي وجلست أحكي لهم عني كل شيء بالتفصيل حتى أنني تخطيت الساعة ونصف احكي وأجمع الأحداث في ذهني فأعاود بعد ذلك واستكمل حتى انتهت حكايتي.. وجاء الدور على عمرو والذي كان يبدو عليه أنه يغلب عليه طابع المرح، قال عمرو: هجبلك الحكاية من الأول بقي.. بص يا محمد انا كنت من الناس الشاطرة أوي في ابتدائي واعدادي لحد تانيه ثانوي كذا وكنت لا

بشرب سيجارة ولا اطيق اشم ريحة التدخين وكنت ملتزم أول بدراستي ومكنتش بقعد حتى على قهاوي خالص، لحد ما في يوم كان عندي درس واتلغي والناس اللي كانوا معايا في الدرس قالوا بدل ما نروح ونزهق من القعدة في البيت نطلع على القهوة نقعد هناك واهو القعدة هناك هتبقى حلوة، طبعًا هما عارفين رأيي من قبل ما يعرضوا الفكرة اني مش هرضي لكن قعدوا يتحايلوا عليا ويقنعوني لحد ما روحت معاهم وقعدنا ولعبنا طاولة وشطرنج وقضينا يوم حلو اوي، وبقيت في الوقت الفاضي اروح واقعد هناك حتى لو مفيش حد من اللي اعرفه هناك وواحد واحد بدأت اشرب شيشه بعد لما مكنتش بقدر اشم ريحتها، والموضوع اتطور معايا ومبقتش اروح دروس واهرب واطلع على القهوة اقعد مع ناس معرفهاش كل ما اروح بلاقيهم هناك مبيتحركوش من على القهوة وبدأوا واحد واحد يحاولوا معايا اشرب حشيش وكالعادة فيأول كل حاجه الرفض القاطع وبعد كذا من كتر الوسواس اتشد للطريق واشرب والحشيش بعد كذا بقى بانجو وبعد كذا بقى برشام ولفيت على كل أنواع المخدرات لحد الخمره كمان، وبقيت بحتاج فلوس أكثر لأن المصروف العادي دا ميكفيش حق علبة سجائر، أو مال المخدرات دي بقى هصرف عليها منين؟ بقيت آخذ فلوس الدروس واجيب بيها مخدرات ومروحش الدروس وفي أوقاتها اقعد على القهوة مع الناس المقيمين هناك اللي سحبوني للسكة دي وكل دا وكنت

داخل على الثانوية العامة وانحرفت اكثر واكثر ومجبتش مجموع
وفي الآخر دخلت معهد سنتين وكل سنة بسقط وخلص جسمي
نزل مبقاش موجود وصحتي باظت وبقت اكح كثير في البيت وبابا
لاحظ كل دا عليا وخدني بالعافية وعملي تحليلات واشعة وعرف
اني مدمن وأهلي اتكلموا معايا والناس اللي بحبهم اتكلموا معايا
لحد ما رجعوني لعقلي تاني وعرفت وفهمت ان كل دا من أصحاب
السوء وان انا مفكرتش ومشيت وراهم من غير ما اعمل حساب
لآخرة طريقي دا هيبقى إيه وهيوديني على فين، وواحد صاحب
بابا الروح بالروح كان متابع حالتي معاه من الأول وقاله يجيني هنا
ولو انا مش راضي ممكن يجبوني بالعافية وأساليب متخلفه كذا
كثير، لكن انا عشان من جوايا نفسي اتعالج من كل القرف اللي
وقعت نفسي فيه دا جيت هنا بنفسي ومخدتش حد معايا غير بابا
وشنطة هدومي وقلت لهم انا جاي اتعالج واهو الحمد لله بقالي
٤ شهور هنا وأغلب السم اللي في جسمي خرج وصحتي بدأت
الحمد لله ترد تاني وجسمي يرجع لطبيعته، والدكاترة هنا متابعيين
معايا بالجلسات النفسية دلوقتي عشان يهياؤني للتعامل مع الناس
بره ويدوني محاضرات انا وناس هنا جاينين لنفس السبب حوالين
المخدرات وأضرارها وانا فعلاً اقتنعت بكلامهم وبيأثر فيا وهانت
بردو واخرج إن شاء الله.

قلت له: أنا بحبيك على عزمك وانك عندك إرادة تتخلص
من حاجة تعباك وترجع لحياتك تاني.

واستمر الحوار بيننا كل يوم، وبدأت أشعر أن الدكتور طاهر كانت وجهة نظره صحيحة فأنا الآن لا أراها كثيرًا لكنني ما زلت أراها وبعد مرور شهر والثاني خرج شادي وبعدها بحوالي أسبوعين خرج عمرو، وبقيت أنا وجلست مع شخصين آخرين وبعدها بحوالي شهر كنت قد أتممت ثلاثة شهور ونصف من العلاج والجلسات مع الأطباء المتواجدين هناك، حيث قالوا أنني قد تم شفائي وأعطوني شهادة تثبت ذلك، وفي آخر يوم حضر دكتور طاهر إلى المستشفى وطلب مني أن نجلس سوياً في مكان خارج حدود العيادة والمستشفى وكل الأماكن التقليدية التي كنا نجلس فيها من قبل فاختر أحد الكافيهات القريبة من بيتي وجلسنا هناك: حمد لله على سلامتك يا بطل دلوقتي انت بقيت كويس والتهيوأت وكل حاجه راحت والحمد لله العلاج جاب نتيجة حسب كلام الدكاترة الكبار اللي هناك اللي تابعوك.

كنت أريد أن أخبره أن الأمر ليس كما في مخيلته وأني ما زلت أرى كل شيء لكن بشكل أقل، الحمد لله وشكرًا يا دكتور على تعبك معايا.

- انت راجل مؤمن بالله وعارف إن كلنا مسيرنا راجعيين
للي خلقنا!

- ونعم بالله، في إيه يا دكتور قلقنتي!
- أنا كنت خايف عليك من أعراض الصدمة طول الفترة
اللي فاتت دي بس انت لازم تواجه نفسك دلوقتي

بالحقيقة اللي انت عارفها ومتأكد منها انت خلاص
بقيت كويس واتعالجت.. محمد مامتك قالت لي من
فترة كبيرة إن «ليلي» حبيبتك ومامتها مدام «سلمي»
عملوا حادثة وماتوا مع بعض بقالهم حوالي ٣ سنين
وانت ساعتها كان عندك صدمة عصبية وكنت عايش
على المهدأت ومكنتش بتنام إلا بالأدوية .. وانت كنت
بتعانده نفسك وأهلك وكل الناس ومش راضي تصدق مع
إنك كنت معاهم في المستشفى يوم الحادثة وشفيت كل
حاجة بعينيك.

شعرت وكأن المكان يدور بي من حولي وفتحت عيني
عن آخرها وانهاالت دموعي مني في محاولة لاستدراك ما يقوله
الدكتور: لأ انت كداب هي عايشه وكلكوا كدايين وبتضحكوا
عليا.

- اهدى يا ابني مش كدا خلاص هي عند اللي أحسن مني
ومنك.

قلت له بصوت تملأه العصبية ودموعي ما زالت على وجهي
قبل أن أقوم من مكاني وأستعد لمغادرة المكان: اسكت انت
كداب انت بتقول كدا عشان مش قادر تعالجني هي عايشه غصب
عنك، انت ماما اللي قالت لك تقولي كدا، أنا عارف حركاتها
دي عايزه تكرهني فيها.. بردو هي عايشه غصب عنكم كلكوا يا
كدايين.

ومشيت في الشوارع أبكي وأبكي وأتذكر كل ذكرى لنا معًا
وأكلم نفسي وسط الناس في الشوارع حتى ظنوا أنني مجنون،
كنت أمشي في الطرقات ولا أعرف إلى أين تسحبني قدمي، أمشي
بلا هدف، واستمر الوضع على هذا حتى اقتربت الشمس من
الغروب ووجدت نفسي أمام المقابر!!! ما الذي سحبني إلى هنا؟
كيف أتيت إلى هنا، سمعت صوتًا يهمس في عقلي وتسمعه أذني
يطلب مني أن أبحث عن مقابرهم بين هذه المقابر وبدون وعي
مني انطلقت بين المقابر أبحث عن اسمها حتى كانت الصدمة
مضاعفة الآلاف المرات عندما رأيت لوحتين رخام يُكتب على
إحدهما: «سلمى محمود أسامة»، وعلى الأخرى «ليلي إيهاب
يحيى»!!.

وكانت آخر كلماتي أمام قبرها بصوت عالٍ وأنا أبكي وغارق
في دموعي: سبتيني ليه لوحدي وانتي عارفه اني مش هقدر أعيش
من غيرك.. إرجعي لي وانا مش هزعلك تاني، هعملك كل اللي
انتي عايزاه وعارفه هاجي اتقدم لك واتجوزك أنا خلاص جهزت
كل حاجة.. بس ارجعي، ارجعي عشان أقدر أعيش.. أنا عمري
ما كنت أتخيل انك هتروحي مني، كنت عايز أقولك حاجات كتير
إنك كنتي كل حاجه ليا في الدنيا، أمي وأختي وصحبتني وأهلي
وكل حاجة، كنت عايز أقولك إنك وحشتيني وإني خلاص مبقاش
ينفع أبقى مع حد غيرك، كنت عايز أعتذر لك على أي حاجه
زعلتك فيها.. بس انتي مشيتي وسبتيني قبل ما اقولك كل حاجه.

كان هذا آخر ما حدث قبل أن أقع في حالة إغماء أمام قبرها بعدما رأيت الحقيقة التي نجحت في الهروب منها طوال السنين الماضية، وتعرف على هويتي بعض الزائرين في المقابر ونقلوني إلى المنزل وعشت في أيام عذاب أشد بكثير من كل الذي قد مضى وحاول دكتور طاهر أن يعالج الأمر هو والكثير من زملاءه واتخذ الوقت لإعادة تأهيلي من جديد أكثر من عام حتى عدت طبيعياً بشهادة الجميع وبدأت أعود لعملي مرة أخرى وأمارسه بشكل جيد وكانت حياتي تسير في مسارها الشبه طبيعي.

وفي إحدى الليالي الباردة وأنا افكر في قصتنا التي شاء لها القدر أن تنتهي قبل ظهورها للنور، قررت استكمال الفصل الأخير من روايتنا التي عزمت على الانتهاء منها وتدوين كل ما قد مرّ من أحداثٍ فيه لعلها تسعدها في قبرها بعد أن كانت ستسعدها ليل زفافها.

وها أنا الآن في عودة من جديد لغرفتي الكئيبة أكتب في آخر سطور روايتي بعد أن تم شفائي من كل الهلاوس والتهبؤات التي كانت عرضة لها على مدار أعوام مضت وبشهادة العديد من الأطباء وعلي رأسهم دكتور طاهر ومعني شهادة صحية تؤكد شفائي، لكن أنا.. أنا ما زلت في حيرةٍ من أمري كيف تم شفائي وكيف توفيت حبيبتي ورأيت قبرها بعيني وهي تقف إلى جانبي الآن!! نعم جانبي وترتدي فستانها الأزرق، وشعرها الأسود يضرب

جبينها، وتضع يداً على كتفي والأخرى على شعري الذي كنت
أعقدُه خلف رأسي، وتنظر لي وهي تبسم ابتسامة هادئة وتقول:..
«متصدقهمش يا حبيبي أنا جنبك وفرحانة بيك إنك قدرت
تخلص الفصل الأخير في روايتنا، ارجع شغلك ومتخافش مش
هي دي النهاية...».

كانت «ليلي» غير كل ليلة.. كانت متوهجة وعيناها تلمعان
كلمعان النجوم في السماء، وجهها كالبدْرِ ليلَ تمامه، شعرها يغطي
كتفيها ويضرب جبينها، ابتسامتها أكاد أجزم أن ليس لها مثل في
الأرض ولا في السماء، يدها مليئة بالدفء والحنان وكأنها تمتلك
مفاتيح الراحة كلها بداخلها، بمجرد لمسها شعرت وكأنني كنت
ليلة مظلمة وأتى القمر ليضيئها ويزينها، لكن حقاً أنا لا أعلم ما
الذي يقف جانبي الآن.. هل هي حبيبتي ليلي أم ماذا....؟

الحُبُّ وعد، والوعدُ دينٌ ..
ولا يسدُّ الدينَ سِوى الرجالِ

